

欽定南史

卷五十三之六十



唐

李

延

壽

撰

列傳第四十三

梁武帝諸子

武帝八男丁貴嬪生昭明太子統簡文皇帝廬陵威王續阮修容生孝元皇帝吳淑媛生豫章王綜董昭儀生南康簡王績丁充華生邵陵攜王綸葛修容生武陵王紀

昭明太子統字德施小字維摩武帝長子也以齊中興元年九月生于襄陽武帝既年垂強仕方有家嗣時徐元瑜降而續又荊州使至云蕭穎胄暴卒時人謂之三慶少日而建鄴平識者知天命所集天監元年十一月立爲皇太子時年幼依舊於內拜東宮官屬文武皆入直永福省五年五月庚戌出居東宮太子生而聰叡三歲受孝經論語五歲徧讀五經悉通諷誦性仁孝自出宮恆思戀不樂帝知之每五日一朝多便留永福省或五日三日乃還宮八年九月於壽安殿講孝經盡通大義講畢親臨釋奠于國學年十二於內省見獄官將讞事問左右曰是皂衣何爲者曰廷尉官屬召視其書曰是皆可念我得判否有司以統幼給之曰得其獄皆刑罪上統皆署杖五十有司抱具獄不知所爲具言於帝帝笑而從之自是

數使聽訟每有欲寬縱者卽使太子決之建康縣讞人誘口獄翻縣以太子仁愛故輕當杖四十令曰彼若得罪便合家孥戮今縱不以其罪罪之豈可輕罰而已可付治十年十四年正月朔旦帝臨軒冠太子於太極殿舊制太子著遠游冠金蟬翠綵纓至是詔加金博山太子美姿容善舉止讀書數行並下過目皆憶每游宴祖道賦詩至十數韻或作劇韻皆屬思便成無所點易帝大弘佛教親自講說太子亦素信三寶徧覽衆經乃於宮內別立慧義殿專爲法集之所招引名僧自立三誦法義普通元年四月甘露降于慧義殿咸以爲至德所感時俗稍奢太子欲以己率物服御朴素身衣浣衣膳不兼肉三年十一月始興王憺薨舊事以東宮禮絕傍親書翰並依常儀太子以爲疑命僕射劉孝綽議其事孝綽議曰案張鏡撰東宮儀記稱三朝發哀者踰月不舉樂鼓吹寢奏服限亦然尋傍絕之義義在去服服雖可奪情豈無悲鑢歌輟奏良亦爲此既有悲情宜稱兼慕卒哭之後依常舉樂稱悲竟此理例相符謂猶應兼慕請至卒哭僕射徐勉左率周捨家令陸襄並同孝綽議太子令曰張鏡儀記云依士禮終服月稱慕悼又云凡三朝發哀者踰月不舉劉僕議云傍絕之義義在去服服雖可奪情豈無悲卒哭之後依常舉樂稱悲竟此理例相符尋情悲之說非止卒哭之後緣情爲論此自難一也用張鏡之舉樂棄張鏡之稱悲一鏡之言取捨有異此自難二也陸家令止云多歷年所恐非事證雖復累稔所用意常未安近亦嘗以此問

外由來立意謂猶應有慕悼之言張豈不以舉樂爲大稱悲事小所以用小而忽大良亦有以至如元正大份事爲國章雖情或未安而禮不可廢鐘吹軍樂比之亦然書疏方之事則成小差可緣心聲樂自外書疏自內樂自他書自己劉僕之議卽情未安可令諸賢更共詳衷司農卿明山賓步兵校尉朱異議稱慕悼之辭宜終服月於是付典書遵用以爲永準七年十一月貴嬪有疾太子還永福省朝夕侍疾衣不解帶及薨步從喪還宮至嬪水漿不入口每哭輒慟絕武帝敕中書舍人顧協宣旨曰毀不滅性聖人之制不勝喪比於不孝有我在那得自毀如此可卽強進飲粥太子奉敕乃進數合自是至葬日進麥粥一升武帝又敕曰聞汝所進過少轉就羸瘦我比更無餘病政爲汝如此曾中亦填塞成疾故應彊加饘粥不俟我恆爾懸心雖屢奉敕勸逼終喪日止一溢不嘗菜果之味體素壯腰帶十圍至是減削過半每入朝士庶見者莫不下泣太子自加元服帝便使省萬機內外百司奏事者填塞於前太子明於庶事每所奏謬誤巧妄皆卽辯析示其可否徐令改正未嘗彈糾一人平斷法獄多所全宥天下皆稱仁性寬和容衆喜愠不形於色引納才學之士賞愛無倦恆自討論墳籍或與學士商推古今繼以文章著述率以爲常于時東宮有書幾三萬卷名才並集文學之盛晉宋以來未之有也性愛山水於玄圃穿築更立亭館與朝士名素者遊其中嘗泛舟後池番禺侯軌盛稱此中宜奏女樂太子不答詠左思招隱詩云何必綵

與竹山水有清音軌慙而止出宮二十餘年不畜音聲未薨少時敕賜太樂女伎一部略非所好嘗通中
大軍北侵都下米貴太子因命菲衣減膳每霖雨積雪遣腹心左右周行閭巷視貧困家及有流離道路
以米密加振賜人十石又出主衣絹帛年常多作襦袴各三千領冬月以施寒者不令人知若死亡無可
斂則爲備棺槨每聞遠近百姓賦役勤苦輒斂容變色常以戶口未實重於勞擾吳郡屢以水災不熟有
上言當漕大瀆以瀉浙江中大通二年春詔遣前交州刺史王莽假節發吳興信義三郡人丁就役太
子上疏曰伏聞當遣王莽等上東三郡人丁開漕溝渠導洩震澤使吳興一境無復水災慙勞永逸必獲
後利未萌難覩竊有愚懷所聞吳興累年失收人頗流移吳郡十城亦不全熟唯信義去秋有稔復非恆
役之民今日東境穀稼猶貴劫盜屢起所在有司皆不聞奏今征戍未歸強丁疎少此雖小舉竊恐難合
吏一呼門動爲人蠹又出丁之處遠近不一比得齊集已妨蠶農去年稱爲豐歲公私未能足食如復今
茲失業慮恐爲弊更深且草竊多伺候人間虛實若善人從役則抄盜彌增吳興未受其益內地已離其
弊不審可得權停此功待優實以不武帝優詔以喻焉太子孝謹天至每入朝未五鼓便守城門開東宮
雖燕居內殿一坐一起恆向西南面臺宿被召當入危坐達旦三年三月游後池乘彫文舸摘芙蓉姬人
鴉舟投溺而得出因動股恐貽帝憂深誠不言以寢疾聞武帝敕看閱輒自力手書啟及稍篤左右欲啟

聞猶不許曰云何令至尊知我如此惡因便嗚咽四月乙巳暴惡馳啟武帝比至已薨時年三十一帝臨
哭盡哀詔斂以袞冕諡曰昭明五月庚寅葬安寧陵詔司徒左長史王筠爲哀冊文朝野惋愕都下男女
奔走宮門號泣滿路四方毗庶及壇徼之人聞喪者哀慟太子性仁恕見在宮禁防捉荆子者問之云以
清道驅人太子恐復致痛使捉手板代之類食中得蠅蟲之屬密置梓邊恐廚人獲罪不令人知又見後
閣小兒攤戲後屬有獄牒攤者法士人結流徒庶人結徒太子曰私錢自戲不犯公物此科太重令注刑
止三歲士人免官獄牒應死者必降長徒自此以下莫不減半所著文集二十卷又撰古今典誥文言爲
正序十卷五言詩之善者爲英華集二十卷文選三十卷薨後長子東中郎將南徐州刺史華容公歡封
豫章郡王次子枝江公譽封河東郡王曲江公譽封岳陽郡王警封武昌郡王鑿封義陽郡王各三千戶
女悉同正主蔡妃供侍一同常儀唯別立金華宮爲異帝旣廢嫡立庶海內噂噤故各封諸子大郡以慰
其心岳陽王譽流涕受拜累日不食初丁貴嬪薨太子遣人求得善墓地將斬草有賣地者因闖入俞三
副求市若得三百萬許以百萬與之三副密啟武帝言太子所得地不如今所得地於帝吉帝末年多忌
便命市之葬畢有道士善圖墓云地不利長子若厭伏或可申延乃爲蠟鵝及諸物埋墓側長子位有宮
監鮑邈之魏雅者二人初並爲太子所愛邈之晚見疎於雅密啟武帝云雅爲太子厭禱帝密遣檢掘果

得鵝等物大驚將窮其事徐勉固諫得止於是唯誅道士由是太子迄終以此慙慨故其嗣不立後邵陵王臨丹陽郡因邈之與鄉人爭婢議以爲誘略之罪牒宮簡文追感太子寃揮淚誅之邈之兄子僧隆爲宮直前未知邈之姪卽日驅出先是人間謠曰鹿子開城門鹿子開當開復未開使我心徘徊城中諸少年逐歡歸去來鹿子開者反語爲來子哭云帝哭也歡前爲南徐州太子果薨遣中書舍人臧厥追歡於崇正殿解髮臨哭歡旣嫡孫次應嗣位而遲疑未決帝旣新有天下恐不可以少主主大業又以心術故意在晉安王猶豫自四月上旬至五月二十一日方決歡止封豫章王還任往謠言心徘徊者未定也城中諸少年逐歡歸去來復還徐方之象也歡字孟孫位雲麾將軍江州刺史薨謚安王子棟嗣棟字元吉及簡文見廢侯景奉以爲主棟方與妃張氏鋤葵而法駕奄至棟驚不知所爲泣而升輦及卽位升武德殿歎有迴風從地涌起翻飛華蓋徑出端門時人知其不終於是年號天正追尊昭明太子曰昭明皇帝安王爲安皇帝金華敬妃蔡氏爲敬皇后太后王氏爲皇太后妃爲皇后未幾行禪讓禮棟封淮陰王及二弟橋樛並鎖於密室景敗走兄弟相扶出逢杜顛於道顛去其鎖弟曰今日免橫死矣棟曰倚伏難知吾猶有懼初王僧辯之爲都督將發詔元帝曰平賊之後嗣君萬福未審有何儀注帝曰六門之內自極兵威僧辯曰平賊之謀臣爲己任成濟之事請別舉人由是帝別敕宣猛將軍朱買臣使行

醉會儻文已被害棟等與買臣遇見呼往船共飲未竟並沉于水

河東王譽字重孫普通二年封枝江縣公中大通三年改封河東郡王累遷南中郎將湘州刺史未幾侯景寇建鄴譽入援至青草湖臺城沒有詔班師譽還湘鎮時元帝軍于武城新除雍州刺史張纘密報元帝曰河東起兵岳陽聚米將來襲江陵元帝甚懼沉米斷纜而歸因遣諮議周弘直至譽所督其糧衆譽曰各自軍府何忽疑人使三反譽並不從元帝大怒遣世子方等征之反爲譽敗死又令信州刺史鮑泉討譽并陳示禍福譽謂曰欲前卽前無所多說泉軍于石柳寺譽逆擊不利而還泉進軍橘洲譽攻之又見敗於是遂圍之譽幼而有驍勇馬上用弩兼有膽氣能撫士卒甚得衆心元帝又遣領軍王僧辯代鮑泉攻譽譽將潰圍而出會其麾下將慕容華引僧辯入城遂被執謂守者曰勿殺我得一見七官申此讒賊死無恨主者曰奉令不許遂斬首送荆鎮元帝返其首以葬焉初譽之將敗引鏡照面不見其頭又見長人蓋屋兩手據地嗽其臍又見白狗大如驢從城出不知所在譽甚惡之俄而城陷

豫章王綜字世謙武帝第二子也天監三年封豫章郡王累遷北中郎將南徐州刺史入爲侍中鎮右將軍初綜母吳淑媛在齊東昏宮寵在潘余之亞及得幸於武帝七月而生綜宮中多疑之淑媛寵衰怨望及綜年十四五恆夢一年少肥壯自挈其首對綜如此非一綜轉成長心驚不已頻密問淑媛曰夢何所

如夢既不一淑媛問夢中形色頗類東昏因密報之曰汝七月日生兒安得比諸皇子汝今太子次弟幸保富貴勿洩綜相抱哭每日夜恆泣泣又每靖室閉戶藉地被髮席藁輕財好士分施不輟唯留身上故衣外齋接客分麤服廚庫恆致罄乏常於內齋布沙於地終日跣行足下生臘日能行三百里嘗有人士姓王以屯躡投告綜于時大乏唯有眠牀故皂複帳卽下付之其降意下士以伺風雲之會諸侯王妃主及外人並知此懷唯武帝不疑及長有才學善屬文武帝御諸子以禮朝見不甚數綜恆怨不見知每出蕃淑媛恆隨之至鎮時年十五尙裸袒嬉戲於前晝夜無別妃袁氏尙書令昂之女也淑媛恆節其宿止過袁妃尤不以道內外咸有穢聲綜後在徐州政刑酷暴又有勇力制及奔馬搃殺駒犢常陰服微行著烏絲布幅夜出無有期度招引道士探求數術性聰敏多通每武帝有敕疏至輒忿恚形於顏色帝性嚴羣臣不敢輕言得失凡綜所行弗之知也於徐州還頻表陳便宜求經略邊境帝並優敕荅之徐州所有練樹並令斬殺以帝小名練故累致意尙書僕射徐勉求出鎮襄陽勉未敢言因是怒勉餉以白團扇圖伐檀之詩言其賄也在西州於別室歲時設席祠齊氏七廟又累微行至曲阿拜齊明帝陵然猶無以自信聞俗說以生者血瀝死者骨滲卽爲父子綜乃私發齊東昏墓出其骨瀝血試之既有徵矣在西州生次男月餘日潛殺之既瘞夜遣人發取其骨又試之其酷忍如此每對東宮及諸王辭色不恭遜嘗改

歲後問訊臨川王宏出至中閣登宏羊車次遣糞而出居都下所爲多如此者普通四年爲都督南兗州刺史頗勤於事而不見賓客其辭訟則隔簾理之方幅出行垂帷於輿每云惡人識其面也初齊故建安王蕭寶寅在魏綜求得北來道人釋法鸞使入北通問於寶寅謂爲叔父襄陽人梁話母死法鸞說綜厚賜之言終可任使綜遺話錢五萬及葬畢引在左右法鸞在廣陵往來通魏尤數每會淮陰苗文寵家言文寵於綜綜引爲國常侍六年魏將元法僧以彭城降帝使綜都督衆軍權鎮彭城并攝徐州府事武帝聽別玄象知當更有敗軍失將恐綜爲北所禽手敕綜令拔軍每使居前勿在人後綜恐帝覺與魏安豐王元延明相持夜潛與梁話苗寵三騎開北門涉汴河遂奔蕭城自稱隊主見延明而拜延明坐之問其名氏不荅曰殿下問人有見識者延明召使視之曰豫章王也延明喜下地執其手荅其拜送于洛陽及旦齋內諸閣猶閉不開衆莫知所以唯見城外魏軍叫曰汝豫章王昨夜已來在我軍中城中旣失王所在衆軍皆退不得還者甚衆湘州益陽人任煥常有騅馬乘之退走煥脚爲抄所傷人馬俱弊煥於橋下歇抄復至煥脚痛不復得上馬於是向馬泣曰騅子我於此死矣馬因跪其前脚煥乃得上馬遂免難綜長史江華大府卿祖暉並爲魏軍所擒武帝聞之驚駭綜至魏位侍中空高平公丹陽王梁話苗寵並爲光祿大夫綜改名縱字德文追服齊東昏斬衰魏太后及羣臣並弔八月有司奏削爵土絕其屬籍改

子直姓惇氏未及旬日有詔復屬籍封直永新侯久之乃策免吳淑媛俄遇鳩而卒有詔復其品秩諡曰敬使直主其喪及蕭寶寅據長安反綜復去洛陽欲奔之魏法度河橋不得乘馬綜乘馬而行橋吏執之送洛陽魏孝莊初歷位司徒太尉尙帝姊壽陽長公主陳慶之之至洛也送綜啟求還時吳淑媛尙在敕使以綜小時衣寄之信未達而慶之敗未幾終於魏初綜在魏不得志嘗作聽鍾鳴悲落葉以申其志當時莫不悲之後梁人盜其柩來奔武帝猶以子禮祔葬陵次直字思方位晉陵太守沙州刺史

南康簡王績字世謹小字四果武帝第四子也天監七年封南康郡王十年爲南徐州刺史時年七歲主者有受貨洗改解書長史王僧孺弗之覺績見而詰之便卽首服衆咸歎其聰警十七年爲都督南兗州刺史在州以善政稱尋有詔徵還百姓曹樂等三百七十人詣闕上表稱績尤異一十五條乞留爲州任優詔許之普通四年徵爲侍中雲麾將軍領石頭戍軍事五年出爲江州刺史丁董淑媛憂居喪過禮固求解職乃徵授安右將軍領石頭戍軍事尋加護軍羸瘠不親視事大通三年因感疾薨于任贈開府儀同三司諡曰簡續寡玩好少嗜欲居無僕妾躬事儉約所有租秩悉寄天府旣薨後少府有南康國無名錢數千萬子會理嗣

會理字長才少聰慧好文史年十一而孤特爲武帝所愛衣服禮秩與正王不殊十五爲湘州刺史多信

左右行事劉納每禁之會理心不平證以贓貨收送建業納歎曰我一見天子使汝等知會理厚送資糧數遣慰喻令心腹於青草湖爲盜殺納百口俱盡累遷都督南兗州刺史太清元年督衆軍北侵至彭城爲魏師所敗退歸本鎮二年侯景圍城會理入援會北徐州刺史封山侯正表將應其兄正德外託赴援實謀襲廣陵會理擊破之方得進路臺城陷會理歸鎮侯景遣前臨江太守董紹先以武帝手敕召會理其僚佐曰紹先書豈天子意咸勸拒之會理用其典籤范子鸞計曰天子年尊受制賊虜今有手敕召我入朝臣子之心豈得違背且處江北功業難成不若身赴京都圖之肘腋遂納紹先紹先入以烏幡麾衆單馬遣之至都景以爲司空兼尙書令雖在寇手每思匡復與西鄉侯歡等潛布腹心要結壯士時范陽祖皓斬董紹先據廣陵城起義期以會理爲內應皓敗辭相連及侯景矯詔免會理官猶以白衣領尙書令是冬景往晉熙都下虛弱會理復與柳敬禮及北兗州司馬成欽謀之敬禮曰舉大事必有所資今無乃兵安可以動會理曰湖熟有吾故舊三千餘人昨來相知尅期響集計賊守兵不過千人若大兵外攻吾等內應直取王偉事必有成縱景後歸無能爲也敬禮曰善于時百姓厭賊咸思用命建安侯賁以謀告王偉偉遂收會理及其弟通理時有錢唐褚冕會理之舊亦囚於省問事之所起考掠干計終無所言會理隔壁聞之遙曰褚郎卿豈不爲吾致此邪然勿言王偉害會理等冕以不服偉赦之會理弟通理

字仲宣位太子洗馬封祈陽侯至是亦遇害

通理弟父理字季英生十旬而簡王薨至三歲能言見內人分散涕泣相送問其故或曰此簡王宮人喪畢去耳父理便號泣悲不自勝諸宮人見之莫不哀感爲之停者三人服闋見武帝升殿又悲不自勝帝爲之收涕謂左右曰此兒大必爲奇士大同八年封安樂縣侯父理慷慨慕立功名每讀書見忠臣烈士未嘗不廢卷歎曰一生之內當無愧古人博覽多識有文才嘗祭孔文舉墓并爲立碑製文甚美及侯景內寇父理聚客赴南兗州隨兄會理入援及城陷又隨會理還廣陵因入齊爲質乞師行二日會景遣董紹先據廣陵遂追獲之防嚴不得與兄相見乃僞請先還都入辭母因謂其姊固安主曰兄若至願使善爲計自勉勿顧以爲念前途亦思立効但未知天命何如耳至都以魏降人元貞忠正可以託孤乃以玉柄屬贈之貞怪不受父理曰後當見憶會祖皓起兵父理奔長蘆爲景所害元貞始悟其前言往收葬焉廬陵威王續字世訢武帝第五子也天監八年封廬陵王少英果旅力絕人馳射應發命中武帝歎曰此我之任城也嘗馳射於帝前續中兩廬冠於諸人帝大悅中大通二年爲都督雍州刺史靈轡校尉大同元年遷江州刺史又爲驃騎將軍開府儀同三司又爲都督荊州刺史薨贈司空諡曰威始元帝母阮脩嘗得幸由丁貴嬪之力故元帝與簡文相得而與廬陵王少相狎長相謗元帝之臨荊州有宮人李桃兒

者以才慧得進及還以李氏行時行宮戶禁重續具狀以聞元帝泣對使訴於簡文簡文和之不得元帝
猶懼送李氏還荊州世所謂西歸內人者自是二王書問不通及續薨元帝時爲江州聞問入閣而躍屣
爲之破尋自江州復爲荊州荊州人迎于我境帝數而遣之吏人失望續多聚馬仗蓄養趨雄耽色愛財
極意收斂倉儲庫藏盈溢臨終有啟遣中錄事叅軍謝宣融送所上金銀器千餘件武帝始知其富以爲
財多德寡因問宣融曰王金盡於此乎宣融曰此之謂多安可知也夫王之過如日月之蝕欲令陛下知
之故終而不隱帝意乃解世子憑以非前誅死次子應嗣應不慧王薨至內庫閱珍物見金錠問左右曰
此可食否答曰不可應曰既不可食並特乞汝他皆此類

邵陵攜王綸字世調小字六真武帝第六子也少聰穎博學善屬文尤工尺牘天監十三年封邵陵郡王
普通五年以西中郎將權攝南徐州事在州輕險躁虐喜怒不恆車服僭擬肆行非法邀遊市里雜於厮

隸嘗問竇紉者曰刺史何如對者言其躁虐綸怒令吞組以死自是百姓惶駭道路以目嘗逢喪車奪孝
子服而著之匍匐號叫籤帥懼罪密以聞帝始嚴責綸不能改於是遣代綸悖慢逾甚乃取一老公短瘦
類帝者加以衰冕置之高坐朝以爲君自陳無罪使就坐剝褫捶之於庭忽作新棺木貯司馬崔會意以
輜車挽歌爲送葬之法使嫗乘車悲號會意不堪輕騎還都以聞帝恐其奔逸以禁兵取之將於獄賜蠶

昭明太子流涕固諫得免官削爵土還第大通元年復封爵中大通四年爲揚州刺史綸素驕縱欲盛器服遣人就市賒買錦采絲布數百疋擬與左右職局防閑爲絳衫內人帳幔百姓並闕閉邸店不出臺續使少府市采經時不能得敕責府丞何智通具以聞因被責還第恆遣心腹馬容戴子高戴瓜李撤趙智英等於路尋何智通於白馬巷逢之以槊刺之刃出於背智通以血書壁作邵陵字乃絕遂知之帝懸錢百萬購賊有西州游軍將宋鵠子條姓名以啟敕遣舍人諸曇瓘領齋仗五百人圍綸第於內人檻中禽瓜撤智英子高驍勇踰牆突圍遂免智通子敞之割炙食之卽載出新亭四面火炙之焦熟敞車載錢設鹽蒜雇百姓食撤一嚮賞錢一千徒黨并肉遂盡綸鎖在第舍人諸曇瓘并主帥領仗身守視免爲庶人經三旬乃脫鎖頃之復封爵後預餞衡州刺史元慶利於坐賦詩十二韻末云方同廣川國寂寞久無聲大爲武帝賞曰汝人才如此何慮無聲旬日間拜郢州刺史太清二年位中衛將軍開府儀同三司侯景構逆加征討大都督率衆討景將發帝誡曰侯景小豎頗習行陣未可以一戰卽殄當以歲月圖之綸發白下中江而浪起有物蕩舟將覆識者尤異之及次鍾離景已度采石綸乃晝夜兼道旋軍入赴江中流風起人馬溺者十一二遂率西豐公大春新塗公大成等步騎三萬發京口將軍趙伯超請從徑路直指鍾山出其不意綸從之衆軍奄至賊徒大駭分爲三道攻綸綸大破之翅日賊又來攻日晚賊稍

退南安侯暉以數十騎馳之賊回拒駿駿部亂賊因逼大軍大軍潰綸至鍾山戰敗奔還京口軍主霍俊
見獲賊送于城下逼云已禽邵陵王俊僞許之乃曰王小失利政爲糧盡還京口俊爲託邏所獲非軍敗
也賊以刀背毆其脾俊色不變賊義而捨之俊中書舍人靈超子也三年正月綸與東揚州刺史大連等
入援至驪騎洲進位司空臺城陷綸奔禹穴東土皆附臨城公大連懼將害己乃圖之綸覺乃去至尋陽
尋陽公大心欲以州讓之不受大寶元年綸至郢州刺史南平王恪讓州於綸綸不受乃上綸爲假黃鉞
都督中外諸軍事綸於是置百官改聽事爲正陽殿內外齋省悉題署焉而數有變怪祭城隍神將烹牛
有赤蛇繞牛口出南浦施安幄帳無何風起飄沒于江于時元帝圍河東王譽於長沙旣久譽請救於綸
綸欲往救之爲軍糧不繼遂止乃與元帝書曰道之斯美以和爲貴況天時地利不及人和豈可手足肱
支自相屠害卽日大敵猶疆天誓未雪余爾昆弟在外三人如不匡救安用臣子如使逆寇未除家禍仍
構料今訪古未或弗亡夫征戰之理義在克勝至於骨肉之戰愈勝愈酷捷則非功敗則有喪勞兵損義
虧失多矣侯景之軍所以未窺江外者政爲藩屏盤固宗鎮疆密若自相魚肉是謂代景行師景便不勞
兵力坐致成効醜徒聞此何快如之元帝復書陳譽有罪不可解圍之狀綸省書流涕曰天下之事一至
於斯左右聞之莫不掩泣於是大脩器甲將討侯景元帝聞其盛乃遣王僧辯帥舟師一萬以逼綸綸將

劉龍武等降僧辯綸遂與子贖等十餘人輕舟走武昌沙門法馨與綸有舊藏之巖石之下時綸長史韋
質司馬姜偉先在外聞綸敗馳往迎元帝復遣將徐文盛追攻之綸復收卒屯于齊昌郡將引魏軍共攻
南陽侯景將任約襲綸綸敗走定州刺史田龍祖迎綸綸懼爲所執復歸齊昌行收兵至汝南魏所署汝
南城主李素孝者綸之故吏開城納之綸乃脩復城池收集士卒將攻竟陵魏聞之遣大將楊忠儀同侯
幾通攻破城執綸不爲屈通乃臥大鼓使綸坐上殺之投于江岸經日色不變烏獸莫敢近時飛雪飄
零屍橫道路周回數步獨不霑灑舊主帥安陸人郝破敵斂之於襄陽葬之日黃雪霽糝唯冢壘所獨不
下雪楊忠知而悔爲使以太牢往祭殯焉百姓憐之爲立祠廟岳陽王晉遣迎喪葬於襄陽望楚山南贈
太宰諡曰安後元帝議追加諡尙書左丞劉燾議諡法急政交外曰攜從之綸任情卓越輕財愛士不競
人利府無儲積聞有輒求旣得卽散士亦以此歸之初鎮京口大造器甲旣涉聲論投之于江及後出征
戎備頗闕乃歎曰吾昔造仗本備非常無事涉疑遂使零散今日討抄卒無所資初昭明之薨簡文入居
監撫綸不謂德舉而云時無豫章故以次立及廬陵之沒綸缺望滋甚於是伏兵于莽用何車駕而臺舍
人張僧盾知之其謀頗洩又綸獻曲阿酒百器上以賜寺人飲之而斃上乃不自安頗加衛士以警宮內
於是傳者諸相疑阻而綸亦不懼武帝竟不能有所廢刪卒至宗室爭競爲天下笑

長子堅字長白大同元年以例封汝南侯亦善草隸性頗庸短嘗與所親書題云嗣王其人得書大駭執以諫堅堅曰前言戲耳人曰不願以此爲戲耳侯景圍城堅屯太陽門終日痛飲不撫軍政吏士有功未嘗申理疫癘所加亦不存恤士咸憤怨太清三年堅書佐董勛華白曇朗等以堅私室醞釀亟有烹宰不相霽及忿恨夜遣賊登樓城遂陷堅遇害弟確

確字仲正少驍勇有文才尤工楷隸公家碑碣皆使書之除祕書丞武帝謂曰爲汝能文所以特有此授大同二年封爲正階侯復徙封永福常在第中習騎射學兵法時人以爲狂左右或進諫確曰聽吾爲國家破賊使汝知之鍾山之役確所向披靡羣賊憚之確每臨陣對敵意甚詳贍帶甲據鞍自朝及夕馳驟往返不以爲勞諸將服其壯勇軍敗賊使負砲不之知也確因隙自拔得達朱方及後侯景乞盟憚確及趙威方在外慮爲後患敢求召確入城詔乃召確爲南中郎將廣州刺史確知此盟多貳城必淪沒欲先遣趙威方入確因南奔綸聞之逼確使入確猶不肯綸流涕謂曰汝欲反邪時臺使周石珍在坐確曰侯景雖云欲去而不解長圍以意而推其事可見今召我入未見益也石珍曰敕旨如此侯豈得辭確執意猶堅綸大怒謂趙伯超曰譙州卿爲我斬之當齋首赴闕伯超揮刃眦曰我識君耳刀豈識君確流涕而出遂入城及景背盟復圍城城陷確排闥入啟時武帝方寢確曰城已陷矣帝曰猶可一戰否對曰人心

不可臣向格戰不禁縋下僅得至此武帝歎曰自我得之自我失之亦復何恨幸不累子孫乃使確爲慰勞文謂曰爾速去謂汝父無以二宮爲念及出見景景愛其旅力恆令在左右後從景仰見飛鷹羣賊爭射不中確射之應弦卽落賊徒忿嫉咸勸除之先是綸遣典籤唐法隆密導確確謂使者曰侯景輕恍可一夫力致確不惜死欲手刃之卿還啟家王願勿以一子爲念後與景獵鍾山同逐禽引弓將射景弦斷不得發財覺殺之

武陵王紀字世詢武帝第八子也少而寬和喜怒不形於色勤學有文才天監十三年封武陵王尋授揚州刺史中書詔成武帝加四句曰貞白儉素是其清也臨財能讓是其廉也知法不犯是其慎也庶事無留是其勤也紀特爲帝愛故先作牧揚州大同三年爲都督益州刺史以路遠固辭帝曰天下方亂惟益州可免故以處汝汝其勉之紀歔歔旣出復入帝曰汝嘗言我老我猶再見汝還益州也紀在蜀開建寧越嶲貢獻方物十倍前人朝嘉其績加開府儀同三司初天監中震太陽門成字曰紹宗梁位唯武王解者以武陵王於是朝野屬意焉及侯景陷臺城上甲侯韶西上至硤出武帝密勅加紀侍中假黃鉞都督征討諸軍事驃騎大將軍太尉承制大寶元年六月辛酉紀乃移告諸州征鎮遣世子圓照領二蜀精兵三萬受湘東王繹節度繹命圓照且頓白帝未許東下七月甲辰湘東王繹遣鮑檢報紀以武帝崩問十

一月壬寅紀總戎將發益鎮繹使胡智監至蜀書止之曰蜀中斗絕易動難安弟可鎮之吾自當滅賊又別紙云地擬孫劉各安境界情深魯衛書信恆通二年四月乙丑紀乃僭號於蜀改年曰天正暗與蕭棟同名識者尤之以爲於文天馬二人正爲一止言各一年而止也紀又立子圓照爲皇太子圓正爲西陽王圓滿竟陵王圓普南譙王圓肅宜都王以巴西梓潼二郡太守永豐侯爲征西大將軍益州刺史封秦郡王司馬王僧略直兵參軍徐怿並固諫皆殺之僧略僧辯弟怿勉從子也以諫且以怿與將帥書云事事往人口具以爲反於已誅之永豐侯搗歎曰王不克矣夫善人國之基也今乃誅之不亡何待又謂所親曰昔桓玄年號大亨識者爲謂二月了而玄之敗實在仲春今年曰天正在文爲一止其能久乎丁卯元帝遣萬州刺史宋道襲圓照於白帝圓照弟圓正時爲西陽太守召至鎮于省內初楊乾運求爲梁州刺史不得紀以爲潼州刺史楊法深求爲黎州刺史亦不得以爲沙州刺史二憾不獲所請各遣使通西魏及聞魏軍侵蜀紀遣其將譙淹回軍赴援魏將尉遲迴逼涪水楊乾運降之迴卽趨成都五月己巳紀次西陵軍容甚盛元帝命護軍將軍陸法和立二城於峽口名七勝城鎮江以斷峽時陸納未平蜀軍復逼元帝甚憂法和告急旬日相繼元帝乃拔任約於獄以爲晉安王司馬撤禁兵以配之并遣宣猛將軍劉榮共約西赴六月紀築連城攻絕鐵鎖元帝復於獄拔謝荅仁爲步兵校尉配衆一旅上赴紀之將

發也江水可揭前部不得行及登舟無雨而水長六尺劉孝勝喜曰殆天贊也將至峽有黑龍負舟其將帥咸謂天助及頓兵日久頻戰不利師老糧盡智力俱殫又魏人入劍閣成都虛弱憂懣不知所爲先是元帝已平侯景執所俘馘頻遣報紀世子圓照鎮巴東留執不遣啟紀云侯景未平宜急征討已聞荆鎮爲景所滅疾下大軍紀謂爲實然故仍率衆沿江急進於路方知侯景已平便有悔色召圓照責之圓照曰侯景雖誅江陵未服宜速平蕩紀亦以旣居尊位宣言於衆敢諫者死蜀中將卒日夜思歸所署江州刺史王開業進曰宜還救根本更思後圖諸將衆以爲然圓照劉孝勝獨言不可紀乃止旣而聞王琳將至潛遣將軍侯劼傍險出法和後臨水築壘禦琳及法和元帝書遺紀遣光州刺史鄭安中往喻意於紀許其還蜀專制嶮方紀不從命報書如家人禮旣而侯劼爲任約謝荅仁所破又陸納平諸軍並西赴元帝乃與紀書曰甚苦大智季月煩暑流金鑠石聚蚊成雷封狐千里以茲玉體辛苦行陣乃瞻西顧我勞如何自獵醜憑陵羯胡叛換吾年爲一日之長屬有平亂之功膺此樂推事歸當璧儲遣使乎良所希也如曰不然於此投筆友于兄弟分形共氣兄肥弟瘦無復相代之期讓棗推梨長罷懽愉之日上林靜拱聞四鳥之哀鳴宣室披圖嗟萬始之長逝心乎愛矣書不盡言大智紀別字也帝又爲詩曰回首望荆門驚浪且雷奔四鳥嗟長別三聲悲夜猿圓正在獄中連句曰水長二江急雲生三峽昏願贖淮南罪思報

阜陵恩帝看詩而泣紀頰敗知不振遣署度支尙書樂奉業往江陵論和緝之計元帝知紀必破遂相而不許於是兩岸十餘城遂俱降游擊將軍樊猛率所領至紀所紀在船中遶牀而走以金擲猛等曰此顧卿送我一見七官卿必當富貴猛曰天子何由可見殺足下此金何之猶不敢逼圍而守之法和馳啟上密敕樊猛曰生還不成功也猛率甲士祝文簡張天成拔刀升舟猶左右奔擲第五子圓滿馳來就父紀首既落圓滿驅亦分法和收太子圓照兄弟三人問圓照曰阿郎何以至此圓照曰失計願爲公作奴法和此遣之

圓照字明周中大同初爲益州東齋郎宋寧宋興二郡太守遠鎮諸王世子皆在建鄴質守帝特愛紀故遣以副紀紀之構釁悉其謀也次弟圓正先見鎖在江陵及紀旣以兵終元帝使謂曰西軍已敗汝父不知存亡意欲使其自裁而圓正旣奉此問便號哭盡哀以禍難之興皆由圓照於是唯哭世子言不絕聲上謂圓正聞問悲感必應自殺頰看知不能死又付廷尉獄及見圓照曰阿兄何乃亂人骨肉使酷痛如此圓照更無所言唯云計誤並命絕食於獄齧臂啖之十三日死天下聞而悲之

圓正字明允紀第二子美風儀善談論寬和好施愛接士人封江安侯歷西陽太守有惠政旣居上流人附者甚衆及侯景作逆圓正收兵衆且一萬後遂跋扈中流不從王命及景破復謀入蜀元帝將圖之

爲平南將軍及至弗見使南平嗣王恪等醉而囚之時紀稱梁王及紀敗死爲有司奏請絕紀屬籍元帝許之賜姓饗饗氏紀最爲武帝所愛武帝諸子罕登公位唯紀以功業顯著先敗黃扉兄邵陵王綸屢以罪黜心每不平及聞紀爲征西綸撫枕歎曰武陵有何功業而位乃前我朝廷憤憤似不知人武帝聞之大怒曰武陵有恤人拓境之勳汝有何績太清初帝思之使善畫者張僧繇至蜀圖其狀在蜀十七年南開靈州越嶲西通資陵吐谷渾內脩耕桑鹽鐵之功外通商賈遠方之利故能殖其財用器甲殷積馬八千匹上足者置之內廡開寢殿以通之日落輒出步馬便騎射尤工舞稍九日講武躬領幢隊及聞國難謂僚佐曰七官文士豈能匡濟既東下黃金一斤爲餅百餅爲籩至有百籩銀五倍之其他錦罽繒采稱是每戰則懸金帛以示將士終不賞賜靈州刺史陳知祖請散金銀募勇士不聽慟哭而去自是人自離心莫肯爲用紀頗學觀占善風角亦知不復能濟瞻望氣色歎吒天道椎牀聲聞于外有請事者以疾辭不見既死埋於沙州不封無槨元帝以劉孝勝付廷尉尋免之初紀將僭號祿怪不一內寢柏殿柱繞節生花其莖四十有大蠶靡可愛狀似荷花識者曰王敦祿花非佳事也時蜀知星人說紀曰官若東下當用甲年太白出西從之爲利甲歲發蜀酉年入荆不可失也發蜀之歲太白在西北及明年則已東出矣論曰甚矣讒佞之爲巧也夫言附正直跡在恭敬悅目會心無施不可至乃離父子間兄弟廢楚嫡疎漢

嗣可爲太息良非一途以昭明之親之賢梁武帝之愛之信謗言一及至死不能自明況於下此者也綜
虛棄政之疑懷負尺之志肆行狂悖卒致奔亡廬陵多財爲累雄心自立未及駟暴早卒爲幸南康爲政
有方居喪以禮惜乎早夭不拯危季邵陵少而險躁人道頓忘晚致勤王其殆優矣武陵地居勢勝卒致
傾覆才輕志大能無及乎

南史卷五十三

南史卷五十三考證

昭明太子統傳徐元瑜降而續又荊州使至○又監本誤人今从南本

時年幼依舊於內○梁書於字上有居字應增入

五歲徧讀五經悉通諷誦○通一本作融

胸中亦填塞成疾○填梁書作圯

不俟我恆爾懸心○俟梁書作使

不畜音聲未薨少時敕賜太樂女妓一部略非所好○梁書無未薨二字又太作大

詔遣前交州刺史王奕○奕梁書作弁

唯信義去秋有稔○信義梁書作義興

爲英華集二十卷○梁書同應从南本改爲文章英華集二十卷

復還徐方之象也○還監本作遠

河東王譽傳譽曰各自軍府何忽疑人○疑梁書作隸

南康簡王績傳天監七年封南康郡王○七梁書作八

少府有南康國無名錢數千萬○梁書無少字

子又理傳大同八年封安樂縣侯○八監本誤三今改从閣本又安樂梁書作建安

邵陵攜王綸傳以西中郎將權攝南徐州事○徐梁書作竟又云中大同元年出爲統東將軍南徐州刺

史本書不載殆彼此互訛也

恆遣心腹馬容戴子高戴瓜李澈趙智英等於路尋何智通於白馬巷逢之以槊刺之○梁書作令容戴子高於都巷刺殺之

綸遂與子躡等十餘人輕舟走武昌○躡梁書作確下文確傳確自臺城出卽在景左右旋欲手刃景爲賊所殺則確未嘗有走武昌事當以躡爲是

子確傳後徙封永安○安監本訛福今从梁書

武陵王紀傳震太陽門成字曰紹宗梁位唯武王解者以武陵王○解者以武陵王梁書作解者以爲武王者武陵王也較明

六月紀築連城攻絕鐵鎖○紀梁書作約誤也上文元帝命陸法和鎖江以斷峽遣劉棻共任約西赴下
文元帝復以謝答仁上赴所謂赴者皆赴法和也則此攻絕鐵鎖自當屬紀不當屬約矣

武陵王紀子圓正傳識者曰王敦祇花非佳事也○祇梁畫作杖

南史卷五十三考證

南史卷五十四

唐

李

延

壽

撰

列傳第四十四

梁簡文帝諸子

元帝諸子

簡文二十子王皇后生哀太子大器南郡王大連陳淑容生尋陽王大心左夫人生南海王大臨安陸王大春謝夫人生瀏陽公大雅張夫人生新興王大莊包昭華生西陽王大鈞范夫人生武寧王大威褚修華生建平王大球陳夫人生義安王大昕朱夫人生綬建王大摯其臨川王大款桂陽王大成汝南王大封樂良王大圖並不知母氏潘美人生皇子大訓早亡無封其餘不知不載

哀太子大器字仁宗簡文嫡長子也中大通三年封宣城郡王太清二年十月侯景寇建鄴敕太子爲臺內大都督三年五月簡文卽位六月癸酉立爲皇太子大寶二年八月景廢簡文將害太子時景黨稱景命召之太子方講老子將下牀而刑人掩至太子顏色不變徐曰久知此事嗟其晚耳刑者將以衣帶絞之太子曰此不能見殺乃指繫帳竿下繩命取絞之而絕時年二十八太子性寬和兼神用端凝在賊中每不屈意左右竊問其故答曰賊若未須見殺雖復陵傲呵叱其終不敢言若見害時至雖一日百拜無

益於死問者又曰官今憂逼而神貌怡然未喻此意答曰吾自度死必在賊前若諸叔外來平夷羯寇必前見殺然後就死若其遂開拓上流必先見殺後取富貴何能以無益之愁橫憂必死之命景之西上攜太子同行及敗歸舩往往相失所乘舩入樅陽浦舟中腹心並勸因此入北太子曰自國家喪敗志不圖生主上蒙塵盜忍違離吾今若去乃是叛父非謂避賊天下豈有無父之國便涕泗嗚咽命卽前進賊以太子有器度每憚之恐爲後患故先及禍承聖元年四月追諡哀太子祔太廟陰室

尋陽王大心字仁恕簡文第二子也幼而聰朗善屬文中大通四年以皇孫封當陽縣公大同元年爲都督郢州刺史時年十三簡文以其幼戒之曰事無大小悉委行事大心雖不親州務發言每合於理衆皆驚服太清元年爲雲麾將軍江州刺史貪冒財賄不能綏接百姓二年侯景寇都大心招集士卒與上流諸軍赴援宮闕三年臺城陷上甲侯蕭韶南奔宣密詔加散騎常侍進號平南將軍大寶元年封尋陽王初歷陽太守莊鐵以城降侯景旣而又奉其母來奔大心以鐵舊將厚爲其禮軍旅之事悉以委之以爲豫章內史景數遣軍西上寇抄大心輒令鐵擊破之禽其將趙加婁賊不能進時鄱陽王範率衆棄合肥屯于柵口待援兵總集欲俱進大心聞之遣要範西上以益城處之廩饋甚厚欲與戮力共除禍難會鐵據豫章反大心令中兵叅軍章約討之鐵敗乞降鄱陽世子嗣先與鐵善乃謂範曰昔與鐵游處其人才

略從橫若降江州必不全其首領請援之乃遣將侯瑛救鐵夜破韋約等營大心大懼於是二蕃覺起景將任約略地至益城大心遣司馬韋質拒戰敗績時帳下猶有勇士千餘人咸說曰既無糧儲難以守固若輕騎往建州以圖後舉策之上也其母陳淑容不從撫髀慟哭大心乃止遂與約和二年將遇害遠牀謂賊廂公王僧貴曰我以全州歸命何忍相苦乃見射而殞

臨川王大款字仁師簡文第三子也初封石城縣公位中書侍郎太清三年簡文卽位封江夏郡王大寶元年奔江陵湘東王承制改封臨川王魏尅江陵遇害

南海王大臨字仁宣簡文帝第四子也大同二年封靈國縣公少而敏慧年十一遭左夫人憂哭泣毀府以孝聞後入國學明經射策甲科拜中書侍郎遷給事黃門侍郎十一年長兼侍中出爲琅邪彭城二郡太守侯景亂屯端門都督城南諸軍事大寶元年封南海郡王出爲都督東揚州刺史又除吳郡太守時張彪起義於會稽吳人陸令公潁川庾孟卿等勸大臨投之大臨曰彪若成功不藉我力如其撓敗以我說焉不可往也二年遇害

南郡王大連字仁靖簡文第五子也少俊爽能屬文舉止風流雅有巧思妙達音樂兼善丹青大同二年封臨城縣公七年與南海王俱入國學並射策甲科皆拜中書侍郎十年武帝幸朱方大連與兄大臨並

從武帝問曰汝等習騎不對曰臣等未奉詔不敢輒習敕令給馬試之大連兄弟據鞍往還各得馳驟之節帝大悅卽賜所乘馬及爲啟謝辭又甚美帝他日謂簡文曰昨見大臨大連風韻可愛足慰吾老年遷給事黃門侍郎轉侍中太清元年出爲東揚州刺史侯景入寇建鄴大連率衆四萬來赴及臺城沒援軍散還東揚州會稽豐沃糧仗山積東人懲景苛虐咸樂爲用而大連恆沉湎于酒宋子仙攻之大連棄城走追及於信安縣大連猶醉弗之覺於是三吳悉爲賊有大寶元年封南郡王賊遣將趙伯超劉神茂來攻大連專委部將留異以城應賊大連棄走爲賊所獲侯景以爲江州刺史二年遇害

安陸王大春字仁經簡文第六子也少博涉書記善吹笙天性孝謹體貌瓌偉腰帶十圍大同六年封西豐縣侯拜中書侍郎後爲靈遠將軍知石頭戍軍事侯景內寇大春奔京口隨邵陵王入援戰于鍾山軍敗肥大不能行爲賊所獲大寶元年封安陸郡王出爲東揚州刺史二年遇害

桂陽王大成字仁和簡文第八子也初封新塗公太清三年簡文卽位封山陽郡王大寶元年奔江陵湘東王承制改封桂陽王大成性甚兇獷兼便弓馬至江陵披甲夜出人謂爲劫斫之遂失左髀魏剋江陵

遇害

汝南王大封字仁觀簡文第九子也初封臨汝公太清二年簡文卽位封宜都郡王大寶元年奔江陵湘

東王承制封汝南王魏越江陵遇害

瀾陽公大雅字仁風簡文第十二子也大同九年封瀾陽縣公少聰警美姿儀特爲武帝所愛臺城陷大雅猶命左右格戰賊至漸衆乃自縊而下發憤感疾薨

新興王大莊字仁禮簡文第十三子也性躁動大同元年封高唐縣公大寶元年封新興郡王位南徐州刺史二年遇害

西陽王大鈞字仁博簡文第十四子也性厚重不妄戲弄年七歲武帝嘗問讀何書對曰學詩因令諷誦卽誦周南音韻清雅帝重之因賜王羲之書一卷大寶元年封西陽郡王位丹陽尹二年監揚州遇害

武寧王大威字仁容簡文第十五子也美風儀眉目如畫大寶元年封武寧郡王二年爲丹陽尹遇害
皇子大訓字仁德簡文第十六子也少而脚疾不敢躡履太清三年未封而亡年十歲

建平王大球字仁玉簡文帝第十七子也大寶元年封建安郡王性明慧夙成初侯景圍臺城武帝素歸心釋教每發誓願恆云若有衆生應受諸苦衍身代當時大球年甫七歲聞而驚謂母曰官家尙爾兒安敢辭乃大時禮佛亦云凡有衆生應獲苦報悉大球代受其早慧如此二年遇害

義安王大昕字仁朗簡文帝第十八子也年四歲母陳夫人卒便哀毀有若成人晨夕涕泣眼爲之傷及

武帝崩大昕奉慰簡文嗚噎不自勝左右莫不掩泣大寶元年封義安郡王二年遇害

綏建王大孳字仁瑛簡文第十九子也幼雄壯有膽氣及臺城陷乃歎曰大丈夫會當滅虜屬妳媼掩其口曰勿妄言禍將及大孳笑曰禍至非由此大寶元年封二年遇害

樂良王大圖簡文第二十也大寶元年封後入周仕隋位內史侍郎

元帝諸子徐妃生忠壯世子方等王貴嬪生貞惠世子方諸始安王方略袁貴人生愍懷太子方矩夏貴妃生敬皇帝自餘不顯

忠壯世子方等字實相元帝長子也少聰敏有俊才善騎射尤長巧思性愛林泉特好散逸嘗著論曰人生處世如白駒過隙耳一壺之酒足以養性一簞之食足以怡形生在蒿蓬死葬溝壑瓦棺石椁何以異茲吾嘗夢爲魚因化爲鳥方其夢也何樂如之及其覺也何憂斯類良由吾之不及魚鳥者遠矣故魚鳥飛浮任其志性吾之進退恆在掌握舉首懼觸搖足恐墮若使吾終得與魚鳥同遊則去人間如脫屣耳初徐妃以嫉妬失寵方諸母王氏以冶容倖嬖及王夫人終元帝歸咎徐妃方等意不自安元帝聞之又惡方等方等益懼故述此論以申其志時武帝年高欲見諸王長子元帝遣方等方等欣然升舟冀免憂辱行至繇水遇侯景亂元帝召之方等啟曰昔申生不愛其死方等豈顧其生元帝省書歎息知無還意

乃配步騎一萬使援臺城賊每來攻方等必身當矢石城陷方等歸荊州收集士馬甚得衆和元帝始歎其能方等又勸修築城柵以備不虞既成樓雉相望周迴七十餘里元帝觀之甚悅入謂徐妃曰若更有一子如此吾復何憂徐妃不答垂泣而退元帝忿之因疏其穢行勝于大閹方等入見益以自危時河東王爲湘州刺史不受令方等求征之元帝謂曰汝有水厄深宜慎之拜爲都督令南討方等臨行謂所親曰吾此段出征必死無二死而獲所吾豈愛生及至麻溪軍敗溺死方等之死元帝聞之心喜不以爲戚後追思其才贈侍中中軍將軍揚州刺史諡忠壯世子并招魂以葬之方等注范曄後漢書未就所撰三十國春秋及篤靜子行於世元帝卽位改諡武烈世子封子莊爲永嘉王及魏尅江陵莊年甫七歲爲人家所匿後王琳迎送建鄴及敬帝立出質于齊敬帝太平二年陳武帝將受禪王琳請莊于齊以主梁嗣自益城濟江二月卽帝位于郢州年號天啟置百官王琳總其軍國明年莊爲陳人所敗其御史中丞劉仲威奉以奔壽陽遂入齊齊武平元年授特進開府儀同三司封梁王齊朝許以興復竟不果而齊亡莊在鄴飲氣而死

虞惠世子方諸字明智元帝第二子也幼聰警博學明老易善談玄風采清越特爲元帝所愛母王氏又有寵及方等敗後元帝謂曰不有所廢其何以興勿以汝兄爲念因拜中撫軍將軍以自副又出爲郢州

刺史鎮江夏以鮑泉爲行事時元帝遣徐文盛與侯景將任約相持方諸年十五重心未革恃文盛在近不恤軍政日與鮑泉誦酒爲樂侯景知之乃遣其將宋子仙從間道襲之百姓奔告方諸與鮑泉並不信曰文盛大軍在下虜安得來始命閉門賊已入城方諸方踞泉腹以五色毼辦其鬚子仙執方諸以歸王僧辯軍至蔡洲景遂害之元帝追諡貞惠世子

愍懷太子方矩字德規元帝第四子也少勤學美容止初封南安侯太清初累遷侍中中衛將軍元帝承制拜王太子改名元良承聖元年十一月丙子立爲皇太子及升儲位昵狎羣下好著微服嘗入朝公服中著碧絲布袴掘衣高元帝見之大怪遣尙書周弘正責之因使太子師弘正佗日弘正謁見元帝問曰太子比頗受卿導不對曰太子聖德乃未極日新幸無大過帝曰卿以我父子故未直言從容之間無失和嶠之對便有廢立計未及行而江陵喪亡遇害太子聰穎凶暴猜忍俱有元帝風敬帝承制追諡愍懷

太子

始安王方略元帝第十子貞惠世子母弟也母王氏王琳之次姊元帝卽位拜貴嬪次妹又爲良人並蒙寵幸方略益鍾愛侯景亂元帝結好于魏方略年數歲便遣入關元帝親送近畿執手歔歔旣而旋駕憶之賦詩曰如何吾幼子勝衣已別離十日無由宴千里送遠垂至長安卽得還贈遺甚厚江陵喪亡遇害

貴嬪良人並更誕子未出閣無封失名

論曰簡文提挈寇戎元帝崎嶇危亂諸子之備踐艱棘蓋時運之所鍾乎忠烈以幹蠱之材出冢嗣之任竟亦當年擯落通塞亦云命也哀哉

南史卷五十四

簡文二十子傳范夫人生武靈王大威○威一本作威今从梁書

建平王大球傳大寶元年封建安郡王○安梁書作平

義安王大昕傳大寶元年封義安郡王○年封二字監本誤寶云今改正

元帝諸子傳徐妃生忠壯世子方等○壯一本作烈今从梁書又下文袁貴人生感懷太子方矩梁書不載所生

貞惠世子方諸傳字明智○明智梁書作智相

史臣論忠烈以幹蠱之材○忠烈卽忠壯本傳元帝卽位改諡武烈世子故也

南史卷五十四考證

唐

李

延

壽

撰

列傳第四十五

王茂

曹景宗

席闔文

夏侯詳子夏魚弘

夔吉士瞻

蔡道恭

楊公則

鄧元起羅研李膺

張惠紹

馮道根

康綯

昌義之

王茂字休連一字茂先太原祁人也祖深北中郎司馬父天生宋末為列將剋司徒袁粲以勳歷位郡守

封上黃縣男茂年數歲為大父深所異常曰此吾家千里駒成門戶者必此兒也及長好讀兵書究其大

指性隱不交游身長八尺絜白美容儀齊武帝布衣時嘗見之歎曰王茂先年少堂堂如此必為公輔後

為臺郎累年不調亦知齊之將亡求為邊職久之為雍州長史襄陽太守梁武便以王佐許之事無大小

皆詢焉人或讚茂反帝弗之信讚者驟言之遣視其甲稍則蟲網焉乃誅言者或云茂與帝不睦帝諸腹

心並勸除之而茂少有驍名帝又惜其用曰將舉大事便害健將此非上策乃令腹心鄭紹叔往候之遇

其臥因問疾茂曰我病可耳紹叔曰都下殺害日甚使君家門塗炭今欲起義長史那猶臥茂因擲枕起

即褱褶隨紹叔入見武帝大喜下牀迎因結兄弟被推赤心遂得盡力發雍部遣茂為前驅鄧魯既平從

武帝東下爲軍鋒師次秣陵東昏遣大將王珍國盛兵朱雀門衆號二十萬及戰梁武軍引却茂下馬單刀直前外甥韋欣慶勇力絕人執鐵纏稍翼茂而進故大破之茂勳第一欣慶力也建康城平以茂爲護軍將軍遷侍中領軍將軍時東昏妃潘玉兒有國色武帝將留之以問茂茂曰亡齊者此物留之恐貽外議帝乃出之軍主田安啟求爲婦玉兒泣曰昔者見遇時主今豈下匹非類死而後已義不受辱及見縊絮美如生輿出尉吏俱行非禮乃以余妃賜茂亦潘之亞也羣盜之燒神虎門茂率所領應赴爲盜所射茂躍馬而進羣盜反走茂以不能式遇姦盜自表解職優詔不許加鎮軍將軍封望蔡縣公是歲江州刺史陳伯之叛茂出爲江州刺史南討之伯之奔魏時九江新經軍寇茂務農省役百姓安之四年魏攻漢中茂受詔西禦魏乃班師歷位侍中中衛將軍太子詹事車騎將軍開府儀同三司丹陽尹時天下無時武帝方敦文雅茂心頗怏怏侍宴醉後每見顏色武帝宥而不責進位司空茂性寬厚居官雖無美譽亦爲吏人所安居處方正在一室衣冠儼然雖僕妾莫見其惰容姿表瓌麗須眉如畫爲衆所瞻望徙驃騎將軍開府同三司之儀江州刺史在州不取奉獄無滯囚居處被服同於儒素薨于州武帝甚悼惜之詔贈太尉諡曰忠烈公初茂以元勳武帝賜鐘磬之樂茂在州夢鐘磬在格無故自墮心惡之及覺命奏樂旣成列鐘磬在格果無故編皆絕墮地茂謂長史江詮曰此樂天子所以惠勞臣也樂旣極矣能無憂乎

俄而病卒子貞秀嗣以居憂無禮爲有司所奏徙越州後詔留廣州與魏降人杜景欲襲州城長史蕭昂斬之

曹景宗字子震新野人也父欣之仕宋位徐州刺史景宗幼善騎射好畋獵常與少年數十人澤中逐鹿鹿每衆騎赴鹿鹿馬相亂景宗於衆中射之人皆懼中馬足應弦輒斃以此爲樂未弱冠欣之於新野遣出州以匹馬將數人於中路卒逢蠻賊數百圍之景宗帶百餘箭每箭殺蠻蠻遂散走因以膽勇聞頗愛史書每讀纓苴樂毅傳輒放卷歎息曰丈夫當如是少與州里張道門善道門車騎將軍敬兒少子也爲武陵太守敬兒誅道門於郡伏法親屬故吏莫敢收景宗自襄陽遣船到武陵收其屍迎遺殯葬鄉里以此義之仕齊以軍功累加游擊將軍建武四年隨太尉陳顯達北圍馬圈以奇兵二千破魏援中山王莸四萬人及剋馬圈顯達論功以景宗爲後景宗退無怨言魏孝文率衆大至顯達宵奔景宗導入山道故顯達父子獲全梁武爲雍州刺史景宗深自結附數請帝臨其宅時天下方亂帝亦厚加意焉表爲竟陵太守及帝起兵景宗聚衆并率五服內子弟三百人後軍遣親人杜思沖勸先迎南康王於襄陽卽位武帝不從及至竟陵以景宗爲軍鋒道次江寧東昏將李居士以重兵鎮新亭景宗被甲馳戰居士棄甲奔走景宗皆獲之又與王茂呂僧珍犄角破王珍國於大航景宗軍士皆桀黠無賴御道左右莫非富室沙

掠財物略奪子女景宗不能禁及武帝入頓西城嚴申號令然後稍息城平封湘西縣侯除鄧州刺史加都督天監元年改封竟陵縣侯景宗在州鬻貨聚斂於城南起宅長堤以東夏口以北開街列門東西數里而部曲殘橫部下厭之二年十月魏攻司州圍刺史蔡道恭城中負板而汲景宗望關門不出但擿軍游獵而已及司州城陷爲御史中丞任昉所奏帝以功臣不問微爲右衛將軍五年魏中山王英攻鍾離圍徐州刺史昌義之武帝詔景宗督衆軍援義之豫州刺史韋叡亦援焉而受景宗節度詔景宗頓道人洲待衆軍齊集俱進景宗欲專其功乃違敕而進遇暴風卒起頗有沉溺復還守先頓帝聞之曰此所以破賊也景宗不進蓋天意乎若孤軍獨往城不時立必見狼狽今得待軍同進始可大捷矣及韋叡至與景宗進頓邵陽洲立壘與魏城相去百餘步魏連戰不能却傷殺者十二自是魏軍不敢逼景宗等器甲精新魏人望而奪氣魏將楊大眼對橋北岸立城以通糧運每牧人過岸伐芻藁皆爲大眼所略景宗乃募勇敢士千餘人徑度大眼城南數里築壘親自舉築大眼來攻景宗破之因得壘成使別將趙草守之因謂爲趙草城自後恣芻牧馬大眼遣抄掠輒爲趙草所獲先是詔景宗等預裝高艦使與魏橋等爲火攻計令景宗與叡各攻一橋叡攻其南景宗攻其北六年三月因春水生淮水暴長六七尺叡還所督將馮道根李文釗裴邃韋寂等乘艦登岸擊魏洲上軍盡殲景宗使衆軍復鼓噪亂登諸城呼聲震天地

大眼於西岸燒營英自東岸棄城走諸壘相次土崩悉棄其器甲爭投水死淮水爲之不流景宗命軍主馬廣躡大眼至滅水上四十餘里伏屍相枕義之出逐英至洛口英以匹馬入梁城緣淮百餘里屍骸相藉虜五萬餘人收其軍糧器械山積牛馬驢騾不可勝計景宗乃搜所得生口萬餘人馬千匹遣獻捷先是早甚詔祈蔣帝神求雨十旬不降帝怒命載荻欲焚蔣廟并神影爾日開朗欲起火當神上忽有雲如繖倏忽驟雨如瀉臺中宮殿皆自振動帝懼馳詔追停少時還靜自此帝畏信遂深自踐阼以來未嘗躬自到廟於是備法駕將朝臣脩謁是時魏軍攻圍鍾離蔣帝神報敕必許扶助旣而無雨水長遂挫敵人亦神之力焉凱旋之後廟中人馬脚盡有泥濕當時並目覩焉景宗振旅凱入帝於華光殿宴飲連旬令左僕射沈約賦韻景宗不得韻意色不平啟求賦詩帝曰卿伎能甚多人才英拔何必止在一詩景宗已醉求作不已詔令約賦韻時韻已盡唯餘競病二字景宗便操筆斯須而成其辭曰去時兒女悲歸來笳鼓競借問行人何如霍去病帝歎不已約及朝賢驚嗟竟日詔令上左史於是進爵爲公拜侍中領軍將軍景宗爲人自恃尙勝每作書字有不解不以問人皆以意造雖公卿無所推唯以章叡年長且州里勝流特相敬重同宴御筵亦曲躬謙遜武帝以此嘉之景宗好內妓妾至數百窮極錦繡性躁動不能沉默出行常欲褰車帷幔左右輒諫以位望隆重人所具瞻不宜然景宗謂所親曰我昔在鄉里騎快馬如

龍與年少輩數十騎拓弓弦作霹靂聲箭如餓鴟叫平澤中逐麋數肋射之渴飲其血飢食其腎甜如甘露漿覺耳後生風鼻頭出火此樂使人忘死不知老之將至今來揚州作貴人動轉不得路行開車幔小人輒言不可閉置車中如三日新婦此邑邑使人氣盡爲人嗜酒好樂臘月於宅中使人作邪呼逐除穢往人家乞酒食本以爲戲而部下多剽輕因弄人婦女奪人財貨帝頗知之景宗懼乃止帝數宴見功臣共道故舊景宗酒後謬妄或誤稱下官帝故縱之以爲笑樂後爲江州刺史赴任卒於道贈雍州刺史開府儀同三司諡曰壯子皎嗣景宗齊永元初任竟陵郡其第九弟義宗年少未有位官居在雍州旣方伯之弟又是豪彊之門市邊富人姓向以見錢百萬欲婢義宗以妹適之義宗遣人送書竟陵詔景宗景宗題書後答曰買猶未得云何已賣義宗貪鏹遂成後隨武帝西下歷位梁秦二州刺史向家兄弟憑附曹氏位登列卿後義宗爲都督征穰城軍敗見獲於魏卒

席闡文安定臨涇人也孤貧涉獵書史齊初爲雍州刺史蕭赤斧中兵參軍由是與其子穎胄善復歷西中郎中兵參軍領城局梁武帝之將起兵闡文勸穎胄同焉仍遣客田祖恭私報帝并獻銀裝刀帝報以金如意和帝稱尊號爲衛尉卿穎胄暴卒州府騷擾闡文以和帝幼弱中流任重時始興王憺留鎮雍部乃與西朝羣臣迎憺總州事故賴以盜輯帝受禪除都官尙書封山陽伯出爲東陽太守在郡有能名冬

至悉放獄中囚依期而至改封湘西侯卒官諡曰威

夏侯詳字叔業譙郡譙人也年十六遭父艱居喪哀毀三年廬于墓側嘗有三足雀來集其廬戶衆咸異焉仕宋爲新汲令政有異績豫州刺史段佛榮班下境內爲屬城表轉中從事史仍遷別駕歷事八將州部稱之齊明帝爲刺史雅相器遇及輔政引詳及裴叔業日夜與語詳輒不酬帝以問叔業叔業以告詳詳曰不爲福始不爲禍先由此微有忤出爲征虜長史義陽太守及南康王爲荊州詳爲西中郎司馬新興太守梁武帝起兵長史蕭穎胄同創大舉慮詳不同以告柳忱忱曰易耳近詳求昏未之許令成昏而告之不憂立異於是以女適其子夔大事方建西臺以詳爲中領軍加散騎常侍南郡太守凡軍國大事穎胄多決於詳頃之穎胄卒梁武帝始興王憺留守襄陽詳乃遣使憺共參軍國遷侍中尙書右僕射尋授荊州刺史詳又固讓于憺天監元年徵爲侍中車騎將軍封盩都縣侯詳累讓乃更授右光祿大夫侍中如故給親信二十人改封豐城縣公三年遷湘州刺史詳善吏事在州四載爲百姓所稱州城南臨水有峻峯舊傳云刺史登此山輒代由是歷政莫敢至詳於其地起臺榭延僚屬以表損損之志後徵爲尙書左僕射金紫光祿大夫道病卒上爲素服舉哀贈開府儀同三司諡曰景子宣嗣

宣字世龍齊永元末父詳爲西中郎南康王司馬隨府鎮荊州宣留都下爲東昏聽政主帥及崔慧景作

亂竄以捍禦功除驍騎將軍及梁武起兵詳與長史蕭穎胄協同密遣迎竄竄乃齋宣德皇后令令南康王纂承大統建鄴平以竄爲尙書吏部郎俄遷侍中奉璽於帝天監六年累遷南郡太守父憂解職居喪盡禮廬于墓側遺財悉推諸弟八年起爲司州刺史領安陸太守服闋襲封豐城縣公居州甚有威惠爲邊人悅服歷都官尙書遷給事中右衛將軍累遷吳興太守在郡復有惠政吏人鬪其像立碑頌美焉普通五年爲中護軍六年大舉北侵先遣豫州刺史裴邃帥譙州刺史湛僧智等自南道攻壽陽未克而邃卒乃加竄使持節代邃與魏將河間王琛臨淮王彧等相拒頻戰尅捷尋敕班師合肥須堰成復進七年夏淮堰水盛壽陽城將沒武帝復遣北道軍元樹帥彭寶孫陳慶等稍進竄帥湛僧智魚弘張澄等通流清澗將入淮肥魏軍夾肥築城出竄後竄與僧智還襲破之進攻黎漿貞威將軍韋放自北道會焉兩軍旣合所向皆降凡降城五十二獲男女口七萬五千人詔以壽陽依前代置豫州合肥鎮改爲南豫州以竄爲豫南豫二州刺史加都督壽春久離兵荒百姓多流散竄輕刑薄賦務農省役頃之人戶充復卒于州鎮帝聞之卽日素服舉哀贈車騎將軍諡曰襄州人夏侯簡等表請爲竄立碑置祠詔許之竄美風儀寬厚有器量涉獵文史能專對宗人夏侯溢爲衡陽內史辭曰竄侍御坐帝謂竄曰夏侯溢於卿疏近竄答云是臣從弟帝知溢於竄已疏乃曰卿儻人如何不辯族從竄對曰臣聞服屬易疏所以不忍言族時

以爲能。竄歷六郡三州，不爲產業，祿賜所得，隨散親故。性儉率，居處服用充足而已，不事華侈。晚年頗好音樂，有妓妾十數人，並無被服姿容。每有客常隔簾奏之時，謂簾爲夏侯妓衣子，誼襲封豐城縣侯。

竄弟夔，字季龍，位大匠卿，累遷司州刺史，領安陸太守，帥壯武將軍裴之禮、直閣將軍任思祖出義陽道，攻平靜、穆陵、陰山三關。寇之時，譙州刺史湛僧智圍東豫州刺史元慶和於廣陵，入其郛。魏將元顯伯率軍赴授，僧智逆擊破之。夔自武陽出會僧智，斷魏軍歸路。慶和於內築柵自固，及夔至，遂請降。凡降男女口萬餘人。顯伯聞之夜遁，衆軍追虜二萬餘人，斬獲不可勝數。由是義陽北道遂與魏絕。及郢州刺史元願達降，詔改爲北司州，以夔爲刺史，兼督司州封保城縣侯。中大通六年，爲豫州刺史，加督豫州。積歲連兵，人頗失業。夔乃率軍人於蒼陵立堰，溉田千餘頃，歲收穀百餘萬石，以充儲備，兼贍貧人。境內賴之。夔兄竄先經此任，至是夔又居焉。兄弟並有恩惠於鄉里，百姓歌曰：我之有州，賴得夏侯；前兄後弟，布政優優。夔在州七年，遠近多附之，有部曲萬人，馬二千匹，並服習精彊，爲當時之盛。性奢豪，後房伎妾曳羅綺，飾金翠者百數，愛好人士，不以貴位自高。文武賓客常滿坐，時亦以此稱之。卒于州，諡曰桓子。譔，嗣官至太僕卿。譔弟譔少，竊險薄行，常停鄉里，領其父部曲爲州助防。刺史貞陽侯明引爲府長史，明被魏囚，復爲侯景長史。景反，譔前驅濟江，頓兵上林館，破邸第，及居人富室子女財貨盡略，有之明在州有四妾。章

於王阮並有國色明被魏囚其妾並還都第譚至破第納焉

魚弘襄陽人身長八尺白皙美姿容累從征討常爲軍鋒歷南譙盱台竟陵太守嘗謂人曰我爲郡有四盡水中魚鼈盡山中麋鹿盡田中米穀盡村里人庶盡丈夫生如輕塵棲弱草白駒之過隙人生但歡樂富貴在何時於是恣意酣賞侍妾百餘人不勝金翠服翫車馬皆第一時之驚絕有眠牀一張皆是感柏四面周匝無一有異通用銀鏤金花壽福兩重爲脚爲湘東王鎮西司馬述職西上道中乏食緣路採菱作菱米飯給所部弘度之所後人覓一菱不得又於窮洲之上捕得數百獼猴膊以爲脯以供酒食比及江陵資食復振逢敕迎瑞豫王令送像下都弘率部數百悉衣錦袍赫奕滿道頗爲人所慕塗經夏首李抗數其爲人抗舅元法僧聞之杖抗三百後爲新興永寧太守卒官

吉士瞻字梁容馮翊蓮勺人也少有志氣不事生業時徵士吳苞見其姿容勸以經學因誦鮑照詩云暨儒守一經未足識行藏拂衣不顧年逾四十忽忽不得志乃就江陵卜者王先生計祿命王生曰君擁旄杖節非一州後一年當得戎馬大郡及梁武起兵義陽太守王撫之天門太守王智遜武陵太守蕭彊等並不從命鎮軍蕭穎胄遣士瞻討平之齊和帝卽位以爲領軍司馬士瞻少時嘗於南蠻國中擲博無裨蹇露爲儕輩所侮及平魯休烈軍得絹三萬疋乃作百禪其外並賜軍士不以入室以軍功除輔國將軍

步兵校尉建康平爲巴東相建平太守初士瞻爲荆府城局參軍浚萬人仗庫防池得一金革鉤隱起鐵甚精巧篆文曰錫爾金鉤且公且侯士瞻娶夏侯詳兄女竊以與詳詳喜佩之及是革命詳果封侯而士瞻不錫茅土天監二年入爲直閣將軍歷位秦梁二州刺史加都督後爲太子右衛率又出爲西陽武昌二郡太守在郡清約家無私積始士瞻夢得一積鹿皮從而數之有十一領及覺喜曰鹿者祿也吾當居十一祿乎自其仕進所益已久及除二郡心惡之遇疾不肯療普通七年卒於郡贈左衛將軍謚曰胡子子琨時在戎役聞問一踊而絕良久乃蘇不顧軍制輒離所部遂以孝聞詔下旌異

蔡道恭字懷儉南陽冠軍人也父那宋益州刺史道恭少寬厚有大量仕齊爲西中郎中兵參軍加輔國將軍梁武帝起兵蕭穎胄以道恭素著威略專相委任齊和帝卽位爲右衛將軍出爲司州刺史梁天監初論功封漢壽縣伯進號平北將軍三年魏圍司州時城中衆不滿五千人食裁半歲魏軍攻之晝夜不息乃作大車載土四面俱前欲以填壘道恭壘內作艤幢鬪艦以待之魏人不得進又潛作伏道以決壘水道恭載土純塞之相持百餘日前後斬獲不可勝計魏大造梯衝攻圍日急道恭用四石烏漆大弓射所中皆洞甲飲羽一發或貫兩人敵人望弓皆靡又於城內作土山多作大稍長二丈五尺施長刃使壯士執以刺魏人魏軍甚憚之將退會道恭疾篤乃呼兄子僧總從弟靈恩及將率謂曰吾所苦勢不能久

汝等當以死固節無令吾沒有遺恨又令取所持節授僧總曰稟命出疆既不得奉以還朝方欲攜之同逝可與棺柩相隨衆皆流涕其年五月卒魏知道恭死攻之轉急先是朝廷遣郢州刺史曹景宗赴援景宗不前至八月城內糧盡魏尅之贈鎮西將軍并尋購喪槨八年魏許還道恭喪其家以女樂易之葬襄陽傳國至孫固早卒國除

楊公則字君翼天水西縣人也父仲懷爲宋豫州刺史殷琰將琰叛輔國將軍劉劭討琰仲懷力戰死於橫塘公則隨父在軍年未弱冠冒陣抱尸號哭氣絕良久勅命還仲懷首公則斂畢徒步負喪歸鄉里由此著名後梁州刺史范栢年板爲宋熙太守領白馬戍主時氏賊李烏奴攻白馬公則矢盡糧竭陷于寇抗聲罵賊烏奴壯之要與同事公則僞許而圖之謀泄軍馬逃歸齊高帝下詔褒美除晉壽太守在任清絮自守遷扶風太守母憂去官雍州刺史陳顯達起爲寧朔將軍復領太守頃之荊州刺史巴東王子鸞搆亂公則進討事平遷武寧太守百姓便之入爲前軍將軍和帝爲荊州刺史公則爲西中郎中兵參軍及蕭穎胄協同梁武以公則爲輔國將軍領西中郎諮議參軍率兵東下和帝卽位授湘州刺史梁武軍次沔口公則率湘府之衆會于夏口時荊州諸軍悉受公則節度雖蕭穎達宗室之貴亦隸焉郢城平武帝命衆軍卽日俱下公則受命先驅江州既定連旌東下直造建鄴公則號命嚴明秋豪不犯所在莫不

賴爲大軍至新林公則自越城移屯領軍府壘北樓與南掖門相對嘗登樓望戰城中遙見麾蓋縱神鋒
弩射之矢貫胡牀左右皆失色公則曰虜幾中吾脚談笑如初東昏夜選勇士攻公則柵軍中驚擾公則
堅臥不起徐命擊之東昏軍乃退公則所領多是湘溪人性懦怯城內輕之以爲易與每出盪輒先犯公
則壘公則獎厲軍士剋獲更多及城平內出者或被剝奪公則親率麾下陳東掖門衛送公卿士庶故
出者多由公則營焉進號左將軍還鎮南藩初公則東下湘部諸郡多未賓從及公則還州然後諸屯聚
並散天監元年進號平南將軍封盩都縣侯湘州寇亂累年人多流散公則輕刑薄斂頃之戶口充復爲
政雖無威嚴然勵己廉慎爲吏人所悅湘俗軍門多以賂求州職公則至皆斷之所辟皆州郡著姓武帝
班下諸州以爲法四年徵中護軍代至乘二舸便發送故一無所取遷衛尉卿時朝廷始議北侵公則威
名素著至都詔假節先屯洛口公則受命將發遘疾謂親人曰昔廉頗馬援以年老見遺猶自力請用今
國家不以吾朽懦任以前驅方於古人見知重矣雖臨塗疾苦豈可僂俛辭事馬革還葬此吾志也遂疆
起登舟至洛口壽春士女歸降者數千戶魏豫州刺史薛恭度遣長史石榮等前鋒接戰卽斬石榮遂北
至壽春去城數十里而返疾篤卒于師武帝深痛惜之卽日舉哀諡烈侯公則爲人敦厚慈愛居家篤睦
視兄子過於己子家財悉委焉性好學雖居軍放手不輟卷士大夫以此稱之子暕嗣有罪國除帝以公

則勳臣特聽庶長子眺嗣眺固讓歷年乃受

鄧元起字仲居南郡當陽人也少有膽幹性任俠仕齊爲武寧太守梁武起兵蕭穎胄與書招之卽日上道率衆與武帝會于夏口齊和帝卽位拜廣州刺史中興元年爲益州刺史仍爲前軍建康城平進號征虜將軍天監初封爲當陽縣侯始述職焉初梁武之起益州刺史劉季連持兩端及聞元起至遂發兵拒守元起至巴西巴西太守朱士略開門以待先時蜀人多逃亡至是競出投元起皆稱起義應朝廷元起在道久軍糧乏絕或說之曰蜀郡政慢若檢巴西二郡籍注因而罰之所獲必厚元起然之潛令李膺諫曰使君前有嚴敵後無繼援山人始附於我觀德若糾以刻薄人必不堪衆心一離雖悔無及膺請出圖之不患資糧不足也元起曰善一以委卿膺退率富人上軍資米俄得三萬斛元起進屯西平季連始嬰城自守時益州兵亂旣久人廢耕農內外苦饑人多相食道路斷絕季連計窮會明年武帝使赦季連罪許之降季連卽日開城納元起元起送季連于建康元起以鄉人庾黔婁爲錄事參軍又得荊州刺史蕭遙欣故客蔣光濟並厚待之任以州事黔婁甚清潔光濟多計謀並勸爲善政元起之克季連也城內財寶無所私勤恤人事口不論財色性能飲酒至一斛不亂及是絕之爲蜀土所稱元起舅子梁矜孫性輕脫與庾黔婁志行不同乃言於元起曰城中稱有三刺史節下何以堪之元起由此疎黔婁而政迹稍損

在政二年以母老乞歸供養詔許焉徵爲右衛將軍以西昌侯蕭藻代之時梁州長史夏侯道遷以南鄉叛引魏將王景胤孔陵攻東西晉壽並遣告急衆勸元起急救之元起曰朝廷萬里軍不卒至若寇賊侵淫方須撲討董督之任非我而誰何事忽便相催督黔婁等苦諫之皆不從武帝亦假元起節征討諸軍將救漢中比是魏已攻剋兩晉壽蕭藻將至元起頗營還裝糧儲器械略無遺者蕭藻入城求其良馬元起曰年少郎子何用馬爲藻恚醉而殺之元起麾下圍城哭且問其故藻懼曰天子有詔衆乃散遂譴以反帝疑焉有司追劾削爵土詔減邑之半封松滋縣侯故吏廣漢羅研詣闕訟之帝曰果如我所量也使讓藻曰元起爲汝報讐汝爲讐報讐忠孝之道如何乃貶藻號爲冠軍將軍贈元起征西將軍給鼓吹諡忠侯

羅研字深微少有才辯元起平蜀辟爲主簿後爲信安令故事置觀農謁者園桑度田勞擾百姓研請除其弊帝從之鄱陽忠烈王恢臨蜀聞其名請爲別駕及西昌侯藻重爲刺史州人爲之懼研舉止自若侯謂曰非我無以容卿非卿無以事我齊荀兒之役臨汝侯嘲之曰卿蜀人樂禍貪亂一至於此對曰蜀中積弊實非一朝百家爲村不過數家有貧窮迫之人什有八九束縛之使旬有三貪亂樂禍無足多怪若令家畜五母之雞一母之豕牀上有百錢布被甌中有數升麥飯雖蘇張巧說於前韓白按劍於後將

不能使一夫爲盜況貪亂乎大通二年爲散騎侍郎嗣王範將西忠烈王恢謂曰吾昔在蜀每事委羅研汝遵而勿失範至復以爲別駕升堂拜母蜀人榮之數年卒官蜀士以文達者唯研與同郡李膺

膺字公膺有才辯西昌侯藻爲益州以爲主簿使至都武帝悅之謂曰今李膺何如昔李膺對曰今勝昔問其故對曰昔事桓靈之主今逢堯舜之君帝嘉其對以如意擊席者久之乃以爲益州別駕著益州記三卷行於世初元起在荊州刺史隨王板元起爲從事別駕庾華堅執不可元起恨之及大軍至都華在城內甚懼城平而元起先遣迎華語人曰庾別駕若爲亂兵所殺我無以自明因厚遺之少時又嘗至其西沮田舍有沙門造之乞元起有稻幾二千斛悉以施之時人稱其二者有大度元起初爲益州過江陵迎其母母事道方居館不肯出元起拜請同行母曰汝貧賤家兒忽得富貴詎可久保我寧死此不能與汝共入禍敗及至巴東聞蜀亂使蔣光濟筮之遇蹇喟然歎曰吾豈鄧艾而及此乎後果如筮子鏗嗣張惠紹字德繼義陽人也少有武幹仕齊爲竟陵橫桑戍主母喪歸鄉里聞梁武帝起兵乃自歸累有戰功武帝踐阼封石陽縣侯位驍騎將軍直閣左細仗主時東昏餘黨數百人竊入南北掖門夜燒神虎門害衛尉張弘策惠紹馳率所領赴戰賊乃散走遷太子右衛率以軍功累增爵邑歷位衛尉卿左衛將軍司州刺史領安陸太守在州和理吏人親愛之徵還爲左衛將軍加通直散騎常侍仗甲百人直衛殿中

卒諡曰忠子登嗣累有戰功與湛僧智胡紹世角弘並為當時驍將歷官衛尉太子左衛率卒官諡曰
愨

馮道根字巨基廣平鄆人也少孤家貧傭賃以養母行得甘肥未嘗先食必遽還以遺母年十三以孝聞
郡召為主簿不就曰吾當使封侯廟食安能為儒吏邪年十六鄉人蔡道班為湖陽戍主攻蠻錫城反為
蠻困道根救之匹馬轉戰提雙劍左右奮擊殺傷甚多道班以兔由是知名齊建武末魏孝文攻陷南陽
等五郡明帝遣太尉陳顯達爭之師入均口道根說顯達曰均口水急不如悉棄船於鄆城方道步進
顯達不聽道根猶以私屬從軍及顯達敗夜走賴道根指路以全尋為均口戍副以母喪還家聞梁武
帝起兵乃謂所親曰金革奪禮古人不避揚名後世豈非孝乎因率鄉人歸武帝隸於王茂常為前鋒武
帝卽位為驍騎將軍封增城縣男天監二年為南梁太守領阜陵城戍初到阜陵修城隍遠斥候如敵將
至者眾頗笑之道根曰怯防勇戰此之謂也修城未畢魏將党法宗傳豎眼率眾二萬奄至城下道根壘
壘未固城中眾少莫不失色道根命開城門緩服登城選精銳二百人出與魏軍戰敗之魏軍因退還輔
國將軍六年魏攻鍾離武帝詔豫州刺史韋叡救之道根為叡前驅至徐州建計據邵陽洲築壘掘堙逼
魏城道根能走馬步地計馬足以賦功城隍立辨及淮水長道根乘戰艦斷魏連橋魏軍敗績進爵為伯

改封豫寧縣八年拜豫州刺史領汝陰太守爲政清簡境內安之累遷右衛將軍道根性謹厚木訥少言爲將能檢御部曲所過村陌將士不敢虜掠每征伐終不言功其部曲或怨非之道根喻曰明主自鑒功之多少吾將何事武帝嘗指道根示尙書令沈約美其口不論勳約曰此陛下之大樹將軍也歷處州郡和理清靜爲下所懷在朝廷雖貴顯而性儉約所居宅不修墻屋無器服侍衛入室則蕭然如素士之貧賤者當世服其清退武帝亦雅重之微時不學旣貴粗讀書自謂少文常慕周勃之器量十六年復爲豫州將行武帝引朝臣宴別道根於武德殿召畫工使圖其形道根踧踖謝曰臣所可報國家唯餘一死但天下太平恨無可死之地豫部重得道根人皆喜悅武帝每稱曰馮道根所在能使朝廷不復憶有一州居州少時遇疾乞還朝廷徵爲散騎常侍左軍將軍卒于官是日輿駕春祠二廟及出宮有司以聞帝問中書舍人朱异曰吉凶同日今可行乎對曰昔柳莊寢疾衛獻公當祭請尸曰有臣柳莊非寡人之臣社稷之臣也聞其死請往不釋祭服而往遂以禴之道根雖未爲社稷臣亦有勞王室臨之禮也帝卽駕幸其宅哭之甚慟諡曰威子懷嗣

康絢字長明華山藍田人也其先出自康居初漢置都護盡臣西域康居亦遣侍子待詔河西因留不去其後遂氏爲晉時隴右亂遷于藍田絢曾祖因爲苻堅太子詹事生穆穆爲姚萇河南尹宋永初中穆率

鄉族三千餘家入襄陽之峴南宋爲置華山郡藍田縣寄立於襄陽以穆爲秦梁二州刺史未拜卒絢伯元隆父元撫並爲流人所推相繼爲華山太守絢少儻有志氣仕齊爲華山太守推誠撫循荒餘悅服梁武起兵絢舉郡以應天監元年封南陽縣男除竟陵太守累遷太子左衛率甲仗百人與領軍蕭景直殿內絢身長八尺容貌絕倫雖居顯職猶習武藝帝幸德陽殿戲馬敕絢馬射撫弦貫的觀者悅之其日上使畫工圖絢形遣中使持以問絢曰卿識此圖不其見親如此時魏降人王足陳計求堰淮水以灌壽陽足引北方童謠曰荆山爲上格浮山爲下格潼沓爲激溝併灌鉅野澤帝以爲然使水工陳承伯材官將軍祖暉視地形咸爲淮內沙土漂輕不堅實其功不可就帝弗納發徐揚人率二十戶取五丁以築之假絢節都督淮上諸軍事并護堰作役人及戰士有衆二十萬於鍾離南起浮山北抵嶠石依岸築土合脊於中流十四年四月堰將合淮水漂疾復決潰衆患之或謂江淮多蛟能乘風雨決壞崖岸其性惡鐵因是引東西二冶鐵器大則釜高小則鍤鋤數千萬斤沉於堰所猶不能合乃伐樹爲幹填以巨石加土其上緣淮百里內岡陵木石無巨細必盡負擔者肩穿夏日疾疫死者相枕蠅蟲晝夜聲合武帝愍之遣尙書右僕射袁昂侍中謝舉假節慰勞并加蠲復是冬寒甚淮泗盡凍士卒死者十七八帝遣賜以衣袴十一月魏遣將楊大眼揚聲決堰絢命諸軍撤營露次以待之遣其子悅挑戰斬魏咸陽王府司馬徐方

興魏軍小却十五年四月堰成其長九里下闊一百四十丈上廣四十五丈高二十丈深十九丈五尺夾之以堤并樹杞柳軍人安堵列居其上其水清絮俯視邑居墳墓了然皆在其下或謂絢曰四瀆天所以節宣其氣不可久塞若鑿湫東注則游波寬緩堰得不壞絢然之開湫東注又縱反間於魏曰梁所懼開湫魏人信之果鑿山深五丈開湫北注水日夜分流湫猶不減其月魏軍竟潰而歸水之所及夾淮方數百里地魏壽陽城戍稍徙頓八公山此南居人散就岡壘初堰起徐州界刺史張豹子謂己必尸其事既而絢以佗官求監作豹子甚慙由是譖絢與魏交通帝雖不納猶以事畢徵絢尋除司州刺史領安陸太守絢還徵豹子不脩堰至其秋淮水暴長堰壞奔流于海殺數萬人其聲若雷聞三百里水中怪物隨流而下或人頭魚身或龍形馬首殊類詭狀不可勝名祖暅坐下獄絢在州三年大修城隍號爲嚴整普通元年除衛尉卿未拜卒輿駕卽日臨哭諡曰莊絢寬和少喜懼在朝廷見人如不能言號爲長厚在省每寒見省官有縑纒者輒遺遺以縑衣其好施如此子悅嗣

昌義之歷陽烏江人也少有武幹爲馮翊戍主梁武帝爲雍州因事帝帝亦厚遇之及起兵板爲輔國將軍軍主每戰必捷天監元年封永豐侯累遷北徐州刺史鎮鍾離四年大舉北侵臨川王宏督衆軍向洛口義之爲前軍攻魏梁城戍尅之五年冬武帝以征役久詔班師魏中山王元英乘勢追躡攻沒馬頭等

城城內糧肥魏悉移歸北議者咸謂無復南向帝曰此必進兵非其實也乃遣脩鍾離城敕義之爲戰守備是冬英果率衆數十萬圍鍾離衝車毀西墉時城中衆纔三千義之督帥隨方抗禦前後殺傷萬計魏軍死者與城平六年帝遣曹景宗韋叡率衆二十萬救焉大破魏軍義之率輕兵追至洛口而還以功進號軍師將軍再遷都督南兗州刺史坐以禁物出蕃爲有司所奏免十三年累遷左衛將軍是冬帝遣太子右衛率康絢督衆軍作荆山堰魏將李曇定大衆逼荆山揚聲決堰詔假義之節救絢軍未至絢等已破魏軍魏又遣大將軍李平攻硤石義之又率朱衣直閤王神念救之魏克硤石義之班師爲有司所奏帝以其功臣不閤十五年授北徐州刺史義之不知書所識不過十字性寬厚爲將能得人死力及居藩任吏人安之改封營道縣侯徵爲護軍將軍卒於官帝深痛惜之諡曰烈子寶景嗣

論曰永元之季雖時主昏狂荆雍二州尙未有釁武皇迹緣家酷首唱孟津之師王茂等運接昌期自致勤王之舉若非天人啟期豈得若斯之速乎其隆名顯級亦各風雲之感會也元起勤乃胥附切惟闢土勞之不圖禍機先陷冠軍之貶於罰已輕梁之政刑於斯爲失私戚之端自斯而啟年之不承不亦宜乎張惠紹馮道根康絢昌義之攀附之始其功則未及羣盜焚門張以力戰自著鍾離邵陽之逼馮昌勞劾居多浮山之役而康絢實典其事互有厥勞寵進宜矣先是鎮星守天江而堰實興退會而決豈人事乎

其天道也

南史卷五十五

南史卷五十五考證

王茂傳字休連○連梁書作遠

好讀兵書究其大旨○兵書下梁書有駁略二字

曹景宗傳每箭殺蠻蠻遂敗走○殺字下梁書有一字

義之出逐英至洛口○義之昌義之也洛梁書作浴誤

夏侯竄傳武帝復遣北道軍元樹帥彭寶孫陳慶等稍進○慶字下梁書有之字

竄對曰臣聞服屬易疏所以不忍言族○顧炎武云書以親九族注同族高祖以下是也非疏遠之謂漢

書張敞傳廣川王同族宗室劉調等同族言其與王近親也顏氏家訓凡宗親世數有從父有從祖有

族祖此云不忍言族當時雖爲敏對於理未通

竄弟夔傳不以貴位自高○高監本誤事今改正

魚弘傳通用銀鏤金花壽福兩重○兩監本訛爾今改正

羅研傳鄱陽忠烈王恢臨蜀聞其名請爲別駕○請監本誤謂今改正

史臣論其功則未○未梁書作輕今各本俱同姑仍其舊

南史卷五十五考證

唐

李

延

壽

撰

列傳第四十六

張弘策

子細

撰

庾域

子子興

鄭紹叔

呂僧珍

樂藹

子法才

張弘策字真簡范陽方城人梁文獻皇后之從父弟也父安之青州主簿南蠻行參軍弘策幼以孝聞母嘗有疾五日不食弘策亦不食母彊為進粥弘策乃食母所餘遭母憂三年不食鹽菜幾至滅性兄弟友愛不忍暫離雖各有室常同臥起世比之姜肱兄弟弘策與梁武帝年相輩幼見親狎恆隨帝游處每入室常覺有雲氣體輒肅然弘策由此特加敬異建武末與兄弘胄從武帝宿酒酣移席星下語及時事帝曰天下方亂舅知之乎冬下魏軍方動則亡漢北王敬則猜嫌已久當乘間而作弘策曰敬則張兩赤眼容能立事帝曰敬則庸才為天下唱先爾主上運祚盡於來年國權當歸江劉而江甚隘劉又閹弱都下當大亂死人如亂麻齊之祿數自茲亡矣梁楚漢當有英雄興弘策曰瞻烏爰止于誰之屋帝笑曰光武所云安知非僕弘策起曰今夜之言是天意也請定君臣之分帝曰舅欲敦鄧晨乎是冬魏軍攻新野齊明帝密詔武帝代曹武監雍州事弘策聞之心喜謂帝曰夜中言當驗帝笑曰且勿多言弘策從帝西行

仍參帷幄身親勞役不憚辛苦齊明帝崩遺詔以帝爲雍州刺史乃表弘策爲錄事參軍帶襄陽令帝觀海內方亂有匡濟之心密爲儲備謀猷所及唯弘策而已時帝長兄懿罷益州還爲西中郎長史行郢州事帝使弘策到郢陳計於懿曰昔晉惠庸主諸王爭權遂內難九興外寇三作方今喪亂有甚於此六貴爭權人握王憲制主畫勅各欲專成且嗣主在宮本無令譽媒近左右蜂目忍人一居萬機恣其所欲豈肯虛坐主諾委政朝臣積相嫌貳必大誅戮始安欲爲趙倫形迹已露蹇人上天信無此理且性甚猜狹徒取禍機所可當軸江劉而已祗怯而無斷臆弱而不才折鼎覆餗跂踵可待蕭坦曾懷猜忌動言相傷徐孝嗣才非柱石聽人穿鼻若隙開釁起必中外土崩今得外藩幸圖身計及今猜防未生宜召諸弟以時聚集郢州控帶荆湘西注漢沔雍州士馬呼吸數萬時安則竭誠本朝時亂則爲國剪暴如不早圖悔無及也懿聞之變色心未之許及懿遇禍帝將起兵夜召弘策呂僧珍入定議旦乃發兵以弘策爲輔國將軍主領萬人督後部事及郢城平蕭穎達楊公則諸將皆欲頓軍夏口帝以爲宜乘勢長驅直指建鄴弘策與帝意合又訪盜朔將軍庾域域又同卽日上道凡磯浦村落軍行宿次立頓處所弘策預爲圖皆在目中城平帝遣弘策與呂僧珍先往清宮封檢府庫于時城內珍寶委積弘策申勒部曲秋毫無犯遷衛尉卿加給事中天監初加散騎常侍封洮陽縣侯弘策盡忠奉上知無不爲交友故舊隨才薦拔縉紳

皆趨焉時東昏餘黨孫文明等初逢赦令多未自安文明又嘗夢乘馬至雲龍門心感其夢遂作亂帥數百人因運荻炬束仗得入南北掖門至夜燒神獸門總章觀入衛尉府弘策踰垣匿于龍廡遇賊見害賊又進燒尚書省及閣道雲龍門前軍司馬呂僧珍直殿省帥羽林兵邀擊不能却上戎服御前殿謂僧珍曰賊夜來是衆少曉則走矣命打五鼓賊謂已曉乃散官軍捕文明斬于東市張氏親屬饗食之帝哭之慟曰痛哉衛尉天下事當復與誰論詔贈車騎將軍諡曰閔侯弘策爲人寬厚通率篤舊故及居隆重不以貴地自高故人賓客接之如布衣祿賜皆散之親友及遇害莫不痛惜焉子緬嗣

緬字元長年數歲外祖中山劉仲德異之曰此兒非常器非止爲張氏寶方爲海內令名也齊永元末兵起弘策從武帝向都留緬襄陽年始十歲每聞軍有勝負憂喜形於顏色及弘策遇害緬喪過于禮武帝每遣喻之服闋襲封洮陽縣侯起家祕書郎出爲淮南太守時年十八武帝疑其年少未閑吏事遣主書封取郡曹文案見其斷決允愜甚稱賞之再遷雲麾外兵參軍緬少勤學自課讀書手不輟卷有質疑者隨問便對略無遺失殿中郎缺帝謂徐勉曰此曹舊用文學且鴈行之首宜詳擇其人勉舉緬充選頃之爲武陵太守還拜太子洗馬中舍人緬母劉氏以父沒家貧葬禮有闕遂終身不居正室不隨子入官府緬在郡所得俸祿不敢用至乃妻子不易衣裳及還都並供之母振遺親屬雖累載所蓄一朝隨盡緬私

室常圓然如貧素者累遷豫章內史緬爲政任恩惠不設鉤距吏人化其德亦不敢欺故老咸云數十年未有也後爲御史中丞坐收捕人與外國使鬪左降黃門兼領先職俄復舊任緬居憲司推繩無所顧望號爲勁直武帝乃遣圖其形於臺省以勵當官遷侍中未拜卒詔便舉哀昭明太子亦往臨哭緬抄後漢晉書抄三十卷又抄江左集未及成文集三卷緬弟纘

纘字伯緒出繼從伯弘籍武帝舅也梁初贈廷尉卿纘年十一尙武帝第四女宮陽公主拜駙馬都尉封利亭侯召補國子生起家祕書郎時年十七身長七尺四寸眉目疎朗神采爽發武帝異之嘗曰張壯武云後八世有逮吾者其此子乎纘好學兄緬有書萬餘卷晝夜披讀殆不輟手祕書郎四員宋齊以來爲甲族起家之選待次入補其居職例不數十日便遷任纘固求不徙欲遍觀閣內書籍帝執四部書目曰君讀此畢可言優仕矣如此三載方遷太子舍人轉洗馬中舍人並掌管記纘與琅邪王錫齊名普通初魏使彭城人劉善明通和求識纘與錫纘時年二十三善明見而嗟服累遷尙書吏部郎俄而長兼侍中時人以爲早達河東裴子野曰張吏部有喉唇之任已恨其晚矣子野性曠達自云年出三十不復詣人初未與纘遇便虛相推重因爲忘年之交大通中爲吳興太守居郡省煩苛務清靜人吏便之大同二年徵爲吏部尙書後門寒素一介者皆見引拔不爲貴門屈意人士翕然稱之負其才氣無所與讓定襄侯

無學術頗有文性與兄衡山侯恭俱爲皇太子愛賞時纘從兄謚聿並不學問性又凡愚恭祗嘗預東宮盛集太子戲纘曰丈人謚聿皆何在纘從容曰纘有謚聿亦殿下之衡定太子色慙或云纘從兄聿及彌愚短湘東王在坐問纘曰丈人二從聿彌藝業何如纘曰下官從弟雖並無多猶賢殿下之有衡定舉坐愕然其忤物如此五年武帝詔曰纘外氏英華朝中領袖司空已後名冠范陽可尙書僕射纘本寒門以外戚顯重高自擬論而詔有司空范陽之言深用爲狹以朱异草詔與异不平初纘與參掌何敬容意趨不協敬容居權軸賓客輻湊有過詣纘纘輒距不前曰吾不能對何敬容殘客及是遷爲讓表曰自出守股肱入居衡尺可以仰首伸肩論列是非者矣而寸衿所滯近蔽耳目深淺清濁豈有能預加以矯心飾貌酷非所閑不喜俗人與之共事此言以指敬容也在職議南郊御乘素輦適古今之衷又議印綬官若備朝服宜並著綬時並施行改爲湘州刺史述職經塗作南征賦初吳興吳規頗有才學邵陵王綸引爲賓客深相禮遇及綸作牧郢蕃規隨從江夏遇纘出之湘鎮路經郢服綸餞之南浦纘見規在坐意不能平忽舉盃曰吳規此酒慶汝得陪今宴規尋起還其子翁孺見父不悅問而知之翁孺因氣結爾夜便卒規恨纘慟兒憤哭兼至信次之間又致殞規妻深痛夫子翌日又亡時人謂張纘一盃酒殺吳氏三人其輕傲皆此類也至州務公平遣十郡慰勞解放老疾吏役及關市戍邏先所防人一皆省併州界零陵

衡陽等郡有莫徭蠻者依山險爲居歷政不賓服因此向化益陽縣人作田二頃皆異畝同穎在政四年
流人自歸戶口增十餘萬州境大寧晚頗好積聚多寫圖書數萬卷有油二百斛米四千石佻物稱是太
清二年徙授領軍俄改雍州刺史初聞邵陵王綸當代己爲湘州其後更用河東王譽纘素輕少王州府
候迎及資待甚薄譽深銜之及至州譽遂託疾不見纘仍檢括州府付度事留纘不遣會聞侯景寇建邺
譽當下援湘東王時鎮江陵與纘有舊纘將因之以斃譽兄弟時湘東王與譽及信州刺史桂陽王曄各
率所領入援臺下破至江津譽次江口湘東王屆鄧州之武城關侯景已請和武帝詔罷援軍譽自江口
將旋湘鎮欲待湘東至謁督府方暹州纘乃貽湘東書曰河東戴檣上水欲襲江陵岳陽在雍共謀不逞
江陵遊軍主朱榮又遣使報云桂陽住此欲應譽督湘東信之乃覆船沉米斬纘而歸至江陵收愷殺之
荆湘因構嫌隙纘尋棄其部曲攜其二女單舸赴江陵湘東遣使責讓譽索纘部下仍遣纘向雍州前刺
州岳陽王督推遷未去鎮但以城西白馬寺處之會聞賊陷臺城督因不受代州助防杜岸給纘曰觀岳
陽不容使君使君素得物情若走入西山舉義事無不濟纘以爲然因與岸兄弟盟乃要雍州人席引等
於西山聚衆乃服婦人衣乘青布輿與親信十餘人奔引等杜岸馳告督督令中兵參軍尹正等追討纘
以爲赴期大喜及至並禽之纘懼不免請爲沙門名法緒督襲江陵常載纘隨後逼使爲檄固辭以疾及

軍退敗行至澧水南防守纘者慮追兵至遂害之棄尸而去元帝承制贈開府儀同三司謚簡憲公元帝少時纘便推誠委結及帝卽位追思之嘗謂詩序云簡憲之爲人也不事王侯負才任氣見余則申旦違夕不能已已懷夫人之德何日忘之纘著鴻寶一百卷文集二十卷初纘之往雍州資產悉留江陵性旣貪婪南中貲賄填積及死湘東王皆使收之書二萬卷並撻還齊珍寶貨物悉付庫以綜密之屬還其家次子希字子顏早知名尙簡文第九女海鹽公主承聖初位侍中纘弟綰

綰字孝卿少與兄纘齊名湘東王釋嘗策之百事綰對闕其六號爲百六公位員外散騎常侍中軍宣城王長史遷御史中丞武帝遣其弟中書舍人綯宣旨曰爲國之急唯在執憲直繩用人之本不限升降晉宋時周閔蔡廓兼以侍中爲之卿勿疑是左遷時宣城王府望重故有此旨焉大同四年元日舊制僕射中丞坐位東西時當綰兄纘爲僕射及百司就列兄弟並導騶分騶兩塗前代未有時人榮之出爲豫章內史在郡述制旨禮記正言義四姓衣冠士子聽者常數百人八年安成人劉敬宮挾祚道遂聚黨攻郡進寇豫州刺史湘東王遣司馬王僧辯討賊受綰節度旬月間賊黨悉平十年復爲御史中丞綰再爲憲司鞫糾無所回避豪右憚之時城西開士林館聚學者綰與右衛朱昇太府卿賀琛遞述制旨禮記中庸義太清三年爲吏部尙書宮城陷奔江陵位尙書右僕射魏尅江陵朝士皆俘入關綰以疾免卒於江陵

次子交字少游尚簡文第十一女定陽公主承聖二年官至祕書丞掌東宮管記

庚域字司大新野人也少沉靜有名鄉曲梁文帝爲鄧州辟爲主簿歎美其才曰荆南杞梓其在斯乎加以恩禮長沙宣武王爲梁州以爲錄事參軍帶華陽太守時魏軍攻圍南鄭州有空倉數十所域手自封題指示將士曰此中粟皆滿足支二年但努力堅守衆心以安軍退以功拜羽林監及長沙王爲益州域隨爲懷遠太守罷任還家妻子猶事井臼而域所衣大布餘俸專充供養母好鶴唳域在位營求孜孜不怠一旦雙鶴來下論者以爲孝感所致永元初南康王板西中郎諮議參軍母憂去職梁武帝舉兵起爲遠朔將軍領行選武帝東下師次楊口和帝遣御史中丞宗夬勞軍域乃諷夬曰黃鉞未加非所以總率侯伯夬反西臺卽授武帝黃鉞蕭穎胄旣都督中外諸軍事論者謂武帝應致賤域爭不聽乃止郢城平城及張弘策議與武帝意同卽命衆軍便下域謀多被納用霸府初開爲諮議參軍天監初封廣牧縣子後軍司馬出爲遠朔將軍巴西梓潼二郡太守梁州長史夏侯遷降魏襲巴西城固守城中糧盡將士皆齧草食土無有離心魏軍退進爵爲伯于時兵後人飢域上表振貸不待報輒開倉爲有司所糾上遷域西中郎司馬輔國將軍遠朔太守卒于官子子與

子與字孝卿幼而岐嶷五歲讀孝經手不釋卷或曰此書文句不多何用自苦答曰孝德之本何謂不多

齊永明末除州主簿時父在梁州遇疾子輿奔侍醫藥言淚恆并長沙宣武王省疾見之顧曰庾錄事雖危殆可憂更在子輿尋丁母憂哀至輒嘔血父戒以滅性乃禁其哭泣梁初爲尚書郎天監三年父出守巴西子輿以蜀路險難啟求侍從以孝養獲許父遷寧蜀子輿亦相隨父於路感心疾每至必叫子輿亦悶絕及父卒哀慟將絕者再奉喪還鄉秋水猶壯巴東有淫預石高出二十許丈及秋至則纔如見焉次有瞿塘大灘行侶忌之郤伍至此石猶不見子輿撫心長叫其夜五更水忽退滅安流南下及度水復瞿行人爲之語曰淫預如幘本不通瞿塘水退爲庾公初發蜀有雙鳩巢舟中及至又栖廬側每聞哭泣之聲必飛翔簷宇悲鳴激切欲爲父立佛寺未有定處夢有僧謂曰將修勝業嶺南原卽可營造明往履歷果見標度處所有若人功因立精舍居墓所以終喪服闋手足枯孿待人而起仍布衣蔬食志守墳墓叔該爲曰汝若固志吾亦抽簪於是始仕雖以嫡長襲爵國秩盡推諸弟累遷兼中郎司馬大通二年除巴陵內史便道之官路中遇疾或勸上郡就醫子輿曰吾疾患危重全濟理難豈可貪官陳尸公廩因勒門生不得輒入城市卽於渚次卒遺令單衣衾履以斂酒脯施靈而已

鄭紹叔字仲明滎陽開封人也累世居壽陽祖琨宋高平太守紹叔年二十餘爲安豐令有能名後爲本州中從事史時刺史蕭誕弟諶被誅臺遣收誕兵使卒至左右驚散紹叔獨馳赴焉誕死侍送喪柩衆咸

稱之到都司空徐孝嗣見而異之曰祖述之流也梁武帝臨司州命爲中兵參軍領長流因是厚自結附
帝罷州還都謝道賓客紹叔獨固請願留帝曰卿才幸自有我今未能相益宜更思佗塗固不許於是
乃還壽陽刺史蕭遙昌苦要引紹叔終不受命遙昌將囚之鄉人救解得免及帝爲雍州紹叔問道西歸
補靈巒長史扶風太守東昏旣害朝宰頗疑于帝紹叔兄植爲東昏直後東昏遣徐雍州託候紹叔潛使
爲刺客紹叔知之密白帝及植至帝於紹叔處置酒宴之戲植曰朝廷遣卿見圖今日閑宴是見取良會
也賓主大笑令植登城隍周觀府署士卒器械舟艦戎馬莫不富實植退謂紹叔曰雍州實力未易圖也
紹叔曰兄還具爲天子言之兄若取雍州紹叔請以此衆一戰送兄於南峴相持慟哭而別續復遣主帥
杜伯符亦欲爲刺客詐言作使上亦密知宴接如常伯符懼不敢發上後卽位作五百字詩具及之初起
兵紹叔爲冠軍將軍改驍騎將軍從東下江州平留紹叔監州事曰昔蕭何鎮關中漢祖得成山東之業
寇恂守河內光武建河北之基今之九江昔之河內我故留卿以爲羽翼前途不捷我當其咎糧運不繼
卿任其責紹叔流涕拜辭於是督江湘糧運無闕乏天監初入爲衛尉卿紹叔少孤貧事母及祖母以孝
聞奉兄恭謹及居顯要糧賜所得及四方遺餉悉歸之兄室忠於事上所聞纖毫無隱每爲帝言事善則
曰臣愚不及此皆聖主之策不善則曰臣智慮淺短以爲其事當如是殆以此誤朝廷也臣之罪深矣帝

甚親信之母憂去職紹叔有至性帝常使人節其哭頃之封營道縣侯復爲衛尉卿以營道縣戶凋弊改封東興縣侯三年魏圍合肥紹叔以本號督衆軍鎮東關事平復爲衛尉既而義陽入魏司州移鎮關南以紹叔爲司州刺史紹叔至創立城隍繕兵積穀流人百姓安之性頗矜躁以權勢自居然能傾心接物多所舉薦士亦以此歸之徵爲左衛將軍至家疾篤詔於宅拜授輿載還府中使醫藥一日數至卒於府舍帝將臨其殯紹叔宅巷陋不容輿駕乃止詔贈散騎常侍護軍將軍諡曰忠紹叔卒後帝嘗潸然謂朝臣曰鄭紹叔立志忠烈善必稱君過則歸己當今殆無其比見賞惜如此子貞嗣

呂僧珍字元瑜東海范陽人也世居廣陵家甚寒微童兒時從師學有相工歷觀諸生指僧珍曰此兒有奇聲封侯相也事梁文帝爲門下書佐身長七尺七寸容貌甚偉曹輩皆敬之文帝爲豫州刺史以爲典籤帶蒙令帝遷領軍將軍補主簿祇賊唐寓之寇東陽文帝率衆東討使僧珍知行軍衆局事僧珍宅在建陽門東自受命當行每日由建陽門道不過私室文帝益以此知之司空陳顯達出軍河北見而呼坐謂曰卿有貴相後當不見滅深自努力建武二年魏軍南攻五道竝進武帝帥師援義陽僧珍從在軍中時長沙宣武王爲梁州刺史魏軍圍守連月義陽與雍州路斷武帝欲遣使至襄陽求梁州問衆莫敢行僧珍固請充使卽日單舸上道及至襄陽督遣援軍且獲宣武王書而反武帝甚嘉之東昏卽位司空徐

孝嗣管朝政欲要僧珍與共事僧珍知不久當敗竟弗往武帝臨雍州僧珍固求西歸得補功令及至武帝命爲中兵參軍委以心膂僧珍陰養死士歸之者甚衆武帝頗招武猛士庶響從會者萬餘人因命按行城西空地將起數千間屋爲止舍多伐材竹沉於檀溪積茅蓋若山阜皆未之用僧珍獨悟其指因私具櫓數百張及兵起悉取檀溪材竹裝爲船艦葺之以茅並立辦衆軍將發諸將須櫓甚多僧珍乃出先所具每船付二張爭者乃息武帝以僧珍爲輔國將軍步兵校尉出入臥內宣通意旨大軍次江寧武帝使僧珍與王茂率精兵先登赤鼻邏其日東昏將李居士來戰僧珍等大破之乃與茂茂進白板橋壘立茂移帳越城僧珍守白板李居士知城中衆少直來薄城僧珍謂將士曰今力不敵不可戰亦勿遙射須至壘裏當并力破之俄而皆越壘僧珍分人上城自率馬步三百人出其後內外齊擊居士等應時奔散及武帝受禪爲冠軍將軍前軍司馬封平固縣侯再遷左衛將軍加散騎常侍入直祕書省總知宿衛天監四年大舉北侵自是僧珍畫直中省夜還祕書五年旋軍以本官領太子中庶子僧珍去家久表求拜墓武帝欲榮以本州乃拜南兖州刺史僧珍在任見士大夫迎送過禮平心率下不私親戚兄弟皆在外堂並不得坐指客位謂曰此兖州刺史坐非呂僧珍牀及別室促膝如故從父兄子先以販葱爲業僧珍至乃棄業求州官僧珍曰吾荷國重恩無以報効汝等自有常分豈可妄求叨越當速反葱肆耳僧珍舊宅

在市北前有督郵廨鄉人咸勸徙廨以益其宅僧珍怒曰豈可徙官廨以益吾私宅乎姊適于氏住市西小屋臨路與列肆雜僧珍常導從鹵簿到其宅不以為恥在州百日徵為領軍將軍直祕書省如先常以私車輦水灑御路僧珍既有大勳任總心膺性甚恭慎當直禁中盛暑不敢解衣每侍御坐屏氣鞠躬對果食未嘗舉箸因醉後取一甘食武帝笑謂曰卿今日便是大有所進祿俸外又月給錢十萬其餘賜賚不絕於時初武帝起兵攻郢州久不下咸欲走北僧珍獨不肯累日乃見從一夜僧珍忽頭痛壯熱及明而顛骨益大其骨法蓋有異焉十年疾病車駕臨幸中使醫藥日有數四僧珍語親舊曰吾昔在蒙縣熱病發黃時必謂不濟主上見語卿有富貴相必當不死俄而果愈吾今已富貴而復發黃所苦與昔政同必不復起竟如言卒于領軍官舍武帝即日臨殯贈驃騎將軍開府儀同三司諡曰忠敬武帝痛惜之言為流涕子淡嗣初宋季雅罷南康郡市宅居僧珍宅側僧珍問宅價曰一千一百萬怪其貴季雅曰一百萬買宅千萬買隣及僧珍生子季雅往賀署函曰錢一千闕人少之弗為通強之乃進僧珍疑其故親自發乃金錢也遂言於帝陳其才能以為壯武將軍衡州刺史將行謂所親曰不可以負呂公在州大有政

樂藹字蔚遠南陽滎陽人晉尚書令廣之六世孫也家居江陵方頤隆準舉動醜藉其舅雍州刺史宗憲

嘗陳器物試諸甥姪藹時尙幼而無所取慤由此奇之又取史傳各一卷授藹等使讀畢言所記藹略讀具舉慤益善之齊豫章王疑爲荊州刺史以藹爲驃騎行參軍領州主簿參知州事疑嘗問藹城隍風俗山川險易藹隨問立對若案圖牒疑益重焉州人嫉之或譖藹糜門如市疑遣覘之方見藹閉閣讀書後爲大司馬記室永明八年荊州刺史巴東王子響稱兵反及敗焚燒府舍官曹文書一時蕩盡齊武帝見藹問以西事藹占對詳敏帝悅用爲荊州中從事勅付以脩復府州事藹還州繕脩糜署數百區頃之咸畢豫章王疑薨藹解官赴喪率荆湘二州故吏建碑墓所南康王爲西中郎以藹爲諮議參軍蕭穎胄引藹及宗夬劉坦任以經略天監初累遷御史中丞初藹發江陵無故於船得八車輻如中丞健步避道者至是果遷焉性公彊居憲臺甚稱職時長沙宣武王將葬而車府忽於庫火油絡欲推主者藹曰昔晉武庫火張華以爲積油久灰必然今庫若灰非吏罪也旣而檢之果有積灰時稱其博物弘恕二年出爲平越中郎將廣州刺史前刺史徐元瑜罷歸遇始興人士反逐內史崔睦舒因掠元瑜財產元瑜走歸廣州借兵於藹託欲討賊而實謀襲藹藹覺誅之尋卒於官藹姊適徵士同郡劉蚪亦明識有禮訓藹爲州迎婦居官舍三分祿秩以供焉西土稱之子法才

法才字元備幼與弟法藏俱有美名沈約見之曰法才實才子爲建康令不受奉秩比去將至百金縣曹

啟輸臺庫武帝嘉其清節曰居職若斯可以爲百城表矣遷太舟卿尋除南康內史恥以讓奉受名辭不拜歷位少府卿江夏太守因被代表求便道還鄉至家割宅爲寺棲心物表尋卒法藏位征西錄事參軍早亡子子雲美容貌善舉止位江陵令承制除光祿卿魏尅江陵衆奔散呼子雲子雲曰終爲虜矣不如守以死節遂仆地卒於馬蹄之下

論曰張弘策惇厚慎密首預帝圖其位遇之隆豈徒外戚云爾至如太清板蕩親屬離離不能叶和蕃岳克濟陶冶之功而苟懷私怨以成釁隙之首風格若此而爲梁之亂階惜乎庾域鄭紹叔呂僧珍等或忠誠亮蓋或恪勤匪解締構王業皆有力焉僧珍之肅恭禁省紹叔之勤誠靡貳蓋有人臣之節矣鷲雖異帷幄之勳亦讚雲雷之業其當官任事寵秩不亦宜乎

南史卷五十六

南史卷五十六考證

張綱傳俄復舊任○舊任閣本作爲眞

張纘傳帝執四部書目曰君讀此畢可言優仕矣○梁書帝作常君作若

以綜密之屬還其家○密閣本作蜜應改从之

張綰傳太清三年爲吏部尙書○三梁書作二

呂僧珍傳姊適于氏○于一本作于

因醉後取一柑食○甘監本誤升梁書嘗因醉後取一柑食之應改从之

樂纘傳張華以爲積油久灰必然○久灰閣本作萬匹又注云匹一作石

史臣論克濟陶冶之功○陶冶梁書作温陶應改从之

南史卷五十六考證

唐

李

延

壽

撰

列傳第四十七

沈約子旋 孫衆 范雲 從兄續

沈約字休文吳興武康人也昔金天氏有裔子曰昧為玄冥師生子允格臺駘臺駘能業其官宣汾洮障大澤以處太原帝顓頊嘉之封諸汾川其後四國沈妣孳黃沈子國今汝南平輿沈亭是也春秋之時列於盟會魯昭四年晉使蔡滅沈其後因國為氏自茲以降譜牒罔存秦末有沈暹徵丞相不就漢初暹會孫保封竹邑侯保子遵自本國遷居九江之壽春官至齊王太傅封敷德侯遵生驃騎將軍達達生尙書令乾乾生南陽太守弘弘生河內太守勗勗生御史中丞奮奮生將作大匠恪恪生尙書關內侯謙謙生濟陽太守靖靖生戎戎字威卿仕為州從事說降劇賊尹良漢光武嘉其功封為海昏縣侯辭不受因避地徙居會稽烏程縣之餘不鄉遂家焉順帝永建元年分會稽為吳郡復為吳郡人靈帝初平五年分烏程餘杭為永安縣吳孫皓寶鼎二年分吳郡為吳興郡晉太康三年改永安為武康縣復為吳興武康人為雖邦邑屢改而築室不遷戎子鄆字聖通任零陵太守致黃龍芝草之瑞第二子仲高安平相少子景

河間相演之慶之曇慶懷文其後也仲高子鸞字建光少有高名州舉茂才公府辟州別駕從事史時廣陵太守陸稠鸞之舅也以義烈政績顯名漢朝復以女妻鸞早卒子直字伯平州舉茂才亦有清名卒子瑜儀俱少有至行瑜十歲儀九歲而父亡居喪毀瘠過於成人外祖會稽盛孝章漢末名士也深加憂傷每撫慰之曰汝並黃中英爽終成奇器何遽逾制自取殄滅邪三年禮畢殆至滅性故兄弟並以孝著瑜早卒儀字仲則篤學有雅才以儒素自業時海內大亂兵革並起經術廢弛士少全行而儀瀟深隱默守道不移風操貞整不妄交納唯與族子仲山叔山及吳郡陸公紀友善州郡禮請二府交辟公車徵並不屈以壽終子曼字元禪左中郎新都尉定陽侯才志顯於吳朝子矯字仲桓以節氣立名仕爲立武校尉偏將軍孫皓時有將帥之稱吳平爲鬱林長沙二太守不就太康末卒子陵字景高晉元帝之爲鎮東將軍命參軍事子延字思長潁川太守始居縣東鄉之博陸里餘烏村延子賀字子盪桓沖南中郎參軍賀子警字世明惇篤有行業學通左氏春秋家產累千金後將軍謝安命爲參軍甚相敬重警內足於財爲東南豪士無進任意謝病歸安固留不止乃謂曰沈參軍卿有獨善之志不亦高乎警曰使君以道御物前所以懷德而至旣無用佐時故遂飲啄之願爾還家積載以素業自娛前將軍王恭鎮京口與警有舊好復引爲參軍手書殷勤苦相招致不得已而應之尋復謝去子穆夫字彥和少好學通左氏春秋王

恭命爲前將軍主簿謂警曰足下旣執不拔之志高臥東南故屈賢子共事非吏職嬰之也初錢唐杜
吳字子恭通靈有道術東土豪家及都下貴望並事之爲弟子執在三之敬警累世事道亦敬事子恭子
恭死門徒孫泰泰弟子恩傳其業警復事之隆安三年恩於會稽作亂自稱征東將軍三吳皆響應穆夫
在會稽恩以爲餘姚令及恩爲劉牢之所破穆夫見害先是穆夫宗人沈預與穆夫父警不協至是皆警
及穆夫弟仲夫任夫預夫佩夫並遇害唯穆夫子深子雲子田子林子虔子獲全田子林子知名田子宇
敬光從武帝尅京城進平建鄴參鎮軍事封營道縣五等侯帝北伐廣固田子領偏師與龍驤將軍孟龍
符爲前鋒龍符戰沒田子力戰破之及盧循逼都帝遣田子與建威將軍孫季高海道襲破廣州還除太
尉參軍淮陵內史賜爵都鄉侯義熙八年從討劉毅十年從討司馬休之除振武將軍扶風太守十二年
武帝北伐田子與順陽太守傅弘之各領別軍從武關入屯據青泥姚泓將自禦大軍慮田子襲其後欲
先平田子然後傾國東出乃率步騎數萬奄至青泥田子本爲疑兵所領裁數百欲擊之傅弘之曰彼衆
我寡難可與敵田子曰師貴用奇不必在衆弘猶固執田子曰衆寡相傾勢不兩立若使賊圍旣固人情
喪沮事便去矣及其未整薄之必尅所謂先人有奪人之志也便獨率所領鼓譟而進賊合圍數重田子
乃棄糧毀舍躬勒士卒前後奮擊賊衆一時潰散所殺萬餘人得泓僞乘輿服御武帝表言其狀長安旣

平武帝譙于文昌殿舉酒賜田子曰咸陽之平卿之功也卽以咸陽相賞卽授咸陽始平二郡太守大軍
既還桂陽公義真留鎮長安以田子爲安西中兵參軍龍驤將軍始平太守時赫連勃勃來寇田子與安
西司馬王鎮惡俱出北地禦之初武帝將還田子及傅弘之等並以鎮惡家在關中不可保信屢言之帝
曰今留卿文武將士精兵萬人彼若欲爲不善政足自滅耳勿復多言及俱出北地論者謂鎮惡欲盡殺
諸南人以數十人送義真南還因據關中反叛田子乃於弘之營內請鎮惡計事使宗人敬仁於坐殺之
率左右數十人自歸義真長史王脩收殺田子於長安橐倉門外是歲十四年正月十五日也武帝表天
子以田子卒發狂易不深罪也林子字敬士少有大度年數歲隨王父在京口王恭見而奇之曰此兒王
子師之澤也嘗與衆人共見遺寶咸爭趨之林子直去不顧年十三遇家禍旣門陷祆黨兄弟並應從諒
而沈預家甚彊富志相陷滅林子兄弟沉伏山澤無所投厝會孫恩屢出會稽武帝致討林子乃自歸陳
情率老弱歸罪請命因流涕哽咽三軍爲之感動帝甚奇之乃載以別船遂盡室移京口帝分宅給焉林
子博覽衆書留心文義從尅京城進平都邑時年十八身長七尺五寸沈預慮林子爲害常被甲持戈至
是林子與兄田子還東報讐五月夏節日至預政大集會子弟盈堂林子兄弟挺身直入斬預首男女無
論長幼悉屠之以預首祭父祖墓及帝爲揚州辟爲從事領建熙令封資中縣五等侯從伐慕容超平盧

循並著軍功後從征劉毅參太尉軍事復從討司馬休之武帝每征討林子輒摧鋒居前時賊黨郭亮之招集蠻晉屯據武陵武陵太守王鎮惡出奔林子率軍討之斬亮之於七里湖而納鎮惡武陵既平復討魯軌於石城軌棄衆走襄陽復追躡之襄陽既定權留守江陵武帝伐姚泓復參征西軍事加建武將軍統軍爲前鋒從汴入河僞并州刺史河東太守尹昭據蒲坂林子於陝城與冠軍檀道濟同攻蒲坂龍驤王鎮惡攻潼關姚泓聞大軍至遣僞東平公姚紹爭據潼關林子謂道濟曰潼關天阻所謂形勝之地鎮惡孤軍勢危力屈若使姚紹據之則難圖也及其未至當并力爭之若潼關事捷尹昭可不戰而服道濟從之及至紹舉關右之衆設重圍圍林子及道濟鎮惡等道濟議欲度河避其鋒或欲棄捐輜重遁赴武帝林子按劍曰下官今日之事自爲將軍辦之然二三君子或同業艱難或荷恩罔極以此退撓亦何以見相公旗鼓邪塞并焚舍示無全志率麾下數百人犯其西北紹衆小靡乘其亂而薄之紹乃大潰俘虜以千數悉獲紹器械資實時諸將破賊皆多其首級而林子獻捷書至每以實聞武帝問其故林子曰夫王者之師本有征無戰豈可復增張虜獲以示誇誕昔魏尙以盈級受罰此亦後乘之良轍也武帝曰乃所望於卿也初紹退走還保定城留僞武衛將軍姚鸞精兵守嶮林子銜枚夜襲卽屠其城劓鸞而坑其衆紹復遣撫軍將軍姚讚將兵屯河上林子連破之紹又遣長史姚伯子等屯據九泉憑河固險以絕糧

援武帝復遣林子累戰大破之卽斬伯子所俘獲悉以還紹使知王師之弘紹志節沉勇林子每戰輒勝白武帝曰姚紹氣蓋關右而力以勢屈但恐凶命先盡不得以毀齊斧爾尋紹疽發背死武帝以林子之驗乃賜書嘉美之於是讚統後軍復襲林子林子禦之連戰皆捷帝至闕鄉姚泓掃境內兵屯嶢柳時田子自武關北入屯軍藍田泓自率大眾攻之帝慮眾寡不敵遣林子步自秦嶺以相接援比至泓已破走田子欲窮追進取長安林子止之曰往取長安如指掌爾復剋賊城便爲獨平一國不賞之功也田子乃止林子威震關中豪右望風請附帝以林子田子綏略有方頻賜書褒美并令深慰納之長安旣平姚氏十餘萬口西奔隴上林子追討至寡婦水轉鬪至槐里大軍東歸林子領水軍於石門以爲聲援還至彭城帝令林子差次勦勸隨才授用文帝出鎮荊州議以林子及謝晦爲蕃佐帝曰吾不可頓無二人林子行則晦不宜出乃以林子爲西中郎中兵參軍領新興太守林子以行役久士有歸心乃深陳事宜并言聖王所以戒慎祗肅非以崇威立武寔乃經國長毗宜廣建蕃屏崇巖宿衛武帝深相訓納俄而謝翼謀反帝歎曰林子之見何其明也文帝進號鎮西隨府轉加建威將軍河東太守時武帝以方隅未靜復欲親戎林子固諫帝答曰吾輒當不復自行帝踐阼以佐命功封漢壽縣伯固讓不許永初三年卒追贈征虜將軍元嘉二十五年諡曰懷少子璞嗣璞字道真童孺時神意閑審文帝召見奇璞應對謂林子曰此

非常兒也初除南平王左常侍文帝引見謂之曰吾昔以弱年出蕃卿家以親要見輔今日之授意在不薄王家之事一以相委勿以國官乖清塗爲罔罔也元嘉十七年始興王濬爲揚州刺史寵愛殊異以爲主簿時順陽范曄爲長史行州事曄性頗疎文帝謂曄曰范曄性疎必多不同卿腹心所寄當密以在意彼行事其實卿也曄以任遇既深所懷輒以密啟每至施行必從中出曄政謂聖明留察故深更恭慎而莫見其際也在職八年神州大盜又無謗曄有力焉二十二年范曄坐事誅時濬雖曰親覽州事一以付曄濬年既長曄固求辭事以曄爲濬始興國大農累遷淮南太守三十年元凶弒立曄以奉迎之晚見殺有子曰約其制自序大略如此約十三而遭家難濬寬會赦乃免既而流寓孤貧篤志好學晝夜不釋卷毋恐其以勞生疾常遣減油滅火而晝之所讀夜輒誦之遂博通羣籍善屬文濟陽蔡興宗聞其才而善之及爲鄧州引爲安西外兵參軍兼記室興宗常謂其諸子曰沈記室人倫師表宜善事之及爲荊州又爲征西記室帶關西合齊初爲征虜記室帶襄陽令所奉主卽齊文惠太子太子入居東宮爲步兵校尉管書記直承壽省校四部圖書時東宮多士約特被親遇每旦入見景斜方出時王侯到宮或不得進約每以爲言太子曰吾平生嬾起是卿所悉得卿談論然後忘寢卿欲我夙興可恆早入遷太子家令後爲司徒右長史黃門侍郎時竟陵王招士約與蘭陵蕭琛琅邪王融陳郡謝朓南郡范雲樂安任飭等皆

游焉當世號爲得人隆昌元年除吏部郎出爲東陽太守齊明帝卽位徵爲五兵尙書遷國子祭酒明帝崩政歸冢宰尙書令徐孝嗣使約撰定遺詔永元中復爲司徒左長史進號征虜將軍南河清太守初梁武在西邸與約游舊建康城平引爲驃騎司馬時帝勳業旣就天人允屬約嘗扣其端帝默然而不應俄日又進曰今與古異不可以淳風期萬物士大夫攀龍附鳳者皆望有尺寸之功以保其福祿今童兒牧豎悉知齊祚之終且天文人事表革運之徵永元以來尤爲彰著識云行中水作天子此又歷然在記天心不可違人情不可失帝曰吾方思之約曰公初起兵樊沔此時應思今日王業已就何所復思昔武王伐紂始入人便曰吾君武王不違人意亦無所思公自至京邑已移氣序比於周武遲速不同若不早定大業稽天人之望脫一人立異便損威德且人非金石時事難保豈可以建安之封遺之子孫若天子還都公卿在位則君臣分定無復異圖君明於上臣忠於下豈復有人方更同公作賊帝然之約出召范雲告之雲對略同約旨帝曰智者乃爾暗同卿明早將休文更來雲出語約約曰卿必待我雲許諾而約先期入帝令草其事約乃出懷中詔書并諸選置帝初無所改俄而雲自外來至殿門不得入徘徊避光闕外但云咄咄約出雲問曰何以見處約舉手向左雲笑曰不乖所望有頃帝召雲謂曰生平與沈休文羣居不覺有異人處今日才智縱橫可謂明識雲曰公今知約不異約今知公帝曰我起兵於今三年矣功

臣諱將寔有其勞然成帝業者乃卿一人也梁臺建爲散騎常侍吏部尚書兼右僕射及受禪爲尚書僕射封建昌縣侯又拜約母謝爲建昌國太夫人奉策之日吏部尚書范雲等二十餘人咸來致拜朝野以爲榮俄遷右僕射天監二年遭母憂輿駕親出臨弔以約年衰不宜致毀遣中書舍人斷客節哭起爲鎮軍將軍丹陽尹置佐史服闋遷侍中右光祿大夫領太子詹事奏尚書八條事遷尚書令累表陳讓改授左僕射領中書令尋遷尚書令領太子少傅九年轉左光祿大夫初約久處端揆有志台司論者咸謂爲宜而帝終不用乃求外出又不見許與徐勉素善遂以書陳情於勉言已老病百日數旬革帶常應移孔以手握臂率計月小半分欲謝事求歸老之秩勉爲言於帝請三司之儀弗許但加鼓吹而已約性不飲酒少嗜慾雖時遇隆重而居處儉素立宅東田疇望郊阜常爲郊居賦以序其事尋加特進遷中軍將軍丹陽尹侍中特進如故十二年卒官年七十三謚曰隱約左目重瞳子腰有紫志聰明過人好墳籍聚書至二萬卷都下無比少孤貧約于宗黨得米數百斛爲宗人所侮覆米而去及貴不以爲憾用爲郡部傅嘗侍宴有妓婢帥是齊文惠宮人帝問識坐中客不曰唯識沈家令約伏地流涕帝亦悲焉爲之罷酒約歷仕三代該悉舊章博物洽聞當世取則謝玄暉善爲詩任彥昇工於筆約兼而有之然不能過也自負高才昧於榮利乘時射勢頗累清談及居端揆稍弘止足每進一官輒殷勤請退而終不能去論者方之

山濤用事十餘年未常有所薦達政之得失唯唯而已初武帝有憾於張穆及卒因與約言之約曰左僕射出則邊州刺史已往之事何足復論帝以爲約昏家相爲怒約曰卿言如此是忠臣邪乃輦歸內殿約懼不覺帝起猶坐如初及還未至牀憑空頓於戶下因病夢齊和帝劍斷其舌召巫視之巫言如夢乃呼道士奏赤章於天稱禪代之事不由己出先此約嘗侍宴會豫州獻粟徑寸半帝奇之問粟事多少與約各疏所憶少帝三事約出謂人曰此公護前不讓卽羞死帝以其言不遜欲抵其罪徐勉固諫乃止及疾上遣主書黃穆之專知省視穆之夕還增損不卽啟聞懼罪竊以赤章事因上省醫徐奘以聞又積前失帝大怒中使遣責者數焉約懼遂卒有司諡曰文帝曰懷情不盡曰隱故改爲隱約少時常以晉氏一代竟無全書年二十許便有撰述之意宋泰始初征西將軍蔡興宗爲啟明帝有勅許焉自此踰二十年所撰之書方就凡一百餘卷條流雖舉而採綴未周永明初遇盜失第五帙又齊建元四年被勅撰國史永明二年又兼著作郎撰次起居注五年春又被勅撰宋書六年二月畢功表上之其所撰國史爲齊紀二十卷天監中又撰梁武紀十四卷又撰邈言十卷諡例十卷文章志三十卷文集一百卷皆行於世又撰四聲譜以爲在昔詞人累千載而不悟而獨得曾衿窮其妙旨自謂入神之作武帝雅不好焉嘗問周捨曰何謂四聲捨曰天子聖哲是也然帝竟不甚遵用約也

子旋士規襲爵位司徒右長史太子僕以母憂去官因蔬食辟穀服除猶絕粳梁終于南康內史諡曰恭集注邇言行於世旋弟趨字孝鯁亦知名位黃門郎旋卒子寔嗣寔弟衆衆字仲師好學頗有文詞仕梁爲太子舍人時梁武帝制于文詩衆爲之注解與陳郡謝景同時召見于文德殿帝令衆爲竹賦賦成奏之手勅答曰卿文體翩翩可謂無忝爾祖累遷太子中舍人兼散騎常侍聘魏還爲驃騎廬陵王諮議參軍侯景之亂表求還吳興召募故義部曲以討賊梁武許之及景圍臺城衆率宗族及義附五千餘人入援都軍容甚整景深憚之梁武於城內遙授太子右衛率臺城陷衆乃降景景平元帝以爲司徒左長史魏剋江陵見虜尋亦逃歸陳武帝受命位中書令帝以衆州里知名甚敬重之賞賜超於時輩性吝嗇財帛億計無所分遺自奉甚薄每朝會中衣裳破裂或躬提冠履永定二年兼起部尙書監起太極殿恆服布袍芒屨以麻繩爲帶又糞麥飯餽以噉之朝士咸共誚其所爲衆性狷急因忿恨遂歷誅公卿非毀朝廷武帝大怒以衆素有令望不欲顯誅因其休假還武康遂於吳中賜死

范雲字彥龍南鄉舞陰人晉平北將軍汪大世孫也祖璩之宋中書侍郎雲六歲就其姑夫袁叔明讀毛詩日誦九紙陳郡殷琰名知人候叔明見之曰公輔才也雲性機警有識且善屬文下筆輒成時人每疑其宿構父抗爲郢府參軍雲隨在郢時吳興沈約新野庾杲之與抗同府見而友之起家郢州西曹佐書

轉法曹行叅軍俄而沈攸之舉兵圍郢城抗時爲府長流入城固守留家屬居外雲爲軍人所得攸之召與語聲色甚厲雲容貌不變徐自陳說攸之笑曰卿定可兒且出就舍明旦又召雲令送書入城內餉武陵王酒一石犢一頭餉長史柳世隆鱸魚二十頭皆去其首城內或欲誅雲雲曰老母弱弟懸命沈氏若其違命禍必及親今日就戮甘心如薺世隆素與雲善乃免之後除員外散騎郎齊建元初竟陵王子良爲會稽太守雲爲府主簿王未之知後尅日登秦望山乃命雲雲以山上有秦始皇刻石此文三句一韻人多作兩句讀之並不得韻又皆大篆人多不識乃夜取史記讀之令上口明日登山子良令賓僚讀之皆茫然不識末問雲雲曰下官嘗讀史記見此刻石文進乃讀之如流子良大悅因以爲上賓自是寵冠府朝王爲丹陽尹復爲主簿深相親任時進見齊高帝會有獻白鳥帝問此何瑞雲位卑最後答曰臣聞王者敬宗廟則白鳥至時謁廟始畢帝曰卿言是也感應之理一至此乎子良爲南徐州南兗州雲並隨府遷每陳朝政得失於子良尋除尙書殿中郎子良爲雲求祿齊武帝曰聞范雲諂事汝政當流之子良對曰雲之事臣動相箴諫諫書存者百有餘紙帝索視之言皆切至咨嗟良久曰不意范雲乃爾方令卿汝子良爲司徒又補記室時巴東王子響在荊州殺上佐都下例例人多異志而豫章王疑鎮東府多還私邸動移旬日子良築第西郊游戲而已而梁武帝時爲南郡王文學與雲俱爲子良所禮梁武勸子良

還石頭并言大司馬宜還東府子良不納梁武以告雲時廷尉平王植爲齊武帝所狎雲謂植曰西夏不
靜人情甚惡大司馬詎得久還私第司徒亦宜鎮石頭卿入既數言之差易植因求雲作啟自呈之俄而
二王各鎮一城文惠太子嘗幸東田觀穫稻雲時從文惠顧雲曰此刈甚快雲曰三時之務亦甚勤勞願
殿下知稼穡之艱難無徇一朝之宴逸也文惠改容謝之及出侍中蕭緬先不相識就車握雲手曰不謂
今日復見讜言永明十年使魏魏使李彪宣命至雲所甚見稱美彪爲設甘蔗黃甘粽隨盡絕益彪笑謂
曰范散騎小復儉之一盡不可復得使還再遷零陵內史初零陵舊政公田奉米之外別雜調四千石及
雲至郡止其半百姓悅之深爲齊明帝所知還除正員郎時高武王侯並懼大禍雲因帝召次曰昔太宰
文宣王語臣嘗夢在一高山上上有一深院見文惠太子先墜次武帝次文宣望見僕射在室坐御牀
備王者羽儀不知此是何夢卿慎勿向人道明帝流涕曰文宣此惠亦難負於是處昭胄兄弟異於餘宗
室雲之幸於子良江祐求雲女婚姻酒酣巾箱中取剪刀與雲曰且以爲婢雲笑受之至是祐貴雲又因
酣曰昔與將軍俱爲黃鵠今將軍化爲鳳皇荆布之室理隔華盛因出剪刀還之祐亦更姻他族及祐敗
妻子流離每相經理又爲始興內史舊郡界得亡奴婢悉付作部曲卽貨去買銀輸官雲乃先聽百姓誌
之若百日無主依判送臺又郡相承後堂有雜工作雲悉省還役並爲帝所賞郡多豪猾大姓二千石有

不善者輒共殺害不則逐之邊帶蠻俚尤多盜賊前內史皆以兵刃自衛雲入境撫以恩德罷亭候商賈
露宿郡中稱爲神明遷廣州刺史平越中郎將至任遣使祭孝子南海羅威唐頌蒼梧丁密頓琦等墓時
江祐姨弟徐藝爲曲江令祐深以託雲有譚儼者縣之豪族藝鞭之儼以爲恥至都訴雲雲坐徵還下獄
會赦免初梁武爲司徒祭酒與雲俱在竟陵王西邸情好歡甚永明末梁武與兄懿卜居東郊之外雲亦
築室相依梁武每至雲所其妻嘗聞蹕聲又嘗與梁武同宿顧嵩之舍嵩之妻方產有鬼在外曰此中有
王有相雲起曰王當仰屬相以見歸因是盡心推事及帝起兵將至都雲雖無官自以與帝素款慮爲昏
主所疑將求入城先以車迎太原孫伯翳謀之伯翳曰今天文顯於上災變應於下蕭征東以濟世雄武
挾天子而令諸侯天時人事寧俟多說雲曰此政會吾心今羽翮未備不得不就籠檻希足下善聽之及
入城除國子博士未拜而東昏遇弒侍中張穆使雲銜命至石頭梁武恩待如舊遂叅讚謨謀毗佐大業
仍拜黃門侍郎與沈約同心翊贊俄遷大司馬詔議叅軍領錄事梁臺建遷侍中武帝時納齊東昏余妃
頗妨政事雲嘗以爲言未之納後與王茂同入臥內雲又諫王茂因起拜曰范雲言是公必以天下爲念
無宜留惜帝默然雲便疏令以余氏賚茂帝賢其意而許之明日賜雲錢各百萬及帝受禪柴燎南郊
雲以侍中叅乘禮畢帝升輦謂雲曰朕之今日所謂懷乎若朽索之馭六馬雲對曰亦願陛下日慎一日

帝善其言即日遷散騎常侍吏部尚書以佐命功封霄城縣侯雲以舊恩超居佐命盡誠翊亮知無不爲帝亦推心仗之所奏多允雲本大武帝十三歲嘗侍宴帝謂臨川王宏鄱陽王恢曰我與范尚書少親善申四海之敬今爲天下主此禮旣革汝宜代我呼范爲兄二王下席拜與雲同車還尚書下省時人榮之帝嘗與雲言及舊事云朕司州還在三橋宅門生王道牽衣云聞外述圖讖云齊祚不久別應有主者官應取富貴朕齋中坐讀書內感其言而外迹不得無怪欲呼人縛之道叩頭求哀乃不復敢言今道爲羽林監文德主帥知管籥雲曰此乃天意令道發耳帝又云布衣時嘗夢拜兩舊妾爲六宮有天下此爨已卒所拜非復其人恆以爲恨其年雲以本官領太子中庶子二年遷尚書右僕射猶領吏部頃之坐違詔用人免吏部猶爲右僕射雲性篤睦事寡嫂盡禮家事必先諮而後行好節尚奇專趨人之急少與領軍長史王暕善雲起宅新成移家始畢暕亡於官舍屍無所歸雲以東廂給之移屍自門入躬自營哈招復如禮時人以爲難及居選官任寄隆重書牘盈案賓客滿門雲應答如流無所壅滯官曹文墨發繼若神時人咸服其明瞻性頗激厲少威重有所是非形於造次士或以此少之初雲爲郡號廉潔及貴重頗通饋遺然家無蓄積隨散之親友武帝九錫之出雲忽中疾居二日半召醫徐文伯視之文伯曰緩之一月乃復欲速卽時愈政恐二年不復可救雲曰朝聞夕死而況二年文伯乃下火而牀爲重衣以覆之有頃

汗流於此卽起二年果卒帝爲流涕卽日輿駕臨殯詔贈侍中衛將軍禮官請諡曰宣勅賜諡曰文有集三十卷子孝才嗣孫伯翳太原人晉祕書監盛之玄孫曾祖放晉國子博士長沙太守父康起部郎貧常映雪讀書清介交游不雜伯翳位終驃騎郡陽王叅軍事雲從父兄縝

縝字子真父濛奉朝請早卒縝少孤貧事母孝謹年未弱冠從沛國劉瓛學瓛甚奇之親爲之冠在瓛門下積年恆芒屨布衣徒行於路瓛門下多車馬貴游縝在其間聊無恥愧及長博通經術尤精三禮性質直好危言高論不爲士友所安唯與外弟蕭琛善琛名曰口辯每服縝簡詣年二十九髮白皤然乃作傷暮詩白髮酥以自嗟仕齊位尙書殿中郎永明中與魏氏和親簡才學之士以爲行人縝及從弟雲蕭琛琅邪顏幼明河東裴昭明相繼將命皆著名鄰國時竟陵王子良盛招賓客縝亦預焉嘗侍子良子良精信釋教而縝盛稱無佛子良問曰君不信因果何得富貴貧賤縝答曰人生如樹花同發隨風而墮自有拂簾幌墜於茵席之上自有關籬牆落於蕪溷之中墜茵席者殿下是也落蕪溷者下官是也貴賤雖復殊途因果竟在何處子良不能屈然深怪之退論其理著神滅論以爲神卽形也形卽神也形存則神存形謝則神滅形者神之質神者形之用是則形稱其質神言其用形之與神不得相異神之於質猶利之於刀形之於用猶刀之於利利之名非刀也刀之名非利也然而捨利無刀捨刀無利未聞刀沒而利存

豈容形亡而神在此論出朝野誼譁子良集僭難之而不能屈太原王琰乃著論譏縯曰嗚呼范子曾不知其先祖神靈所在欲杜縯後對縯又對曰嗚呼王子知其先祖神靈所在而不能殺身以從之其險詣皆此類也子良使王融謂之曰神滅既自非理而卿堅執之恐傷名教以卿之大美何患不至中書郎而故乖刺爲此可便毀棄之縯大笑曰使范縯賣論取官已至令僕矣何但中書郎邪後爲宜都太守性不信神鬼時夷陵有伍相廟唐漢三神廟胡里神廟縯乃下教斷不祠後以母憂去職居于南州梁武至縯墨縯來迎武帝與縯有西邸之舊見之甚悅及建康城平以縯爲晉安太守在郡清約資公祿而已遷尙書左丞及還雖親戚無所遺唯餉前尙書令王亮縯在齊時與亮同臺爲郎舊相友愛至是亮擯棄在家縯自以首迎武帝志在權軸而所懷未滿亦怏怏故私相親結以矯於時竟坐亮徙廣州在南累年追爲中書郎國子博士卒文集十五卷子胥字長才傳父業位國子博士有口辯大同中常兼主客郎應接北使卒於鄱陽內史

論曰齊德將謝昏虐君臨喋喋黔黎命懸晷刻梁武撫茲歸運嘯召風雲范雲恩結龍潛沈約情深愴舊並以茲文義首居帷幄追蹤亂傑各其時之過也而約以高才博洽名亞董遷未迹爲蹟亦鳳德之衰乎縯婞直之節著于終始其以王亮爲尤亦不足非也

南史卷五十七

南史卷五十七考證

沈約傳林子輒摧鋒居前○摧監本作推今改从閣本

子旋傳衆字仲師○師一本作興

時梁武帝制千文詩衆爲之注解○顧炎武曰千字文有二本舊唐書經籍志千字文一卷蕭子範撰又

一卷周興嗣撰是也今云梁武制千文詩則不獨興嗣子範二人矣又隋書經籍志興嗣千字文國子

祭酒蕭子雲注而梁書蕭子範傳謂子範作之記室蔡道注釋今云衆爲之注解亦彼此互異

范雲傳雲入境撫以恩德罷亭候○亭監本訛停今改从閣本

梁武與兄懿卜居東郊之外○東監本誤築又下文梁武每至雲所其妻嘗聞蹕聲句蹕誤跋今俱改正

家事必先諮而後行○先諮監本誤元詔今改从閣本

交游不雜○監本脫不雜二字今增入

南史卷五十七考證

南史卷五十八

唐

李

延

壽

撰

列傳第四十八

韋叡

兄纂 闡 叡子放 孫榮 放弟正 稷弟階

正子載 鼎 正弟稷 稷弟階

放弟正 稷弟階

裴遜

遜子之禮 子忌 之高弟之橫

兄子之高 之高弟之年

之高弟之年

之高弟之年

韋叡字懷文京兆杜陵人也世為三輔著姓祖玄避吏隱長安南山宋武帝入關以太尉掾徵不至伯父

祖征宋末為光祿勳父祖歸寧遠長史叡事繼母以孝聞祖征累為郡守每攜叡之職視之如子時叡內

兄王愷姨弟杜暉並有鄉里盛名祖征謂叡曰汝自謂何如暉暉叡謙不敢對祖征曰汝文章或小減學

識當過之然幹國家成功業皆莫汝逮也外兄杜幼文為梁州刺史要叡俱行梁土富饒往者多以賄敗

叡雖幼獨以廉聞宋永元初袁顓為雍州刺史見而異之引為主簿顓到州與鄧琬起兵叡求出為義成

郡故免顓之禍累遷齊興太守本州別駕長水校尉右軍將軍齊末多故欲還鄉里求為上庸太守俄而

太尉陳顯達護軍將軍崔慧景頻逼建鄴人心惶駭西土人謀之叡曰陳雖舊將非高人才豈頗更事懦

而不武天下真人殆興吾州矣乃遣其二子自結於梁武及兵起檄至叡率郡人伐竹為筏倍道來赴有

衆二千馬二百匹帝見叡甚悅撫几曰佗日見君之面今日見君之心吾事就矣師尅郢魯平茄湖叡多

乾隆四年校刊

南史卷五十八列傳

建築皆見用大軍發郢謀留守將上難其人久之顧劼曰棄驥驥而不乘焉遑遑而更索卽日以爲江夏太守行鄧州府事初鄧城之拒守也男女垂十萬閉壘經年疾疫死者十七八皆積屍於牀下而生者寢處其上每屋盈滿劼料簡隱卹咸爲營理百姓賴之梁臺建徵爲大理武帝卽位遷廷尉封梁都子天監二年改封永昌再遷豫州刺史領歷陽太守魏遣衆來伐劼率州兵擊走之四年侵魏詔劼都督軍劼衆遣長史王超宗梁郡太守馮道根攻魏小峴城未能拔劼巡行圍柵魏城中忽出數百人陳於門外劼欲擊之諸將皆曰向本輕來請還授甲而後戰劼曰魏城中二千餘人閉門堅守足以自保今無故出人於外必其驍勇若能挫之其城自拔衆猶遲疑劼指其節曰朝廷授此非以爲飾韋劼之法不可犯也乃進兵魏軍敗因急攻之中宿而城拔遂進討合肥先是右軍司馬胡景略至合肥久未能下劼案行山川曰吾聞汾水可以灌平陽卽此是也乃堰肥水噴之堰成水通舟艦繼至魏初分築東西小城夾肥劼先攻二城旣而魏援將楊靈胤帥軍五萬奄至衆懼不敵請表益兵劼曰賊已至城下方復求軍且吾求濟師彼亦徵衆師克在和古人之義也因戰破之軍人少安初肥水堰立使軍主王懷靜築城於岸守之魏攻陷城乘勝至劼城下軍監潘靈祐勸劼退還巢湖諸將又請走保三丈劼怒曰將軍死綏有前無却因令取繳扇磨幢樹之堤下示無動志劼素羸每戰不嘗騎馬以板輿自載督勵衆軍魏兵鑿堤劼親與爭魏

軍却因築壘於堤以自固起鬪艦高與合肥城等四面臨之城潰俘獲萬餘所餘軍實無所私焉初胡景略與前軍趙祖悅同軍交惡志相陷害景略一怒自齧其齒齒皆流血叡以將帥不和將致患禍酌酒自勸景略曰且願兩虎勿復私鬪故終於此役得無害焉叡每晝接客旅夜算軍書三更起張燈達曙撫循其衆常如不及故投募之士爭歸之所至頓舍修立館宇藩籬墉壁皆應準繩合肥既平有詔班師去魏軍既近懼爲所躡叡悉遣輜重居前身乘小輿殿後魏人服叡威名望之不敢逼全軍而還於是遷豫州於合肥五年魏中山王元英攻北徐州圍刺史昌義之於鍾離衆兵百萬連城四十餘武帝遣征北將軍曹景宗拒之次邵陽洲築壘相守未敢進帝怒詔叡會焉賜以龍環御刀曰諸將有不用命者斬之叡自合肥徑陰陵大澤過澗谷輒飛橋以濟師人畏魏軍盛多勸叡緩行叡曰鍾離今鑿穴而處負戶而汲車馳卒奔猶恐其後而況緩乎旬日而至邵陽初帝勅景宗曰韋叡卿鄉望宜善敬之景宗見叡甚謹帝聞曰二將和師必濟矣叡於景宗營前二十里夜掘長甃樹鹿角截洲爲城比曉而營立元英大驚以杖擊地曰是何神也景宗慮城中危懼乃募軍士言文達洪騏驎等齎勅入城使固城守潛行水底得達東城城中戰守日苦始知有援於是人百其勇魏將楊大眼將萬餘騎來戰大眼以勇冠三軍所向皆靡叡結車爲陣大眼聚騎圍之叡以彊弩二千一時俱發洞甲穿中殺傷者衆矢貫大眼右臂亡魂而走明日元

英自率衆來戰，劼乘素木輿，執白角如意以麾軍。一日數合，英甚憚其彊。魏軍又夜來攻城，飛矢雨集。劼子顯請下城以避箭，劼不許。軍中驚劼於城上，厲聲呵之，乃定。魏人先於邵陽洲兩岸爲兩橋，樹柵數百步，跨淮通道。劼裝大艦，使梁郡太守馮道根、廬江太守裴邃、秦郡太守李文釗等爲水軍，會淮水。暴長，劼卽遣之。鬪艦競發，皆臨賊壘，以小船載草灌之以膏，從而焚其橋。風怒火盛，敢死之士拔柵斫橋水，又溼疾倏忽之間，橋柵盡壞。道根等皆身自搏戰，軍人奮勇呼聲動天地，無不一當百。魏人大潰，元英脫身遁走。魏軍趨水死者十餘萬，斬首亦如之。其餘釋甲稽顙乞爲囚奴，猶數十萬。劼遣報昌義之，義之且悲且喜，不暇答，但叫曰：「更生！更生！」帝遣中書郎周捨勞軍於淮上。劼積所獲於軍門，捨觀之，謂劼曰：「君此獲復與熊耳山等矣！」以功進爵爲侯。七年，遷左衛將軍，俄爲安西長史、南郡太守。會司州刺史馬仙琕自北還，軍爲魏人所躡，三關擾動。詔劼督衆軍援焉。劼至安陸，增築城二丈餘，更開大壑，起高樓，衆頗譏其示弱。劼曰：「不然，爲將當有怯時。」是時元英復追仙琕，將復邵陽之恥。聞劼至，乃退。帝亦詔罷軍。十三年，爲丹陽尹，以公事免。十四年，爲雍州刺史。初，劼起兵鄉中，客陰雙光泣止。劼遷爲州，雙光道候劼，笑曰：「若從公言，乞食於路矣。」餉耕牛十頭。劼於故舊無所惜，士大夫年七十以上，多與假板，縣令鄉里甚懷之。十五年，拜表致仕。優詔不許，徵拜護軍，給鼓吹一部，入直殿省，居朝廷，恂恂未嘗忤視。武帝甚禮敬之，性慈愛，撫

孤兒子過於己子歷官所得祿賜皆散之親故家無餘財後爲護軍居家無事慕萬石陸賈之爲人因畫之於壁以自玩時雖老暇日猶課諸兒以學第三子稜尤明經史世稱其洽聞劼每坐使稜說書其所發隨稜猶弗之逮武帝方銳意釋氏天下咸從風而化劼自以信受素薄位居大臣不欲與衆俯仰所行略如化日普通元年遷侍中車騎將軍未拜卒於家年七十九遺令薄葬斂以時服武帝卽日臨哭甚慟贈車騎將軍開府儀同三司諡曰嚴劼雅有曠世之度涖人以愛惠爲本所居必有政績將兵仁愛士卒營幕未立終不肯舍井竈未成亦不先食被服必於儒者雖臨陣交鋒常緩服乘輿執竹如意以磨進止與裴竄俱爲梁世名將餘人莫及初邵陽之役昌義之甚德劼請曹景宗與劼會因設錢二十萬官賭之景宗擲得雉劼徐擲得盧遽受一子反之曰異事遂作塞景宗時與羣帥爭先敗之捷劼獨居後其不尙勝率多如是世尤以此賢之劼兄纂闡並早知名纂仕齊位司徒記室特進沈約嘗稱纂於上曰恨陛下不與此人同時其學非臣輩也闡爲建寧縣所得俸祿百餘萬還家悉委伯父處分鄉里宗事之位通直郎劼子放字元直身長七尺七寸腰帶八圍容貌甚偉襲封永昌縣侯位竟陵太守在郡和理爲吏人所稱大通元年武帝遣兼領軍曹仲宗等攻渦陽又以放爲明威將軍總兵會之魏大將軍費穆帥衆奄至放軍營未立麾下止有二百餘人放從弟洵驍果有勇力單騎擊刺屢折魏軍洵馬亦被傷不能進放胄又

三貫矢衆皆失色請放突去放厲聲叱之曰今日唯有死爾乃免胄下馬據胡牀處分士卒皆殊死戰莫不一當百遂北至渦陽魏又遣常山王元昭大將軍李獎乞伏寶費穆等五萬人來援放大破之渦陽城主王偉以城降魏人棄諸營壘一時奔潰衆軍乘之斬獲略盡禽穆弟超并王偉送建鄴還爲太子右衛率中大通二年徙北徐州刺史卒於鎮諡曰宣侯放性弘厚篤實輕財好施於諸弟尤雍穆每將遠別及行役初還常同一室臥起時比之三姜初放與吳郡張率皆有側室懷孕因指爲婚姻其後各產男女未及成長而率亡遺嗣孤弱放常贍卹之及爲北徐州時有貴族請昏者放曰吾不失信於故友乃以息岐娶率女又以女適率子時稱放能篤舊子粲

粲字長倩少有父風好學仗氣身長八尺容觀甚偉初爲雲麾晉安王行參軍後爲外兵參軍兼中兵時潁川庾仲容吳郡張率前輩才名與粲同府並忘年交好及王爲皇太子粲自記室遷步兵校尉入爲東宮領直後襲爵永昌縣侯累遷右衛率領直粲以舊恩任寄稠密雖居職累徙常留宿衛頗擅權誕誕不爲時輩所平右衛朱异嘗於酒席厲色謂粲曰卿何得已作領軍面向人大同中帝嘗不豫一日暴劇皇太子以下並入侍疾內外咸云帝崩粲將率宮甲度臺微有喜色問所由那不見辦長梯以爲大行幸前殿須長梯以復也帝後聞之怒曰韋粲願我死有司奏推之帝曰各爲其主不足推故出爲衡州刺史皇

太子出餞新亭執粲手曰與卿不爲久別久之帝復召還爲散騎常侍還至廬陵聞侯景作逆便簡閱部下倍道赴援至豫章卽就內史劉孝儀共謀之孝儀曰必如此當有勅安可輕信單使妄相驚動或恐不然時孝儀置酒粲怒以杯抵地曰賊已度江便逼宮闕水陸阻斷何暇有報假令無勅豈得自安韋粲今日何情飲酒卽馳馬出部分將發會江州刺史當陽公大心遣使要粲粲乃分麾下配第八弟助第九弟警爲前軍粲馳往見大心曰上游蕃鎮江州去都最近殿下情計實宜在先但中流任重當須應接不可闕鎮今宜張軍聲勢移鎮盆城遣偏城賜隨於事便足大心然之遣中兵柳昕帥兵二千隨粲悉留家累於江州以輕舸就路至南洲粲外弟司州刺史柳仲禮亦帥步騎萬餘人至橫江粲卽送糧仗給之并散私金帛以賞其戰士先是安北鄱陽王範亦自合肥遣西豫州刺史裴之高與其世子嗣帥江西之衆赴都屯于張公洲待上流諸軍至是之高遣船度仲禮與粲合軍進屯新林王游苑粲建議推仲禮爲大都督報下流衆軍裴之高自以年位高恥居其下乃云柳節下已是州將何須我復鞭板累日不決粲乃抗言於衆曰今同赴國難義在除賊所推柳司州者政以久捍邊疆先爲侯景所憚且士馬精銳無出其前者論位次柳在粲下語其年齒亦少於粲直以社稷之計不得復論今日貴在將和若人心不同大事去矣裴公朝之舊齒豈應復挾私以阻大計粲請爲諸君解釋之乃單舸至之高營切讓之高泣曰吾

荷國榮自應帥先士卒顧恨衰老不能効命企望柳使君共平凶逆前謂衆議已定無俟老夫爾若必有疑當剖心相示於是諸將定議仲禮方得進軍次新亭賊列陣於中興寺相持至晚各解歸是夜仲禮入粲營部分衆軍旦日將戰諸將各有據守令粲頓青塘當石頭中路粲慮柵壘未立賊爭之頗以爲憚謂仲禮曰下官才非禦武直欲以身殉國節下善量其宜不可致有虧喪仲禮曰青塘立營迫近淮渚欲以糧儲船乘盡就迫之此事大非兄不可若疑兵少當更差軍相助粲帥所部水陸俱進時昏霧軍人失道比及青塘夜已過半壘柵至曉未合景登禪靈寺門望粲營未立便率銳卒來攻軍敗乘勝入營左右高馮牽粲避賊粲不動兵死略盡遂見害粲子尼及三弟助警構從弟昂皆戰死親戚死者數百人賊傳粲首闕下以示城內簡文聞之流涕謂御史中丞蕭愷曰社稷所寄唯在韋公如何不先死行陣詔贈護軍將軍元帝平侯景追諡忠貞子諒以學業爲陳始興王叔陵所引爲中錄事參軍兼記室叔陵敗伏誅放弟正

正字敬直位襄陵太守初正與東海王僧孺善及僧孺爲吏部郎參掌大選賓友故人莫不傾意正獨澹然及僧孺擯廢正復篤素分有踰曩日論者稱焉卒於給事黃門侍郎子載

載字德基少聰慧篤志好學年十二隨叔父稜見沛國劉顯顯問漢書十事載隨問應無疑滯及長博涉

文史沉敏有器局仕梁爲尙書三公郎侯景之亂元帝承制以爲中書侍郎尋爲尋陽太守隨都督王僧辯東討侯景景平厯位琅邪義興太守陳武帝誅王僧辯乃遣周文育襲載載嬰城自守載所屬縣並陳武舊兵多善用弩載收得數十人繫以長鎖令所親監之使射文育軍約曰十發不兩中者死每發輒中所中皆斃相持數旬陳武帝聞文育軍不利以書喻載以誅王僧辯意并奉梁敬帝勅載解兵載得書乃以衆降陳武帝引載恆置左右與之謀議徐嗣徽任約等引齊軍濟江據石頭城帝問計於載載曰齊軍若分兵先據三吳之路略地東境則時事去矣今可急於淮南卽侯景故壘築城以通東道轉輸別令輕兵絕其糧運使進無所虜退無所資則齊將之首旬日可致帝從之永定中位散騎常侍太子右衛率天嘉元年以疾去官載有田十餘頃在江乘縣之白山至是遂築室而居屏絕人事吉凶慶弔無所往來不入籬門者幾十載卒於家載弟鼎

鼎字超盛少通曉博涉經史明陰陽逆刺尤善相術仕梁起家湘東王法曹參軍遭父憂水漿不入口者五日哀毀過禮殆將滅性服闋爲邵陵王主簿侯景之亂鼎兄昂於京口戰死鼎負屍出寄于中興寺求棺無所得鼎哀憤慟哭忽見江中有物流至鼎所竊異之往視乃新棺也因以充斂元帝聞之以爲精誠所感侯景平司徒王僧辯以爲戶曹屬累遷中書侍郎陳武帝在南徐州鼎望氣知其當王遂寄擊焉因

謂陳武帝曰明年有大臣誅死後四歲梁其代終天之祿數當歸舜後昔周滅殷氏封媯汭于宛丘其裔子孫因爲陳氏僕觀明公天縱神武繼絕統者無乃是乎武帝陰有圖僧辯意聞其言大喜因而定策及受禪拜黃門侍郎太建中以廷尉卿爲聘周使加散騎常侍後爲太府卿至德初鼎盡貨田宅寓居僧寺友人大匠卿毛彪問其故答曰江東王氣盡於此矣吾與爾當葬長安期運將及故破產爾初鼎之聘周也嘗遇隋文帝謂曰觀公容貌不久必大貴貴則天下一家歲一周天老夫當委質願深自愛及陳亡驛召入京授上儀同三司待遇甚厚每公宴鼎恆預爲性簡貴雖爲亡國之臣未嘗俯仰當世時吏部尙書韋世康兄弟顯貴隋文帝從容謂鼎曰世康與公遠近對曰臣宗族南徙昭穆非臣所知帝曰卿百代卿族豈忘本也命官給酒肴遣世康請鼎還杜陵鼎乃自楚太傅孟以下二十餘世並考論昭穆作韋氏譜七卷示之歡飲十餘日乃還時蘭陵公主寡上爲之求夫選親衛柳述及蕭瑒等以示鼎鼎曰瑒當封侯而無貴妻之相述亦通顯而守位不終上曰位由我爾遂以主降述上又問鼎諸兒誰爲嗣位答曰至尊皇后所最愛者當與之非臣敢預知也上笑曰不肯顯言乎開皇十三年除光州刺史以仁義教導務弘清靜州中有土豪外修邊幅而內行不軌常爲劫盜鼎於都會時謂之曰卿是好人那忽作賊因條其徒黨姦謀逕迺其人驚懼卽自首伏又有人客游通主家之妾及其還去妾盜珍物於夜逃亡尋於草中爲

人所殺主家知客與妾通因告客殺之縣司鞫問具得姦狀因斷客死獄成上於鼎鼎覽之曰此客實姦而不殺也乃某寺僧詔妾盜物令奴殺之賊在某處卽放此客遣人掩僧并獲贓物自是部內肅然咸稱其神道無拾遺尋追入京頃之而卒于長安年七十九正弟稜

稜字威直性恬素以書史爲業博物彊記當世士咸就質疑位終光祿卿著漢書續訓二卷稜弟黼

黼字務直性彊正少習經史位太府卿侯景濟江黼屯六門尋改爲都督城西面諸軍時景於城外起東西二土城內亦應之簡文親自負土哀太子以下躬執畚鍤守西土山晝夜苦戰以功授輕車將軍加持節卒於城內初黼爲太僕卿而兄子粲爲左衛率黼以常怏怏謂人曰韋粲已落驪驪前朝廷是能用才不識者頗以此闕之

裴邃字深明河東聞喜人魏冀州刺史徽之後也祖壽孫寓居壽陽爲宋武帝前軍長史父仲穆驍將軍邃十歲能屬文善左氏春秋齊東昏踐阼始安王蕭遙光爲揚州刺史引邃爲參軍遙光敗邃還壽陽會刺史裴叔業以壽陽降魏邃遂隨衆北徙魏宣武帝雅重之仕魏爲魏郡太守魏遣王肅鎮壽陽邃固求隨肅密圖南歸梁天監初自拔南還除後軍諮議參軍邃求邊境自効以爲廬江太守五年征邵陽州魏人爲長橋斷淮以濟邃築壘逼橋每戰輒克於是密作沒突艦會甚雨淮水暴溢邃乘艦徑造橋側進

擊大破之以功封夷陵縣子遷廣陵太守與鄉人共入魏武廟因論帝王功業其妻甥王篆之密啟梁武帝云裴邃多大言有不臣跡由是左遷始安太守邃志立功邊垂不願閑遠乃致書於呂僧珍曰昔阮咸顏延有二始之歎吾才不逮古人今爲三始非其願也將如之何後爲竟陵太守開置屯田公私便之再遷西戎校尉北梁秦二州刺史復開創屯田數千頃倉廩盈實省息邊運人吏獲安乃相率餉絹千餘匹邃從容曰汝等不應爾吾又不可逆納其二匹而已入爲大匠卿普通二年義州刺史文僧明以州入魏魏軍來援以邃爲信武將軍督衆軍討焉邃深入魏境出其不意魏所署義州刺史封壽據檀公峴邃擊破之遂圍其城壽請降義州平除豫州刺史加督鎮合肥四年大軍北侵以邃督征討諸軍事先襲壽陽攻其郛斬門而入一日戰九合爲後軍蔡秀成失道不至邃以援絕拔還於是邃復整兵收集士卒令諸將各以服色相別邃自爲黃袍騎先攻拔狄丘甃城黎漿又屠安成馬頭沙陵等戍明年略地至汝潁間所在響應魏壽陽守將長孫承業河間王元琛出城挑戰邃臨淮歎曰今日不破河間方爲謝玄所笑乃爲四甄以待之令直閣將軍李祖憐僞遁以引承業承業等悉衆追之四甄競發魏衆大敗斬首萬餘級承業奔走閉門不敢復出在軍疾篤命衆軍守備送喪還合肥尋卒贈侍中左衛將軍進爵爲侯諡曰烈邃沉深有思略爲政寬明能得士心居身方正有威重將吏憚之少敢犯法及卒淮肥間莫不流涕以爲

邃不死當大闢土字子之禮嗣

之禮字子義美儀容能言立理爲西豫州刺史母憂居喪唯食麥飯邃廟在光宅寺西堂宇弘敞松栢鬱茂范雲廟在三橋蓬蒿不翦梁武帝南郊道經二廟顧而歎曰范爲已死裴爲更生大同初都下旱蝗四籬門外桐栢凋盡唯邃墓犬牙不入當時異之歷位黃門侍郎武帝設無遮會儻象驚排突陞衛王公皆散唯之禮與散騎常侍臧盾不動帝壯之以之禮爲壯勇將軍比徐州刺史盾兼中領軍將軍之禮卒於少府卿諡曰壯子政承聖中位給事黃門侍郎魏剋江陵隨例入長安

之高字如山邃兄中散大夫髦之子也頗讀書少負意氣常隨叔父邃征討所在立功甚爲邃所器重戎政咸以委焉壽陽之役邃卒於軍所之高隸夏侯夔平壽陽仍除梁郡太守封都城縣男時魏汝陰來附勅之高應接仍除潁州刺史父憂還都起爲光遠將軍令討平陰陵盜以爲譙州刺史侯景之亂之高爲西豫州刺史率衆入援南豫州刺史鄱陽嗣王範命之高總督江右援軍諸軍事頓張公洲柳仲禮至橫江之高遣船舸迎致仲禮與韋粲等俱會青塘及城陷之高還合肥與鄱陽王範西上元帝遣召之以爲侍中護軍將軍到江陵時之高第六弟之悌在侯景中或傳之悌斬侯景元帝使兼中書舍人黃羅漢報之高之高竟無言直云賊自殺賊非之高所聞元帝深嗟其介直承制除特進金紫光祿大夫卒諡曰恭

子畿官至太子右衛率魏剋江陵力戰死之

之高第五弟之平字如原少儻有志略以軍功封費縣侯承聖中累遷散騎常侍太子詹事陳文帝初除光祿大夫慈訓宮徵衛尉並不就乃築山穿池植以卉木居處其中有終焉志天康元年卒諡曰僖子

子忌

忌字無畏少聰敏有識量頗涉史傳爲當時所稱侯景之亂招集勇力乃隨陳武帝征討及陳武帝誅王僧辯僧辯弟僧智舉兵據吳郡陳武帝遣黃他攻之不能尅命忌勒部下精兵自錢唐直趣吳郡夜至城下鼓譟薄之僧智疑大軍至輕舟奔杜龔忌入據吳郡陳武帝嘉之表授吳郡太守天嘉五年累遷衛尉卿封東興縣侯及華皎稱兵上流宣帝時爲錄尚書輔政盡命衆軍出討委忌總知中外城防諸軍事宣帝卽位改封樂安縣侯歷位都官尚書及吳明徹督衆北伐詔忌以本官監明徹軍淮南平授豫州刺史忌善於綏撫甚得人和及明徹進軍彭汴以明徹爲都督與明徹俱進呂梁軍敗見囚于周授上開府隋開皇十四年卒於長安年七十三之高第十二弟之橫

之橫字如岳少好賓游重氣俠不事產業之高以其縱誕乃爲狹被疏食以激厲之之橫歎曰大丈夫富貴必作百幅被遂與僮屬數百人於芍陂大營田墅遂致殷積梁簡文在東宮聞而要之以爲河東王常

侍遷直閣將軍侯景之亂隸郡王陽範討景濟江仍與範世子嗣入援臺城城陷退還合肥侯景遣任約逼晉熙範令之橫下援未及至範薨之橫乃還時尋陽王大心在江州範副梅思立密要大心襲益城之橫斬思立而拒大心大心以州降侯景之橫與兄之高歸元帝位廷尉卿河東內史隨王僧辯拒侯景景退遷東徐州刺史封豫寧侯又隨僧辯破景東奔僧辯命之橫與杜勣入守臺城及陸納據湘州叛又隸僧辯南討斬納將李賢明平之又破武陵王於峽還口除吳興太守乃作百幅被以成其志魏尅江陵齊遣上黨王高渙挾貞陽侯明攻東關晉安王承制以之橫爲徐州刺史都督衆軍出守蘄城之橫營壘未周而齊軍大至兵盡矢窮遂於陣沒贈司空諡曰忠壯子鳳寶詞

論曰韋裴少年勵操俱以學尙自立晚節驅馳各著功於戎馬觀劄制勝之道謂爲魁梧之傑然而形甚羸瘠身不跨鞍板輿指麾隱如敵國其器分有在隆名豈虛得乎邃自効邊疆盛績克舉其志不遂良可悲夫二門子弟各著名節與梁終始克荷隆構將門有將斯言豈曰妄乎

南史卷五十八

南史卷五十九

唐

李

延

壽

撰

列傳第四十九

江淹

任昉

王僧孺

江淹字文通濟陽考城人也父康之南沙令雅有才思淹少孤貧常慕司馬長卿梁伯鸞之爲人不事章句之學留情於文章早爲高平檀超所知常升以上席甚加禮焉起家南徐州從事轉奉朝請宋建平王景素好士淹隨景素在南兗州廣陵令郭彥文得罪辭連淹言受金淹被繫獄自獄中上書曰昔者賤臣叩心飛霜擊於燕地庶女告天振風襲於齊臺下官每讀其書未嘗不廢卷流涕何者士有一定之論女有不易之行信而見疑貞而爲戮是以壯夫義士伏死而不顧者以此也下官聞仁不可恃善不可依謂徒虛語乃今知之伏願大王暫停左右少加矜察下官本蓬戶桑樞之人布衣韋帶之士退不飾詩書以驚愚進不買聲名於天下日者謬得升降承明之闕出入金華之殿何嘗不局影凝巖側身局禁者乎竊慕大王之義復爲門下之賓備鳴盜淺術之餘豫三五賤伎之末大王惠以恩光顧以顏色實佩荆卿黃金之賜竊感豫讓國士之分矣常欲結纓伏劍少謝萬一剖心摩踵以報所天不圖小人固陋坐貽謗缺

迹墜昭憲身限幽圜履影弔心酸鼻痛骨下官聞虧名爲辱虧形次之是以每一念來忽若有遭加以涉旬月迫季秋天光沉陰左右無色身非木石與獄吏爲伍此少卿所以仰天捶心泣盡而繼之以血者也下官雖乏鄉曲之譽然嘗聞君子之行矣其上則隱於簾肆之間臥於巖石之下次則結綬金馬之庭高議雲臺之上退則虜南越之君係單于之頸俱敗丹冊並圖青史寧爭分寸之末競錐刀之利哉下官聞積毀銷金積譏摩骨遠則直生取疑於盜金近則伯魚被名於不義彼之二才猶或如是況在下官焉能自免昔上將之恥絳侯幽獄名臣之羞史遷下室至如下官當何言哉夫以魯連之智辭祿而不反接輿之賢行歌而忘歸子陵閉關於東越仲蔚杜門於西秦亦良可知也若使下官事非其虛罪得其實亦當鉗口吞舌伏匕首以殞身何以見齊魯奇節之人燕趙悲歌之士乎方今聖厯欽明天下樂業青雲浮洛榮光塞河西洎臨洮狄道北距飛狐陽原莫不霽仁沐義昭景飲醴而已下官抱痛圓門含憤獄戶一物之微有足悲者仰惟大王少垂明白則楮丘之魂不愧於沉首鵠亭之鬼無恨於灰骨景素覽書卽日出之尋舉南徐州秀才對策上第再遷府主簿景素爲荊州淹從之鎮少帝卽位多失德景素專據上流咸勸因此舉事淹每從容進諫景素不納及鎮京口淹爲鎮軍參軍領南東海郡丞景素與腹心日夜謀議淹知禍機將發乃贈詩十五首以諷焉會東海太守陸澄丁艱淹自謂郡丞應行郡事景素用司馬柳世

隆淹固求之景素大怒言於選部黜爲建安吳興令及齊高帝輔政聞其才召爲尙書駕部郎驃騎參軍
事俄而荊州刺史沈攸之作亂高帝謂淹曰天下紛紛若是君謂何如淹曰昔項彊而劉弱袁衆而曹寡
羽卒受一劍之辱紹終爲奔北之虜此所謂在德不在鼎公何疑哉帝曰試爲我言之淹曰公雄武有奇
略一勝也寬容而仁恕二勝也賢能畢力三勝也人望所歸四勝也奉天子而伐叛逆五勝也彼志銳而
器小一敗也有恩無威二敗也士卒解體三敗也搢紳不懷四敗也懸兵數千里而無同惡相濟五敗也
雖豺狼十萬而終爲我獲焉帝笑曰君談過矣桂陽之役朝廷周章詔檄久之未就齊高帝引淹入中書
省先賜酒食淹素能飲啖食鵝炙垂盡進酒數升訖文誥亦辦相府建補記室參軍高帝讓九錫及諸章
表皆淹製也齊受禪復爲驃騎豫章王疑記室參軍建元二年始置史官淹與司徒左長史檀超共掌其
任所爲條例並爲王儉所駁其言不行淹任性文雅不以著述在懷所撰十三篇竟無次序又領東武令
參掌詔策後拜中書侍郎王儉嘗謂曰卿年二十五已爲中書侍郎才學如此何憂不至尙書金紫所謂
富貴卿自取之但問年壽何如爾淹曰不悟明公見眷之重永明三年兼尙書左丞時襄陽人開古冢得
玉鏡及竹簡古書字不可識王僧虔善識字體亦不能諳直云似是科斗書淹以科斗字推之則周宣王
之簡也簡殆如新少帝初兼御史中丞明帝作相謂淹曰君昔在尙書中非公事不妄行在官寬猛能折

衷今爲南司足以振肅百僚也淹曰今日之事可謂當官而行更恐不足仰稱明旨爾於是彈中書令謝朓司徒左長史王纘護軍長史庾弘遠並以託疾不預山陵公事又奏收前益州刺史劉俊梁州刺史陰智伯並贓貨巨萬輒收赴廷尉臨海太守沈昭略永嘉太守庾曇隆及諸郡二千石并大縣官長多被劾內外肅然明帝謂曰自宋以來不復有嚴明中丞君今日可謂近世獨步累遷祕書監侍中衛尉卿初淹年十三時孤貧常采薪以養母曾於樵所得貂蟬一具將鬻以供養其母曰此故汝之休徵也汝才行若此豈長貧賤也可留待得侍中著之至是果如母言永元中崔慧景舉兵圍都衣冠悉投名刺淹稱病不往及事平時人服其先見東昏未淹以祕書監兼衛尉又副領軍王瑩及梁武至新林淹微服來奔位相國右長史天監元年爲散騎常侍左衛將軍封臨沮縣伯淹乃謂子弟曰吾本素官不求富貴今之忝竊遂至於此平生言止足之事亦以備矣人生行樂須富貴何時吾功名旣立正欲歸身草萊耳以疾遷金紫光祿大夫改封醴陵侯卒武帝爲素服舉哀諡曰憲淹少以文章顯晚節才思微退云爲宣城太守時罷歸始泊禪靈寺渚夜夢一人自稱張景陽謂曰前以一匹錦相寄今可見還淹探懷中得數尺與之此人曰大志曰那得割截都盡願見已遲謂曰餘此數尺旣無所用以遺君自爾淹文章蹟矣又嘗宿於冶亭夢一丈夫自稱郭璞謂淹曰吾有筆在卿處多年可以見還淹乃探懷中得五色筆一以授之爾後爲詩

絕無美句時人謂之才盡凡所著述自撰爲前後集并齊史傳志並行於世嘗欲爲赤縣經以補山海之闕竟不成子孺詞

任昉字彥升樂安博昌人也父遙齊中散大夫遙兄遐字景遠少敦學業家行甚謹位御史中丞金紫光祿大夫始興永明中遐以罪將徙荒裔遙懷名請訴言淚交下齊武帝聞而哀之竟得免遙妻河東裴氏高明有德行嘗晝臥夢有五色采旗蓋四角懸鈴自天而墜其一鈴落入懷中心悸因而有娠占者曰必生才子及生昉身長七尺五寸幼而聰敏早稱神悟四歲誦詩數十篇八歲能屬文自製月儀辭義甚美褚彥回嘗謂遙曰聞卿有令子相爲喜之所謂百不爲多一不爲少由是聞聲藉甚年十二從叔暑有知人之量見而稱其小名曰阿堆吾家千里駒也昉孝友純至每侍親疾衣不解帶言與淚并湯藥飲食必先經口初爲奉朝請舉兗州秀才拜太學博士永明初衛將軍王儉領丹陽尹復引爲主簿儉每見其文必三復殷勤以爲當時無輩曰自傅季友以來始復見於任子若孔門是用其入室升堂於是令昉作文及見曰正得吾腹中之欲乃出自作文令昉點正昉因定數字儉拊几歎曰後世誰知子定吾文其見知如此後爲司徒竟陵王記室參軍時琅邪王融有才儁自謂無對當時見昉之文悅然自失以父喪去官泣血三年杖而後起齊武帝謂昉伯遐曰聞昉哀瘠過禮使人憂之非直亡卿之寶亦時才可惜宜深

相全譬遐使進飲食當時勉勵回卽歐出昉父遙本性重檳榔以爲常餌臨終嘗求之剖齒許口不得好者昉亦所嗜好深以爲恨遂終身不嘗檳榔遭繼母憂昉先以毀瘠每一慟絕良久乃蘇因廬於墓側以終喪禮哭泣之地草爲不生昉素彊壯腰帶甚充服闋後不復可識齊明帝深加器異欲大相擢引爲愛憎所白乃除太子步兵校尉掌東宮書記齊明帝廢鬱林王始爲侍中中書監驃騎大將軍開府儀同三司揚州刺史錄尚書事封宣城郡公使昉具草帝惡其辭斥甚愠昉亦由是終建武中位不過列校昉尤長載筆頗慕傅亮才思無窮當時王公表奏無不請焉昉起草卽成不加點竄沈約一代辭宗深所推挹永元中紆意於梅虫兒東昏中旨用爲中書郎謝尚書令王亮亮曰卿宜謝梅那忽謝我昉慙而退未爲司徒右長史梁武帝尅建鄴霸府初開以爲驃騎記室叅軍專主文翰每制書草沈約輒求同署嘗被急召昉出而約在是後文筆約叅製焉始梁武與昉遇竟陵王西邸從容謂昉曰我登三府當以卿爲記室昉亦戲帝曰我若登三事當以卿爲騎兵以帝善騎也至是引昉符昔言焉昉奉牋云昔承清宴屬有緒言提挈之旨形乎善謔豈謂多幸斯言不渝蓋謂此也梁臺建禪讓文誥多昉所具奉世叔父母不異嚴親事兄嫂恭謹外氏貧闕恆營奉供養祿奉所收四方餉遺皆班之親戚卽日便盡性通脫不事儀形喜愠未嘗形於色車服亦不鮮明武帝踐阼歷給事黃門侍郎吏部郎出爲宜興太守歲荒民散以私奉米

豆爲粥活三千餘人時產子者不舉昉嚴其制罪同殺人孕者供其資費濟者千室出郡所得公田奉秩八百餘石昉五分督一餘者悉原兒妾食麥而已友人彭城到漑漑弟洽從昉共爲山澤游及被代登舟止有絹七匹米五石至都無衣鎮軍將軍沈約遺裙衫迎之重除吏部郎參掌大選居職不稱尋轉御史中丞祕書監自齊永元以來祕閣四部篇卷分雜昉手自讐校由是篇目定焉出爲新安太守在郡不事邊幅率然曳杖徒行邑郭人通辭訟者就路決焉爲政清省吏人便之卒於官唯有桃花米二十石無以爲斂遺言不許以新安一物還都雜木爲棺浣衣爲斂闔境痛惜百姓共立祠堂於城南歲時祠之武帝聞問方食西苑綠沉瓜投之於盤悲不自勝因屈指曰昉少時常恐不滿五十今四十九可謂知命卽日舉哀哭之甚慟追贈太常諡曰敬子昉好交結獎進士友不附之者亦不稱述得其延譽者多見升擢故衣冠貴游莫不多與交好坐上客恆有數十時人慕之號曰任君言如漢之三君也在郡尤以清潔著名百姓年八十以上者遣戶曹掾訪其寒溫嘗欲營佛齋調楓香二石始入三斗便出教長斷曰與奪自己不欲貽之後人郡有蜜嶺及楊梅舊爲太守所采昉以冒險多物故卽時停絕吏人咸以百餘年未之有也爲家誠殷勤甚有條貫陳郡殷芸與建安太守到漑書曰哲人云亡儀表長謝元龜何寄指南誰託其爲士友所推如此昉不事生產至乃居無室宅時或譏其多乞貸亦隨復散之親故常自歎曰知我者亦

以叔則不知我者亦以叔則既以文才見知時人云任筆沈詩昉聞甚以爲病晚節轉好著詩欲以傾沈
用事過多屬辭不得流便自爾都下士子慕之轉爲穿鑿於是有才盡之談矣博學於書無所不見家雖
貧聚書至萬餘卷率多異本及卒後武帝使學士賀縱共沈約勘其書目官無者就其家取之所著文章
數十萬言盛行於時東海王僧孺嘗論之以爲過於董生楊子昉樂人之樂愛人之憂虛往實歸妄貧去
吝行可以厲風俗儀可以厚人倫能使貧夫不取懦夫有立其見重如此有子東里西華南容北叟並無
術業墜其家聲兄弟流離不能自振生平舊交莫有收卹西華冬月著葛屨練裙道逢平原劉孝標泫然
矜之謂曰我當爲卿作計乃著廣絕交論以譏其舊交曰客問主人曰朱公叔絕交論爲是乎爲非乎主
人曰客奚此之問客曰夫草虫鳴則阜螽躍彫虎嘯而清風起故氛氲相感霧涌雲蒸嚶鳴相召星流電
激是以王陽登則貢公喜罕生逝而國子悲且心同琴瑟言鬱郁於蘭茝道叶膠漆志婉變於墳簞聖賢
以此鏤金板而鐫盤盂書玉牒而刻鍾鼎若乃匠石輟成風之妙巧伯牙息流波之雅引范張款款於下
泉尹斑陶陶於永夕駱驛從橫烟霏雨散巧歷所不知心計莫能測而朱益州汨繇敘粵謨訓捶直切絕
交遊視黔首以鷹鷂媿人靈於豺虎蒙有猜焉請辯其惑主人听然曰客所謂撫弦徽音未達燥濕變響
張羅沮澤不睹鴻鴈高飛蓋聖人握金鏡闡風烈龍驤虺屈從道汗隆日月連璧贊慶慶之弘致雲飛雷

薄顯棟華之微旨若五音之變化濟九成之妙曲此朱生得玄珠於赤水謨神容以爲言至夫組織仁義
琢磨道德權其愉樂恤其陵夷寄通靈臺之下遺跡江湖之上風雨急而不輟其音霜雪零而不渝其色
斯賢達之素交歷萬古而一遇逮叔世人訛狙詐飈起溪谷不能踰其險鬼神無以究其變競毛羽之輕
趨錐刀之末於是素交盡利交興天下蚩蚩鳥驚雷駭然利交同源派流則異較言其略有五術焉若其
寵坊董石權壓梁竇彫刻百工鑪錘萬物吐嗽興雲雨呼噏下霜露九域聳其風塵四海疊其熏灼靡不
望影星奔藉響川鶩鷄人始唱鶴蓋成陰高門巨開流水接軫皆願摩頂至踵墮膽抽腸約同要離焚妻
子誓殉荆卿湛七族是曰勢交其流一也富埒陶白貲巨程羅山擅銅陵家藏金穴出平原而聯騎居里
閨而鳴鐘則有窮巷之賓繩樞之士冀宵燭之末光邀潤屋之微澤魚貫鳧踊颯沓麟萃分鴈鶩之稻梁
霜玉舉之餘瀝銜恩遇進款誠援青松以示心指白水而旌信是曰賄交其流二也陸大夫宴喜西都郭
有道人倫東國公卿貴其籍甚摺紳羨其登仙加以斂頤感頽涕唾流沫騁黃馬之劇談縱碧雞之雄辯
敘温煖則寒谷成暄論嚴苦則春叢零葉飛沉出其顧指榮辱定其一言於是有弱冠王孫綸紉公子道
不挂於通人聲未適於雲閣攀其鱗翼丐其餘論附駢驥之旌端軼歸鴻於碣石是曰談交其流三也陽
舒陰鬱生靈大情憂合歡離品物恆性故魚以泉涸而响沫鳥因將死而鳴哀同病相憐綴河上之悲曲

恐懼寘懷昭谷風之盛典斯則斷金由於湫隘列頸起於苦蓋是以伍員濯漑於宰嚭張王撫翼於陳相
是曰窮交其流四也馳鶩之俗澆薄之倫無不操權衡執纖縵所以揣其輕重縵所以屬其鼻息若衡
不能舉縵不能飛雖顏冉龍翰鳳雛曾史蘭薰雪白舒向金玉淵海卿雲黼黻河漢視若游塵遇同土梗
莫肯費其半菽罕有落其一毛若衡重錙銖縵微影撇雖共工之蒐慝驩堯之掩義荆南之跋扈東陵之
巨猾皆爲餽匄委蛇折支舐痔金膏翠羽將其意脂韋便辟導其誠故輪蓋所游必非夷惠之室包苴所
入寘行張霍之家謀而後動芒豪寡忒是曰量交其流五也凡斯五交義同賈鬻故桓譚譬之於闔闔林
回諭之於甘醴夫寒暑遞進盛衰相襲或前榮而後悴或始富而終貧或初存而未亡或古約而今泰循
環翻覆迅若波瀾此則徇利之情未嘗異變化之道不得一由是觀之張陳所以凶終蕭朱所以隙未斷
焉可知矣而翟公方規規然勒門以箴客何所見之晚乎然因此五交是生三覺敗德殄義禽獸相若一
覺也難因易攜讐訟所聚二覺也名陷饕餮貞介所羞三覺也古人知三覺之爲梗懼五交之速尤故王
丹威子以覆楚朱穆昌言而示絕有旨哉有旨哉近世有樂安任昉海內髦傑早縮銀黃夙昭人譽道文
麗藻方駕曹王英跼俊邁聯衡許郭類田文之愛客同鄭莊之好賢見一善則盱衡扼腕遇一才則揚眉
抵掌雌黃出其唇吻朱紫由其月旦於是冠蓋輻湊衣裳雲合輜駟擊轉坐客恆滿蹈其闔闔若升闕里

之堂入其隩隅謂登龍門之坂至於顧盼增其倍價翦拂使其長鳴影組雲臺者摩肩趨走丹墀者疊跡莫不締恩狎結綢繆想慧莊之清塵庶羊左之徽烈及瞑目東粵歸骸洛浦總帳猶懸門罕漬酒之彥墳未宿草野絕動輪之賓貌爾諸孤朝不謀夕沈離大海之南寄命瘴癘之地自昔把臂之英金蘭之友曾無羊舌下泣之仁靈慕郇成分宅之德嗚呼世路嶮巇一至於此太行孟門豈云斷絕是以耿介之士疾其若斯裂裳裹足棄之長鶩獨立高山之頂權與麋鹿同羣瞰瞰然絕其霧濁誠恥之也誠畏之也到漑見其論抵之於地終身恨之昉撰雜傳二百四十七卷地記二百五十二卷文章三十三卷東里位尙書外兵郎

王僧孺字僧孺東海鄒人也魏衛將軍肅八世孫也曾祖雅晉左光祿大夫儀同三司祖準之宋司徒左長史父延年員外常侍未拜卒僧孺幼聰慧年五歲便機警初讀孝經問授者曰此書何所述曰論忠孝二事僧孺曰若爾願常讀之又有餽其父冬李先以一與之僧孺不受曰大人未見不容先嘗七歲能讀十萬言及長篤愛墳籍家貧常傭書以養母寫畢諷誦亦了仕齊爲太學博士尙書僕射王晏深相賞好晏爲丹陽尹召補功曹使撰東宮新記司徒竟陵王子良開西邸招文學僧孺與太學生虞羲巨國竇融文琰巨令楷江洪劉孝孫並以善辭藻游焉而僧孺與高平徐贲俱爲學林文惠太子欲以爲宮僚乃召

入直崇明殿會薨出爲晉安郡丞仍除候官令建武初舉士爲始安王遙光所薦除儀曹郎遷書侍御史
出爲錢唐令初僧孺與樂安任昉遇於竟陵王西邸以文學會友及將之縣昉贈詩曰唯子見知唯余知
子觀行視言要終猶始敬之重之如蘭如芷形影隨曩行今止百行之首立人斯著子之有之誰毀誰
譽脩名旣立老至何遽誰其執鞭吾爲子御劉略班藝虞志荀錄伊昔有懷交相欣勗下帷無倦升高有
屬嘉爾晨澄惜余夜燭其爲士友推重如此梁天監初除臨川王後軍記室待詔文德省出爲南海太守
南海俗殺牛曾無限忌僧孺至便禁斷又外國舶物高涼生口歲數至皆外國賈人以通貨易舊時州郡
就市回而卽賣其利數倍厯政以爲常僧孺歎曰昔人爲蜀郡長史終身無蜀物吾欲遺子孫者不在越
裝並無所取視事二歲聲績有聞詔徵將還郡中道俗六百人詣闕請留不許至拜中書侍郎領著作復
直文德省撰起居注中表簿遷尙書左丞俄兼御史中丞僧孺幼貧其母鬻紗布以自業嘗攜僧孺至市
道遇中丞鹵簿驅迫墜溝中及是拜日引騶清道悲感不自勝頃之卽真時武帝制春景明志詩五百字
勅沈約以下辭人同作帝以僧孺爲工厯少府卿尙書吏部郎參大選請謁不行出爲仁威南康王長史
蘭陵太守行府州國事初帝問僧孺妾媵之數對曰臣室無傾視及在南徐州友人以妾寓之行還妾遂
懷孕爲王典馘湯道愍所糾逮詣南司坐免官久之不調友人廬江何炯猶爲王府記室僧孺乃與炯書

以見其意後爲安成王參軍事鎮右中記室參軍僧孺工屬文善楷隸多識古事侍郎金元起欲注素問訪以砭石僧孺答曰古人當以石爲針必不用鐵說文有此砭字許慎云以石刺病也東山經高氏之山多針石郭璞云可以爲砭針春秋美疢不如惡石服子慎注云石砭石也季世無復佳石故以鐵代之爾轉北中郎諮議參軍入直西省知撰譜事先是尙書令沈約以爲晉咸和初蘇峻作亂文籍無遺後起咸和二年以至于宋所書並皆詳實並在下省左戶曹前廂謂之晉籍有東西二庫此籍既並精詳寔可寶惜位宜高卑皆可依案宋元嘉二十七年始以七條徵發旣立此科人姦互起僞狀巧籍歲月滋廣以至于齊患其不實於是東堂校籍置郎令史以掌之競行姦貨以新換故昨日卑細今日便成士流凡此姦巧並出愚下不辨年號不識官階或注隆安在元興之後或以義熙在靈康之前此時無此府此時無此國元興唯有三年而猥稱四五詔書甲子不與長麻相應校籍諸郎亦所不覺不才令史固自忘言臣謂宋齊二代士庶不分雜役減闕職由於此竊以晉籍所餘宜加寶愛武帝以是留意譜籍州郡多離其罪因詔僧孺改定百家譜始晉太元中員外散騎侍郎平陽賈弼篤好簿狀乃廣集衆家大搜羣族所撰十八州一百一十六郡合七百一十二卷凡諸大品略無遺闕藏在秘閣副在左戶及弼子太宰叅軍匪之匪之子長水校尉深世傳其業太保王弘領軍將軍劉湛並好其書弘曰對千客不犯一人之諱湛爲選

曹始撰百家以助銓序而傷於寡略齊衛將軍王儉復加去取得繁省之衷僧孺之撰通范陽張等九族以代鴈門解等九姓其東南諸族別爲一部不在百家之數焉普通二年卒僧孺好墳籍聚書至萬餘卷率多異本與沈約任昉家書埒少篤志精力於書無所不觀其文麗逸多用新事人所未見者時重其富博集十八州譜七百一十卷百家譜集抄十五卷東南譜集抄十卷文集三十卷兩臺彈事不入集別爲五卷及東宮新記並行於世虞羲字士光會稽餘姚人盛有才藻卒於晉安王侍郎巨國賓吳興人以才志不遇著書以譏楊雄蕭文琰蘭陵人巨令楷吳興人江洪濟陽人竟陵王子良嘗夜集學士刻燭爲詩四韻者則刻一寸以此爲率文琰曰頓燒一寸燭而成四韻詩何難之有乃與令楷江洪等共打銅鉢立韻響滅則詩成皆可觀覽劉孝孫彭城人博學通敏而仕多不遂常歎曰古人或開一說而致卿相立談間而降白壁書籍妄耳徐贲高平人有學行父榮祖位祕書監嘗有罪繫獄旦日原之而髮皓白齊武問其故曰臣思愆於內而髮變於外當時稱之

論曰二漢求士率先經術近代取人多由文史觀江任之所以効用蓋亦會其時焉而淹實先覺加之以沉靜昉乃舊恩持之以內行其所以名位自畢各其宜乎僧孺碩學而中年遭蹟非爲不遇斯乃窮通之數也

南史卷五十九

南史卷五十九考證

江淹傳豫三五賤伎之末○五閣本注一作王

任昉傳東昏中旨用爲中書郎謝尙書令王亮○郎閣本作令誤也

主人听然○听監本作忻梁書同今从閣本

王僧孺傳東海鄰人也○監本缺也字今增入

撰起居注中表簿○簿一本作薄今从梁書

南史卷五十九考證

南史卷六十

唐

李

延

壽

撰

列傳第五十

范岫

傅昭 弟映

孔休源

江革 子德漢

徐勉

許懋 子亨

殷鈞 宗人

范岫字懋賓濟陽考城人也高祖宣晉徵士父羲宋尚書殿中郎本州別駕竟陵王誕反羲在城中事平
 遇誅岫幼而好學早孤事母以孝聞外祖顏延之早相題目以為中外之寶蔡興宗臨荆州引為主簿及
 蔡將卒以岫貧乏遺旨賜錢二十萬固辭拒之仕齊為太子家令文惠太子之在東宮沈約之徒以文才
 見引岫亦預焉岫文雖不逮約而名行為時輩所與博涉多通尤悉魏晉以來吉凶故事約常稱曰范公
 好事該博胡廣無以加南鄉范雲謂人曰諸君進止威儀當問范長頭以岫多識前代舊事也遷國子博
 士岫長七尺八寸姿容奇偉永明中魏使至詔妙選朝士有辭辯者接使於界首故以岫兼淮陰長史迎
 焉入為尚書左丞丁母憂居喪過禮朝廷頻起並不拜朝廷亮其哀款得終喪制出為安成內史創立鈞
 折行倉公私弘益徵黃門侍郎兼御史中丞吏將送一無所納永元末為輔國將軍冠軍督安王長史行
 南徐州事梁武帝平建鄴承制徵為尚書吏部郎參大選天監五年為散騎常侍光祿大夫侍皇太子給

扶累遷祠部尙書金紫光祿大夫卒官岫恭敬儼恪進止以禮自親喪後蔬食布衣以終身每所居官恆以廉絜著稱爲長城令時有梓材巾箱至數十年經貴遂不改易在晉陵唯作牙管筆一雙猶以爲費所著文集禮論雜儀字訓行於世二子襲偉

傅昭字茂遠北地靈州人晉司隸校尉咸七世孫也祖和之父淡善三禮知名宋世淡事宋竟陵王誕誕反坐誅昭六歲而孤哀毀如成人爲外祖所養十歲於朱雀航賣麻日雍州刺史袁顛見而奇之顛嘗來昭所昭讀書自若神色不改顛歎曰此兒神情不凡必成佳器司徒建安王休仁聞而悅之固欲致昭昭以宋氏多故遂不往或有稱昭於廷尉虞愿乃遣車迎昭時愿宗人通之在坐並當時名流通之貽昭詩曰英妙擅山東才子傾洛陽清塵誰能嗣及爾遺遺芳太原王延秀薦昭於丹陽尹袁粲深見禮辟爲郡主簿使諸子從昭受學會明帝崩粲造哀策文乃引昭定其所製昭有其半焉粲每經昭戶輒歎曰經其戶寂若無人披其室其人斯在豈非名賢尋爲總明學士奉朝請齊永明中累遷尙書儀曹郎先是御史中丞劉休薦昭於齊武帝永明初以昭爲南郡王侍讀王嗣帝位故時臣隸爭求權寵唯昭及南陽宗夫保身而已守正無所參入竟不罹禍明帝踐阼引昭爲中書通事舍人時居此職者皆權傾天下昭獨廉靜無所干豫器服率陋身安羸縵常插燭板牀明帝聞之賜漆合燭盤敕曰卿有古人之風故賜卿古人

之物累遷尚書左丞梁武帝素重昭梁臺建以爲給事黃門侍郎領著作兼御史中丞天監三年兼五兵尚書參選事四年卽眞厯位左戶尚書安成內史郡自宋來兵亂相接府舍稱凶每昏旦聞人鬼相觸在任者鮮以吉終及昭至有人夜見甲兵出曰傅公善人不可侵犯乃騰虛而去有頃風雨忽至飄郡聽事入隍中自是郡遂無患咸以昭眞正所致郡溪無魚或有暑月薦昭魚者昭旣不納又不欲拒遂餒于門側郡多猛獸爲害常設檻穿昭曰人不害猛獸猛獸亦不害人乃命去檻穿猛獸竟不爲害厯祕書監太常卿遷臨海太守郡有蜜巖前後太守皆自封固專收其利昭以周文之囿與百姓共之大可喻小乃教勿封縣令嘗餉粟置絹于簿下昭笑而還之普通五年爲散騎常侍金紫光祿大夫昭所莅官常以清靜爲政不尙嚴肅居朝廷無所請謁不畜私門生不交私利終日端居以書記爲樂雖老不衰博極古今尤善人物魏晉以來官宦簿伐姻通內外舉而論之無所遺失世稱爲學府性尤篤慎子婦嘗得家餉牛肉以進昭召其子曰食之則犯法告之則不可取而埋之其居身行己不負閭室類皆如此後進宗其學重其道人人自以爲不逮卒諡曰貞長子譚位尚書郎湘東王外兵參軍譚子準有文才梁宣帝時位度支尚書昭弟映字徽遠三歲而孤兄弟友睦脩身勵行非禮不動始昭之守臨海陸倕餞之賓主俱懽日暮不反映以昭年高不可連夜極樂乃自往候接同乘而歸兄弟並已斑白時人美而服焉及昭卒映喪

之如父年踰七十哀戚過禮服制雖除每言輒慟天監中位烏程令卒於太中大夫子弘

孔休源字慶緒會稽山陰人晉尚書沖之八世孫沖卽開府儀同三司愉之世父也曾祖遙之宋尚書水部郎父佩齊通直郎休源十一而孤居喪盡禮每見父手所寫書必哀慟流涕不能自勝見者莫不爲之垂泣後就吳興沈麟士受經略通大義州舉秀才太尉徐孝嗣省其策深善之謂同坐曰董仲舒華令思何以尚此可謂後生之準的也觀此足稱王佐之才琅邪王融雅相友善乃薦之於司徒竟陵王爲西邸學士梁臺建與南陽劉之遴同爲太學博士當時以爲美選休源初到都寓於宗人少府孔登會以祠事入廟侍中范雲一與相遇深加褒賞曰不期忽覩清顏頓祛鄙吝觀天披霧驗之今日後雲命駕到少府登便拂筵整帶謂當詣已備水陸之品雲駐筯命休源及至命取其常膳止有赤倉米飯蒸鮑魚雲食休源食不舉主人之饌高談盡日同載還家登深以爲愧尚書令沈約當朝貴顯軒蓋盈門休源或時後來必虛襟引接處之坐右商略文義其爲通人所推如此武帝嘗問吏部尚書徐勉求一有學藝解胡儀者爲尚書儀曹郎勉曰孔休源識見清通詳練故事自晉宋起居注誦略上口武帝亦素聞之卽日除兼尚書儀曹郎時多所改作每逮訪前事休源卽以所誦記隨機斷決曾無疑滯吏部郎任昉常謂之爲孔獨誦遷建康獄正平反辯析時罕窮人後有選人爲獄司者帝常引休源以勵之除中書舍人後爲尚書左

飛彈肅禮闈雅允期望時周捨撰禮疑義自漢魏至于齊梁並皆搜采休源所有奏議咸預編錄再遷長兼御史中丞正色直繩無所迴避百寮憚之後爲晉安王長史南郡太守行荊州府州事帝謂曰荊州總上流衝要義高分陝今以十歲兒委卿善匡翼之勿憚周昌之舉也乃敕晉安王曰孔休源人倫儀表汝年尚幼當每事師之尋始興王憺代鎮荊州復爲憺府長史太守行府事如故在州累政甚有政績平心決斷請託弗行帝深嘉之歷祕書監復爲晉安王府長史南蘭陵太守別敕專行南徐州事休源累佐名蕃甚得人譽王深相倚仗常於中齋別施一榻云此是孔長史坐人莫得預焉其見敬如此歷都官尙書普通七年揚州刺史臨川王宏薨武帝與羣臣議代居州任者時貴戚王公咸望遷授帝曰朕已得人孔休源才識通敏寔應此選乃授宣惠將軍監揚州事休源初爲臨川王行佐及王薨而管州任時論榮之神州都會簿領殷繁休源剖斷如流傍無私謁中大通二年加金紫光祿大夫在州畫決辭訟夜覽墳籍每車駕巡幸常以軍國事委之昭明太子薨有敕夜召休源入宴居殿與羣公參定謀議立晉安王綱爲皇太子自公卿珥貂插筆奏決於休源前休源怡然無愧時人名爲兼天子四年卒遺令薄葬節朔薦蔬菲而已帝爲之流涕顧謝舉曰孔休源居職清忠方欲共康政道奄至隕沒朕甚痛之舉曰此人清介彊直臣竊爲陛下惜之諡曰貞子休源風範彊正明練政體常以天下爲己任武帝深委仗之累居顯職性

麟密未嘗言禁中事聚書盈七千卷手自校練凡奏議彈文勒成十五卷長子雲章頗有父風位東揚州別駕少子宗範聰敏有識度位中書郎

江革字休映濟陽考城人也祖齊之宋都水使者尚書金部郎父柔之齊尚書倉部郎有孝行以母憂毀卒革幼而聰敏早有才思六歲便解屬文柔之深加賞器曰此兒必興吾門九歲丁父艱與第四弟觀同生少孤貧傍無師友兄弟自相訓勗讀書精力不倦十六喪母以孝聞服闋與觀俱詣太學補國子生舉高第齊中書郎王融吏部郎謝朓雅相欽重朓嘗行還過候革時大寒雪見革弊絮單席而耽學不倦嗟歎久之乃脫其所著襦并手割半氈與革充臥具而去司徒竟陵王聞其名引爲西邸學士弱冠舉南徐州秀才時豫章胡諧之行州事王融與諧之書令薦革諧之方貢琅邪王汎便以革代之僕射江祐深相引接祐爲太子詹事啟革爲丞祐時權傾朝右以革才堪經國令參掌機務詔誥文檄皆委以具革防杜形迹外人不知祐誅賓客皆罹其罪革獨以智免除尚書駕部郎中興元年梁武帝入石頭時吳興太守袁昂據郡拒義不從革製書與昂於坐立成辭義典雅帝深賞歎之令與徐勉同掌書記建安王爲雍州刺史表求管記以革爲征北記室參軍帶中廬令與弟觀少長共居不忍離別苦求同行以觀爲征北行參軍兼記室時吳興沈約樂安任昉與革書云比聞雍府妙選英才文房之職總卿昆季可謂馭二龍於

長途騁駟驥於千里途次江夏觀卒革在雍州爲府王所禮款若布衣後爲建康正頻遷秣陵建康令爲政明肅豪彊憚之歷中書舍人尙書左丞晉安王長史尋陽太守行江州府事徙廬陵王長史太守行事如故以清嚴爲屬城所憚時少王行事多傾意於籤帥革以正直自居不與典籤趙道智坐道智因還都啟事面陳革墮事好酒以琅邪王曇聰代爲行事南州士庶爲之語曰故人不道智新人佞散騎莫知度不度新人不如故遷御史中丞彈奏豪權一無所避後爲鎮北豫章王長史廣陵太守時魏徐州刺史元法僧降附革被敕隨府王鎮彭城城旣失守革素不便馬汎舟而還途經下邳爲魏人所執魏徐州刺史安豐王延明聞革才名厚加接待革稱脚疾不拜延明將害之見革辭色嚴正更加敬重時祖暉同被拘繫延明使暉作欹器漏刻銘革唾罵暉曰卿荷國厚恩已無報答乃爲虜立銘孤負朝廷延明聞之乃令革作丈八寺碑并祭彭祖文革辭以囚執旣久無復心思延明將加錘朴革厲色曰江革年六十不能殺身報主今日得死爲幸誓不爲人執筆延明知不可屈乃止日給脫粟三升僅餘性命會魏帝請中山王元略反北乃放革及祖暉還朝上大宴舉酒勸革曰卿那不畏延明害對曰臣行年六十死不爲天豈畏延明帝曰今日始見蘇武之節於是以太尉臨川王長史時帝惑於佛教朝賢多啟求受戒革精信因果而帝未知謂革不奉佛法乃賜革覺意詩五百字云唯當勤精進自彊行勝脩豈可作底突如彼必死

囚以此告革及諸貴遊又手敕曰果報不可不信豈可底突如對元延明邪革因乞受菩薩戒時武陵王紀在東州頗驕縱上以臧盾性弱不能匡正召革慰遣乃除武陵王長史會稽郡丞行府州事革門生故吏家多在東聞革應至並實持緣道迎候革曰我通不受餉不容獨當故人筐篋至鎮唯資公俸食不兼味郡境殷廣辭訟日數百革分判辯析曾無疑滯人安吏畏百城震恐琅邪王鸞爲山陰令贓貨狼籍望風自解府王憚之每侍讌言論必以詩書王因此耽學好文典籤沈熾文以王所制詩呈武帝帝謂僕射徐勉曰革果稱職乃除都官尙書將還贈遺一無所受送故依舊訂舫革並不納唯乘臺所給一舸舸艚偏敝不得安臥或請濟江徙重物以迨輕艚革旣無物乃於西陵岸取石十餘片以實之其清貧如此尋監吳郡時境內荒儉劫盜公行革至郡唯有公給仗身二十人百姓皆懼不能靜寇革乃省游軍尉百姓逾恐革乃廣施恩惠盜賊盡息武陵王出鎮江州乃曰我得江革又得革清貧豈能一日忘之當與其同飽乃表革同行除南中郎長史尋陽太守徵入爲度支尙書好獎進閭閻爲後生延譽由是衣冠士子翕然歸之時尙書令何敬容掌選序用多非其人革性彊直每朝宴恆有哀貶以此爲權貴所疾乃謝病還家除光祿大夫優游閑放以文酒自娛卒諡曰疆子有集二十卷行於世革歷官八府長史四王行事三爲二千石傍無姬侍家徒壁立時以此高之長子敏早卒次子德藻

德藻字德藻好學美風儀身長七尺四寸性至孝事親盡禮與異產昆弟居恩惠甚篤涉獵經籍善屬文仕梁爲尚書比部郎以父憂去職服闋後容貌毀瘠如居喪時及陳武帝受禪爲祕書監兼尚書左丞尋以本官兼中書舍人天監中兼散騎常侍與中書郎劉師知使齊著北征道里記三卷還除太子中庶子遷御史中丞坐公事免後自求宰縣補新渝令政尚恩惠頗有異績卒於官文帝贈散騎常侍文筆十五卷子椿亦善屬文位尚書右丞德藻弟從簡少有文情年十七作采荷調以刺何敬容爲當時所賞位司徒從事中郎侯景亂爲任約所害子兼叩頭流血乞代父命以身蔽刃遂俱見殺天下痛之

徐勉字脩仁東海鄒人也祖長宗宋武帝霸府行參軍父融南昌相勉幼孤貧早勵清節年六歲屬霖雨

家人祈霽率爾爲文見稱耆宿及長好學宗人孝嗣見之歎曰此所謂人中之騏驥必能致千里又嘗謂諸子曰此人師也爾等則而行之年十八召爲國子生便下帷專學精力無怠同時儕輩肅而敬之祭酒

王儉每見常目送之曰此子非常器也每稱有宰輔之量射策甲科起家王國侍郎補太學博士時每有議定勉理證明允莫能貶奪同官咸取則焉遷臨海王西中郎田曹行參軍俄徙署都曹時琅邪王融一時才儁特相慕悅嘗請交焉勉謂所親曰王郎名高望促難可輕褻衣裾融後果陷於法以此見推誠鑒

累遷領軍長史初與長沙宣武王游梁武帝深器賞之及武帝兵至建鄴勉於新林謁見帝甚加恩禮使

管書記及帝卽位拜中書侍郎進領中書通事舍人直內省遷臨川王後軍諮議尙書左丞自掌樞憲多所糾舉時論以爲稱職天監三年除給事黃門侍郎尙書吏部郎參掌大選遷侍中時師方侵魏候驛城委勉參掌軍書劬勞夙夜動經數旬乃一還家羣大驚伏勉歎曰吾憂國忘家乃至於此若吾亡後亦是傳中一事六年除給事中五兵尙書遷吏部尙書勉居選官彙倫有序旣閑尺牘兼善辭令雖文案填積坐客充滿應對如流手不停筆又該綜百氏皆避其諱嘗與門人夜集客有虞鬻求詹事五官勉正色答云今夕止可談風月不宜及公事故時人服其無私天監初官名互有省置勉撰立選簿奏之有詔施用其制開九品爲十八班自是貪冒苟進者以財貨取通守道淪退者以貧寒見沒矣後爲左衛將軍領太子中庶子侍東宮昭明太子尙幼敕知宮事太子禮之甚重每事詢謀嘗於殿講孝經臨川王宏尙書令沈約備二傳勉與國子祭酒張充爲執經王瑩張稷柳澄王暕爲侍講時選極親賢妙盡人譽勉陳讓數四又與沈約書求換侍講詔弗許然後就焉舊揚徐首迎主簿盡選國華中正取勉子崧充南徐選首帝敕之曰卿寒士而子與王志子同迎偃王以來未之有也勉恥以其先有戲答旨不恭由是左遷散騎常侍領游擊將軍後爲太子詹事又遷尙書右僕射詹事如故時人間喪事多不遵禮朝終夕殯相尙以速勉上疏曰禮記問喪云三日而後斂者以俟其生也三日而不生亦不生矣頃來不遵斯制送終之禮殯

以暮日潤屋豪家乃或半晷衣衾棺槨以速爲榮親戚徒隸各念休反故屬纊纒畢灰釘已具忘孤單之
顧步媿燕雀之徊翔傷情滅理莫此爲大且人子承衾之時志瀕心絕喪事所資悉關他手愛憎深淺事
寔難原如覘視或爽存沒違濫使萬有其一怨酷已多豈不緩其告斂之辰申其望生之冀請自今士庶
宜悉依古三日大斂如其不奉加以糾繩詔可其奏又除尙書僕射中衛將軍勉以舊恩繼升重位盡心
奉上知無不爲爰自小選迄于此職常參掌衡石甚得士心禁省中事未嘗漏泄每有表奏輒焚藁草博
通經史多識前載齊世王儉居職已後莫有逮者朝儀國典昏冠吉凶勉皆預圖議初勉受詔知撰五禮
普通六年功畢表上之曰夫禮以安上化人弘風訓俗經國家利後嗣者也唐虞三代咸必由之在乎有
周憲章尤備因殷革夏損益可知雖復經禮三百曲禮三千經文三百威儀三千其大歸有五卽宗伯所
學典禮吉爲上凶次之賓次之軍次之嘉爲下也故祠祭不以禮則不齊不莊喪紀不以禮則背死忘生
者衆賓客不以禮則朝覲失其儀軍旅不以禮則致亂於師律冠昏不以禮則男女失其時爲國脩身於
斯攸急洎周室大壞王道旣衰官守斯文日失其序暴秦滅學埽地無餘漢氏鬱興日不暇給猶命叔孫
於外野方知帝王之爲貴末葉紛綸遞有興毀及東京曹褒南宮制述集其散略百有餘篇雖寫以尺簡
而終闕平奏其後兵革相尋異端互起章句旣淪俎豆斯輟方領矩步之容事滅於旌鼓蘭臺石室之典

用盡於帷蓋至乎晉氏爰定新禮荀顛制之於前摯虞刪之於末既而中原喪亂罕有所遺江左草創因循而已釐革之風是則未暇伏惟陛下睿明啟運光天改物撥亂惟武經俗以文作樂在乎功成制禮弘於業定伏尋所定五禮起齊永明二年太子步兵校尉伏曼容表求制一代禮樂于時參議置新舊學士十人止脩五禮諮稟衛將軍丹陽尹王儉學士亦分住郡中制作歷年猶未克就及文憲薨遺文散逸又以事付國子祭酒何胤經涉九載猶復未畢建武四年胤還東山齊明帝敕委尙書令徐孝嗣舊事本末隨在南第永元中孝嗣於此遇禍又多零落當時鳩集所餘權付尙書左丞蔡仲熊驍騎將軍何佟之共掌其事時禮局住在國子學中門外東昏之時頗有軍火其所散失又踰大半天監元年佟之啟審省置之宜敕使外詳時尙書參詳以天地初革庶務權輿宜俟隆平徐議刪撰欲且省禮局併還尙書儀曹詔旨云禮壞樂缺故國異家殊寔宜以時修定以爲永準於是尙書僕射沈約等參議請五禮各置舊學士一人人各自舉學士二人相助抄撰其中有疑者依前漢石渠後漢白虎隨源以聞請旨斷決乃以舊學士右軍記室參軍明山賓掌吉禮中軍騎兵參軍嚴植之掌凶禮中軍田曹行參軍兼太常丞賀瑒掌賓禮征虜記室參軍陸璣掌軍禮右軍參軍事司馬襲掌嘉禮尙書右丞何佟之總參其事佟之亡後以鎮北諮議參軍伏暉代之後又以暉代嚴植之掌凶禮暉尋遷官以五經博士繆昭掌凶禮復以禮儀深廣

詔載禮職宜須博論共盡其致更使鎮軍將軍丹陽尹沈約太常卿張充及臣三人同參厥務臣又奉別
敕總知其事未又使中書侍郎周捨庾於陵二人復豫參知若有疑義所掌學士當職先立議通諮五禮
博士及參知各言同異條牒啟聞決之制旨疑事既多歲時又積制旨裁斷其數不少莫不網羅經誥
玉振金聲凡諸奏決皆載篇首具列聖旨爲不刊之則靈孝宣之能擬豈孝章之足云五禮之職事有繁
簡及其列畢不得同時嘉禮儀注以天監六年五月七日上尚書合十有二帙一百一十六卷五百三十
六條賓禮儀注以天監六年五月二十日上尚書合十有七帙一百三十三卷五百四十五條軍禮儀注
以天監九年十月二十九日上尚書合十有八帙一百八十九卷二百四十條吉禮儀注以天監十一年
十一月十日上尚書合二十有六帙二百二十四卷一千五條凶禮儀注以天監十一年十一月十七日
上尚書合四十有七帙五百一十四卷五千六百九十三條大凡一百二十帙一千一百七十六卷八千
一十九條又列副祕閣及五經典書各一通繕寫校定以普通五年二月始獲完畢竊以撰正履禮歷代
罕就皇明在運厥功克成周代三千舉其盈數今之八千隨事附益質文相變故其數兼倍猶如八卦之
及因而重之錯綜成六十四也臣以庸識謬司其任淹留歷稔允當斯責兼勒成之初未遑表上寔由才
輕務廣思力不周永言慙惕無忘寤寐自今春輿駕將親六師搜尋軍禮閱其條章靡不該備可以懸諸

日月殞之天下者矣詔有司案以遵行尋加中書令勉以疾求解內任詔不許乃令停下省三日一朝有事道主書論決患脚轉劇久闕朝覲固求陳解詔許疾差還省勉雖居顯職不營產業家無畜積奉祿分贖親族之貧乏者門人故舊或從容致言勉乃答曰人遺子孫以財我遺之清白子孫才也則自致糶耕如不才終爲佗有嘗爲書戒其子崧曰吾家本清廉故常居貧素至於產業之事所未嘗言非直不經營而已薄躬遭逢遂至今日尊官厚祿可謂備之每念叨竊若斯豈由才致仰藉先門風範及以福慶故臻此爾古人所謂以清白遺子孫不亦厚乎又云遺子黃金滿篋不如一經詳求此言信非徒語吾雖不敏竊有本志庶得遵奉斯義不敢墜失所以顯貴以來將三十載門人故舊承薦便宜或使創闢田園或勸興立邸店又欲舳艫運致亦令貨殖聚斂若此衆事皆距而不納非謂拔葵去織且欲省息紛紜中年聊於東田開營小園者非存播藝以要利政欲穿池種樹少寄情賞又以郊際閑曠終可爲宅儻獲懸車致事寔欲歌哭於斯慧曰十住等旣應營昏又須住止吾清明門宅無相容處所以爾者亦復有以前割西邊施宣武寺旣失西廂不復方幅意亦謂此逆旅舍爾何事須華常恨時人謂是我宅古往今來豪富繼踵高門甲第連闌洞房宛其死矣定是誰室但不能不爲培塿之山聚石移果雜以花卉以娛休沐用託性靈隨便架立不存廣大唯功德處小以爲好所以內中逼促無復房宇近脩東邊兒孫二宅乃藉十住

南遷之資其中所須猶爲不少既牽挽不至又不可中途而輟郊間之園遂不辦保貨與草豔乃獲百金成就兩宅已消其半尋園價所得何以至此由吾經始歷年粗已成立桃李茂密桐竹成陰陸陌交通渠畎相屬華樓迴榭頗有臨眺之美孤峯叢薄不無糾紛之興瀆中並饒荷蓀湖裏殊富芰蓮雖云人外城闕寥寥草生欲之亦雅有情趣追述此事非有吝心蓋是事意所至爾憶謝靈運山家詩云中爲天地物今成鄙夫有吾此園有之二十載今爲天地物物之與我相校幾何哉此直所餘今以分汝營小田舍親累既多理亦須此且釋氏之教以財物謂之外命外典亦稱何以聚人曰財況汝常情安得忘此聞汝所買湖熟田地甚爲烏鹵彌復可安所以如此非物競故也雖事異寢丘聊可髣髴孔子曰居家理事可移於官既已營之宜使成立進退兩亡更貽恥笑若有所收穫汝可自分贍內外大小宜令得所非吾所知又復應落之諸女爾汝既居長故有此及凡爲人長殊復不易當使中外諧緝人無間言先物後己然後可貴老生云後其身而身先若能爾者更招巨利汝當自最見賢思齊不宜忽略以棄日也棄日乃是棄身身名美惡豈不大哉可不慎歟今之所敕略言此意政謂爲家以來不事資產暨立墅舍似乖舊業陳其始末無愧懷抱兼吾年時朽暮心力稍單牽課奉公略不克舉其中餘暇裁可自休或復冬日之陽夏日之陰夏辰美景文案間隙負杖躡履逍遙陋館臨池觀魚披林聽鳥濁酒一杯彈琴一曲求數刻之暫

樂庶居常以待終不宜復勞家間細務汝交關既定此書又行凡所資須付給如別自茲以後吾不復言及田事汝亦勿復與吾言之假使堯水湯旱豈如之何若其滿庾盈箱爾之幸遇如斯之事過並無俟令吾知也記云夫孝者善繼人之志善述人之事今且望汝全吾此志則無所恨矣第二子悱卒痛悼甚至不欲久廢王務乃爲答客以自喻焉普通末武帝自算擇後宮吳聲西曲女妓各一部並華少賚勉因此頗好聲酒祿奉之外月別給錢十萬信遇之深故無與匹中大通中又以疾自陳移授特進右光祿大夫侍中中衛將軍置佐史扶如故增親信四十人兩宮參問冠蓋結轍有敕每欲臨幸勉以拜伏有虧頓敢傳出詔許之遂停輿駕及卒帝聞而流涕卽日車駕臨殯贈右光祿大夫開府儀同三司皇太子亦舉哀朝堂有司奏謚居敬行簡曰簡帝益執心決斷曰肅因謚簡肅公勉雖骨鯁不及范雲亦不阿意苟合後知政事者莫及梁世之言相者稱范徐云善屬文勤著述雖當機務下筆不休常以起居注煩雜乃撰爲流別起居注六百六十卷左丞彈事五卷在選曹撰選品三卷齊時撰太廟祝文二卷以孔釋二教殊途同歸撰會林五十卷凡所著前後二集五十卷又爲人章表集十卷大同三年故佐史尙書左丞劉覽等詣闕陳勉行狀請刊石紀德卽降詔立碑於墓焉悱字敬業幼聰敏能屬文位太子舍人掌書記累遷洗馬中舍人猶管書記出入宮坊者歷稔以足疾出爲湘東王友俄遷督安內史

許懋字昭哲高陽新城人魏鎮北將軍允九世孫也五世祖詢晉徵士祖珪宋給事著作郎桂陽太守父
勇慧齊太子家令允從僕射懋少孤性至孝居父憂執喪過禮篤志好學爲州黨所稱十四入太學受毛
詩巨領師說晚而覆講坐下聽者常數十百人因撰風雅比興義十五卷盛行於時尤明故事稱爲儀注
學起家後爲豫章王行參軍轉法曹舉秀才遷驃騎大將軍儀同中記室文惠太子聞而召之侍講於崇
明殿後兼國子博士與司馬襲同志友善僕射江祐甚推重之號爲經史笥梁天監初吏部尙書范雲舉
懋參詳五禮除征西鄱陽王諮議參軍兼著作郎待詔文德省時有請會稽封禪者武帝因集儒學士草
封禪儀將行焉懋建議獨以爲不可帝見其議嘉納之由是遂停十年轉太子家令凡諸禮儀多所刊正
以足疾出爲始平太守政有能名加散騎常侍轉天門太守中大通三年皇太子召與諸儒錄長春義記
四年拜中庶子是歲卒撰述行記四卷有集十五卷子亭

亨字亨道少傳家業孤介有節行博通羣書多識前代舊事甚爲南陽劉之遴所重梁太清初爲西中郎
記室兼太常丞侯景之亂避地郢州會梁邵陵王自東至引爲諮議參軍王僧辯之襲郢州素聞其名召
爲儀同從事中郎遷太尉從事中郎與吳興沈炯對掌書記府政朝務一以委之晉安王承制授給事黃
門侍郎陳武帝受禪爲太中大夫領大著作知梁史事初僧辯之誅也所司收僧辯及其子顛屍於方山

同坎埋瘞至是無敢言者亨以故吏抗表請葬之與故義徐陵張種孔奐等相率以家財營葬凡七柩皆改窆焉光大中宣帝入輔以亨貞正有古人風甚相欽重常以師禮事之及到仲舉之謀出宣帝宣帝問亨亨勸勿奉詔宣帝卽位拜衛尉卿卒於官亨初撰齊書并志五十卷遇亂亡失後撰梁史成者五十八卷梁太清之後所製文筆六卷子善心位尙書度支侍郎

殷鈞字季和陳郡長平人晉荊州刺史仲堪五世孫也曾祖元素宋南康相坐元凶事誅元素娶尙書僕射琅邪王僧朗女生子寧早卒寧遺腹生子叡亦當從戮僧朗啟孝武救之得免叡有口辯司徒褚彥回甚重之謂曰諸殷自荊州以來無出卿叡斂容答曰殷族衰悴誠不如昔若此旨爲虛故不足降此旨爲實彌不可闕仕齊歷司徒從事中郎叡妻琅邪王奐女奐爲雍州刺史啟叡爲府長史奐誅叡亦見害鈞九歲以孝聞及長恬靜簡交游好學有思理善隸書爲當時楷法南鄉范雲樂安任昉並稱美之梁武帝與叡少故舊以女永興公主妻鈞拜駙馬都尉歷祕書丞在職啟校定祕閣四部書更爲目錄又受詔料檢西省法書古迹列爲品目累遷侍中東宮學士自宋齊以來公主多驕淫無行永興主加以險虐鈞形貌短小爲主所憎每被召入先滿壁爲殷叡字鈞輒流涕以出主命婢束而反之鈞不勝怒而言於帝帝以屨如意擊主碎於背然猶恨鈞自侍中出爲王府諮議後爲明威將軍臨川內史鈞體羸多疾閉閣臥

理而百姓化其德劫盜皆奔出境嘗禽劫帥不加考掠和言請賣劫帥稽顙乞改過鈞便命遣之後遂爲善人郡舊多山瘡更暑必動自鈞在任郡境無復瘡疾毋憂去職居喪過禮昭明太子憂之手書誠喻服闋爲散騎常侍領步兵校尉侍東宮改領中庶子後爲國子祭酒卒諡貞二子構渥鈞宗人善

芸宇灌蔬僦儻不拘細行然不妄交游門無雜客勵精勤學博洽羣書幼而廬江何憲見之深相歎賞天監中位祕書監司徒左長史後直東宮學士省卒

論曰范懋賓之德美傳茂達之清令孔休源之政事江休映之彊直並加以學植飾之以文采其所以取高時主豈徒然哉徐勉少而勵志發憤忘食脩身慎行運屬興王依光日月致位公輔提衡端執時無異議爲梁氏宗臣信爲美矣許懋業藝以經笥見推亨懷道好古以博覽歸譽其所以折議封禪求葬僧辯正直存焉豈唯文義而已古人云仁者有勇斯言近之殷鈞德業自居又加以政績文質斌斌亦足稱也

南史卷六十

南史卷六十考證

傅昭傳父淡善三禮知名宋世事宋竟陵王誕○事監本作仕今从閣本

郡有蜜巖○監本脫蜜字今从閣本增入

縣令常飽粟置網於簿下○粟一本作粟

孔休源傳時周捨撰禮疑義○監本缺義字又下文休源所有奏議咸預編錄句缺錄字今俱增入

江革傳會魏帝請中山王元略反北○請監本誤討今从魏書改正

武陵王出鎮江州乃曰我得江革又得革清貧豈能一日忘之○又一本作文

許亨傳凡七樞皆改竄焉○樞監本誤樞今改正

